

**SEVENTH LEGISLATIVE ASSEMBLY OF MIZORAM  
( SEVENTH SESSION )**

**LIST OF BUSINESS**

FOR THIRD SITTING ON THURSDAY, THE 8<sup>th</sup> OCTOBER, 2015  
( Time 10:30 A.M. to 1:00 P.M. and 2:00 P.M. to 4:00 P.M. )

**QUESTIONS**

1. **Questions** entered in separate list to be asked and oral answers given.

**PRIVATE MEMBERS' BUSINESS**

2. \* **Resolutions**

NGURTHANZUALA  
Secretary

---

\* Please see Bulletin Part-II No. 103, dated the 1<sup>st</sup> October, 2015 for relative precedence of Private Members' Resolutions to be moved.

**SPEAKER** : Nimahsela, tu pawhin khawvel sum neiin a unau tlachhamin hmu sela, ani chu lainat si suh sela, Pathian hmangaihna chu amahah engtin nge a awm ang. Naute u, thu chauhvvin i hmangaih suh ang u khai, lei chauhvvin i hmangaih hek suh ang u, thiltih leh tihtakzetin ni zawk rawh se.

I Johana 3 : 17-18

Zawhna kan la ang a, member zahawm tak ten kan hriat atana tha chu zawhna hi a tlangpuuin ni khatah 20(sawmhnih) kan han list a, a chanve pawh hi kan la hman ngai lova, Mizoram mipuite ngaihven ber chu zawhna leh chhanna hun hi a ni a, chuvang chuan zawhna tam zawk kan lak theihna turin hetiang hian ti ta ila a tha ang. Zawhna neitu khan a zawt ang a, zawhbelhna a neih chuan a zawt nghal ang a, chumi zawhah member 2(pahnih) dangin zawhna an neih chuan an zawhbelh ang a, chumite zawhna chu vawikhatah Minister-in chhang sela, chu chu a tawpna ni tawh rawh se. Chuti lo chu member theuh theuh zawhna a hnunglama mite vawikhatmah kan laksak thei ngai lova, a hnunga mite an khawngaih thlak lutuk a ni, chu chu member zahawmtakte hian hrethiamin chutianga kal chu i tum ang u.

Tunah Starred Question No. 33-na Dr. K. Beichhua zawt turin i sawm ang.

**Dr. K. BEICHHUA** : Pu Speaker, ka lawm e. Agriculture Department changtu Minister zahawm tak hnena ka zawhna chu -

- (a) NLUP implement hnu hian mimal emaw pawl emaw hnena NLUP pawisa puk tir a awm em ?
- (b) Awm ta se tu hnenah nge puktir a nih ?
- (c) Cheng engzatnge puktir a nih ?
- (d) NLUP pawisa atangin motor engzatnge lei ni tawh ?

**SPEAKER** : Awle, a chhang turin a changtu Minister zahawm tak i lo sawm ang.

**Pu R. LALZIRLIANA, MINISTER** : Pu Speaker, MLA zahawm tak Dr. K. Beichhua zawhna chhanna chu -

- (a) NLUP hmalakna a Implementing Partner hrang hrangte hnenah interest free loan pek a ni.
- (b) Heng Organisation te hi puk tir an ni.
  - (i) Hnam chhantu
  - (ii) L.Z. Bamboo Industries
  - (iii) Mizoram Broom India
  - (iv) Community Development Action and Reflection (CDAR)

- (v) Samuel Tea Factory
- (c) (i) Hnam chhantu - ₹ 230 lakh
- (ii) L.Z. Bamboo Industries - ₹ 10 lakh
- (iii) Mizoram Broom India - ₹ 30 lakh
- (iv) Community Development Action and Reflection (CDAR) – ₹ 50 lakh
- (v) Samuel Tea Factory – ₹ 57.77 lakh
- Total ₹ 377.77 lakh**
- (d) NLUP pawisain Motor chi hrang hrang 68 lei a ni tawh.

**SPEAKER** : Zawhbelhna, a neitu, chumi zawhah mi pahnih dangin in zawt leh ang.

**Dr. K. BEICHHUA** : Pu Speaker, ka zawhbelhna chu -

1. NLUP Manual hi ka lo chhiar ve a, tah hian NLUP pawisa puk dan a inziah awm ka hre lova, chuvang chuan helaia pawisa puk tir hi eng dana puk tir nge ?
2. A rulh hun chhung hi engtiang hun chhunga rulh tur nge ni ang ?
3. Hengho hianin an pawisa puk hi an rul tawh em ? Rul lo ta se, intiamkamna a awm em ? Intiamkamna ang a tih a ni em? Midang tan puk theih a la ni em ? Motor lei nan hian cheng engzatnge sen anih ?

**SPEAKER** : Chhang rihlo se, midang 2(pahnih) zawt duh in awm chuan zawhbelh ni se.

**Pu LALRUATKIMA** : Pu Speaker, ka lawm e. Pawisa puk tir, khang zozai kha kan puk tir a, engzat interest in nge puk tir a nih ? compound interest nge simple interest tih kha kan Minister zahawm tak ka zawt e.

\* Speech not corrected

**Er. LALRINAWMA** : Pu Speaker, ka lawm e. Heng Firm a rawn sawite hi mimal ta nge pawl ta? Mimal ta engzatnge awm? Pawl ta engzatnge awm? tih ka zawt e.

**SPEAKER** : Awle, tunah chuan Minister-in chhang sela zawhbelhna dang a awm tawh lovang.

**Pu R. LALZIRLIANA, MINISTER** : Pu Speaker, a rulh hun tur hi sawi a ni a, an puk dawn hian dahkham dahin loan hi pek chhuah an ni a. Tin, NLUP pawisa hi puk tir theih loh dan a awm chuang lova, chuvangin heng kan beneficiaries-te hi an hlawhtlin tak tak duh avangin heng pawisa hi Board remtihna thlapa puk tir an ni a.

Motor-te hi a leina man chiah hi ka hre lova, District tinah hian pek an ni a. Aizawl District-ah - 8, Agriculture Department – 9, Horticulture Department - 9, AH & Vety Department - 9, Soil & Water Conservation - 5, Sericulture Department - 3, Industries Department – 4, Fisheries Department - 4, Environment & Forest Department -1, I & PR Department – 8, NLUP Implementing Board – 8.

A puknaah hian eng dan chiah nge an hman chu ka lo hre lova, kha kha chu an hriat duh chuan kan la hrih thei ang a.

**SPEAKER** : A chhan hmaih i zawt thei ang a dang ni lovin. In zawh tawhah khan chhan hmaih a nei em ? ( Dr. K. Beichhua : Tuna a rawn chhanna zulzui khan zawhna ka siam leh duh deuh a ) A chhanna atanga zawhna dang invite zel kha chu a tha lo, a tawp thei lovang. In zawh tawh zingah chhan hmaih a nei em? (Dr. K. Beichhua : Interest zawhna kha a la chhang lo)

**Pu R. LALZIRLIANA, MINISTER** : Pu Speaker, interest awm lova puk tir an ni heng loan ho hi, Interest free loan a ni e.

**Dr. K. BEICHHUA** : Pu Speaker, thil pakhat.....

**SPEAKER** : Ngawi rawh a zawh theih tawh loh.

**Dr. K. BEICHHUA** : NLUP clarification atan....

**SPEAKER** : Kan chaklo lutuk zawhna 43-ah i kal ang.

**Dr. K. BEICHHUA** : NLUP Board khanin Hnamchhantu a pe a ti a, Hnamchhantu pe lovin mimal anga pein tah hian RTI-a zawhnaah chuan a inziak.

**SPEAKER** : Kan kal chaklo lutuk zawhna No.34 - naah i kal ang. (Dr. K. BEICHHUA - Hnam chhantu pe lova mimal anga pein hetah hian RTI a zawhnaah chuan a inziak a ni. Kan Minister chhanna nen khan a inang tlat lo)

**Pu R. LALZIRLIANA, MINISTER** : Hnam chhantu hi a hotupa chu Pu Ramhmangaiha, Electric veng a ni a. (Er. LALRINAWMA: Mimal ta nge organization tih kha ka zawt a, kha kha min la chhang lo a ni) Heng hi Pu Speaker, mimal an ni lova, firm nei vek an ni. Company anga indin vek an ni.

**SPEAKER** : Zawhna No.34-na.

**Pu LAL THANHAWLA, CHIEF MINISTER** : Pu Speaker, sawifiah tur a awm. Heng pawisa puk tir hi Venus Bamboo Plant-a vaibelchhe tel pek ang mai mai te, khi lam Hnahlan, Champhai Winery vela a nuai 10 tel pek ang mai mai kha a ni lova. NLUP ina a thil tum te nena inmil a, hma la tute hnenah awmze nei taka puk tir an ni. Dahkham an nei vek a, chutiang a tih tir chu an ni a. Chuvangin, NLUP in a thiltumte tanpui tur leh tipuitling tur zawnga hma latute an ni a. An lo la ta lo a nih chuan chu chu thuneituten an la endik ang a.

Tin, NLUP pawisa Vaibelchhe 2813 kan neihah hian a chanve hi Infrastructure Development atana thuneituten a tul anga an hman tur atan a tih a ni a. Apex Board kan nei a, Chief Minister Chairman a ni a, chumi hnuaiah chuan Minister leh mithiam tamtak te an la awm a, sorkar pawnlam a mite pawh Kohhran hruaitute nen lam, chungte nena ngaihtuah chhoa hetiang a ti hi a ni a. Chuvangin, heng sum puk tirna chhan hi riral tur a ni lova, mortgage thatak an nei a. ZIDCO ten an puk tir ang mai mai chi kha a ni lova, chuvangin, thil hlauhawm turah ngaih a ni lova. Tin, puk tirna chhan original idea chu NLUP in a thiltumte a tihlawhtling tur a ni a, Hnam chhantute leh hei henge hian ka tawng an huatthu suhah tlema mi harsa zawk te tan hemi Brooms te kan siam chungchang leh an sawisak chungchangah hian employment tam tak a generate a ni.

Chutiang chuan hei Tea Factory te, CDAR an tihah te pawh hian kan thil tharchhuah te marketing atana thil tangkai tura beisei a ni a, an hlawhtlin leh tlin loh erawh chu anmahni thu a ni.

**Pu LALRUATKIMA** : Pu Speaker, Motor pek zat kha a in tally lo tlat mai a, Motor 68 lei a nih laiin 65 chauh sem a ni a, 3 kha a bo tihna nge? Engnge ni a chhutsual aw, nge ka chhutsual zawk?

\* Speech Not corrected.

**Pu R. LALZIRLIANA, MINISTER** : Motor kha a belh soal a nih kha 68 lei a ni a helaia lo lang hi pakhat a tel lova 67 a ni a. Tichuan a pakhat a chu a chhiat tawh avangin khalai ah khan tuman an kawl tawh lo. ( PU LALRUATKIMA : 65 in ka chhut a, ka chhutsual nge ni zawk ). Aw i chhutsual a nih kha ( PU LALRUATKIMA : 65 a ni Aizawl ah 8 Pu Speaker, Agriculture-ah 9, Horticulture-ah 9, Veterinary-ah 9, Soil & Water Conservation-ah 5, Sericulture-ah 2, Industries-ah 4, Fisheries-ah 4, I&PR-ah 7, NLUP-ah 8 anih chuan a vaiin 65 a ni zawk ang. ( S P E A K E R : Office lamah a clarify theih ang chu, hetah chuan a record kha kan nei lova ) ( PU LALRUATKIMA : Heta inmil lo kha a fel lo deuh e ka'n ti mai a ni).

**SPEAKER** : Zawhna dangah i kal ang u aw, 34-na neitu Pu Nihar Kanti Chakma zawt turin i lo sawm ang.

**Pu NIHAR KANTI CHAKMA** : Pu Speaker, ka lawm e. Ka zawhna Starred Question No. 34-na, School Education Department changtu Minister zahawmtak chhan a tan –

- a) Mizoramah H.S.L.C. Examination Centre engzatnge awm ?
- b) Centre tinah student engzatnge exam theih ?
- c) 2014 ah leh 2015 Tlabung Centre-ah zirlai engzatnge awm ?

**SPEAKER** : Le, Minister chhang turin i lo sawm ang.

**Pu H. ROHLUNA, MINISTER** : Pu Speaker, Pu Nihar Kanti Chakma zawhna chhanna chu –

- a) Mizoramah H.S.L.C. Examination Centre 108 a awm.
- b) A tlem berah candidate 100 tal an tling tur a ni a, a tam lamah erawh bithliah a awm lo. Exam Centre-a school hrang hranga zirlai awm zat a zir a ni a. Tin, Exam Centre building-in a accommodate theih zat a zir a ni bawk.
- c) 2014 ah HSLC candidate 285 leh 2015 ah HSLC 245 an awm.

**SPEAKER** : Awle, zawhbelhna a neituin zawt hmasa se, chu lo midang 2, chumi zawhah a chhang dawn nia.

**Pu NIHAR KANTI CHAKMA** : Pu Speaker, zawhbelhna - Ka bial pumpuiaah Exam Centre 1 chiah an nei a, ka bial chhungah Government High School hi 3 lai an nei ve a ni a. RMSA hnuaiyah school 3 an nei a, Nunsury, Kojoysury leh Puankhaiah a ni a. Kumtin hei student hi an pung tual tual a, Centre 1 chiah an nei a, chuvangin accommodation hi an problem a ni a.

Nikumah Tipperaghat Govt. High School-ah Centre an dil ve a dan ang thlapin, khamiah khan Centre thar hi dah theih dan a awm em ? Min dahsak thei em tih kha zawh ka duh a. A dah theih loh chuan a dah theih lohna chhan kha min hrilh thei em? A chhan chu hei Tlabung-ah leh hmun hrang hrangah a accommodation hi an problem a ni a. Chuvangin, Tiperaghat-ah hian Centre thar hi dah theih dan a awm em tih kha ka'n zawt a ni e.

**SPEAKER** : Zawhbelhna a awm chuan 2 dangin a zawh theih a, a awm lem loh chuan Ministerin chhang se, chu chu a tawpna a ni tawh ang.

**Pu H. ROHLUNA, MINISTER** : Pu Speaker, member zahawmtak zawhna neituin a zawhbelhna, a bial chhung Tlabung ah khan HSLC Examination Centre kha awmsa a awm a, naupang awmzat te pawh kan sawi tawh a. Examination Centre hi fimkhur a ngai khawp a, Security te, Communication-ah te, chu lovah chuan Confidential engkim khawih an nih avangin a kalphung a awm ve a, exam centre diltu a piang pek ngawt hi a dik lohna

chin a awm a. A ngaihtuahtu Board lam leh Committee ten a awm an tihna laiah leh mamawh dan a zirin naupang exam tur 100 tal an awm tur a ni tih a ni a. Mahse, a tul dan a zirin relax theih chu a ni a. Chuti chung chuan a bial chhung Tiperaghat dilna pawh Board lam atanga an han en khan tun dinhmunah hi chuan pek theih rih loh ni a an hriat avangin an la ti lo niin ka hria.

**SPEAKER** : Awle, kha a tawpna kan tih kha.

**Pu NIHAR KANTI CHAKMA** : A awmzia chu nichina kan sawi ang khan, kumtin hian exam tur student hi an pung tual tual a ni a. Nichina Minister zahawmtakin a chhanna 2014 ah pawh 285 lai a ni a, 2015 ah pawh 245 a ni a, kumin pheih chuan kha aiin an tam dawn a ni. 300 chuang lai accommodate tur hi a la ngai dawn a ni. Chuvangin, Tlabungah, a centre ber himna tur chuan, hei police an nei ve tho a, Security thilah chuan problem nei lo turah chuan ngai ta ila. Chu chu a nia ka zawh duhna chhan chu. Hetiang zat zirlaite hi an accommodate thei lovang, Tlabungah pheih chuan...(SPEAKER: Office lamah nawr zui ta mai la) Kha kha Session lai a nih vangin assurance min pe se chu ka duh a nih hi.

**SPEAKER** : Zawhna 35-na Pu Lalruatkima, MLA zahawm takin zawt sela.

**Pu LALRUATKIMA** : Pu Speaker, ka lawm e. Ka starred question 35-na, Agriculture Department changtu Minister zahawm tak chhan atan :-

- (a) Kum 2012-2015 chhungin NLUP atan sum engzat nge hmuh a nih a, khawi atanga hmuh nge a nih?
- (b) NLUP sum bank-ah engzat nge dah a nih a, engtik atang khan nge dah a nih? Engzat nge a pung (interest) awm tawh?
- (c) NLUP sum hi K-Deposit-ah engzat nge awm mek?

\* Speech not corrected.

**SPEAKER** : Awle, Agriculture Department Minister zahawm tak chhang turin i lo sawm ang.

**Pu R. LALZIRLIANA, MINISTER** : Pu Speaker, MLA zahawm tak Pu Lalruatkima zawhna chhanna chu :-

- (a) Kum 2012-2015 chhunga NLUP atana sum hmuh dan chu hetiang hi a ni:
  - i) 2012-2013 - ₹ 370.00 crore
  - ii) 2013-2014 - ₹ 370.00 crore
  - iii) 2014-2015 - ₹ 317.32 crore

**Total - ₹ 1057.32 crore**

NLUP sum hmuhna hi Palnning Commission, Govt. of India atangin a ni.

- (b) NLUP pawisa bank-a dah zat hi ₹ 1050.91 crore a ni. A pung (interest) zawng zawng hi ₹ 6.29 crore a tling tawh a ni.
- (c) NLUP sum ₹ 437.43 crore K-Deposit-ah a awm mek.

**SPEAKER** : Zawhbelhna.

**Pu LALRUATKIMA** : Pu Speaker, ka lawm e. Kan Minister zahawm tak chhan atang khan NLUP inhnialna Plan sum a ni/ni lo tih chu a Chiang ta a, lawmawm ka ti khawp mai a. Planning Commission atanga hmuh a nih kha thu Chiang tak kan hre zui ta a. Plan sum a ni lo kan tih fo kha a lo ni reng a nih tak hi.

Tichuan, ka zawhna chu Pu Speaker, NLUP sum bank-a a pung kha ₹ 6.29 crore ti khan kan Minister zahawm tak khan a sawi a. Ka zawhna, July 8 a Er. Lalrinawma, kan MLA zahawm tak zawhna chhannaah hian 6.47 crore daih mai a pung a lo awm si a. A pung intam hleihna kha khawiah nge a tlak hniamna chhan, a bo tihna em ni? Assembly Question a ni a hei hi, hei ka lo hmu chiah lova, tukinah thianten minrawn pe a. Kan Minister- zahawm takina a sawi 6.29 a nih laiin bank-a pawisa dah pun tawh zat chu a ti a 6.74 crore ang vel khan arawn sawi a. Chu chu nakinah clarify turin ka'n ngen nghal ni sela.

Tin, ka zawhbelhna chu Pu Speaker, hei sawrkar hianin General Financial Rules te kan nei a, sorkar pawisa lak chhuah hi immediate disbursement atan chauh a ni, a nih loh chuan General Financial Rules thil tumte hi a kalh a ni a. Chuvang chuan, Finance-in a pek chhuah hnuah thuneitu kan ni tawh lo an ti a ni maithei a mahse NLUP hian Financial Rules hran kan nei em ni? A nih chuan Session chung hian kan Minister zahawm tak hian Financial Rules, hemi pawisa a pung kan dah theihna dan hi min pe thei em? Kan neih loh chuan General Financial Rules kalh hian sorkar hi eng vanga kal nge tih kha ka'n zawt tel duh a ni e. Ka lawm e.

\* Speech not corrected.

**SPEAKER** : Zawhbelhna dang, aw, Pu Lalrinawma.

**Er. LALRINAWMA** : Pu Speaker, ka lawm e. Hei sum kan harsa a, kan hriat angin NLUP sum interest kha a tam khawp mai a. Hei hi matching share-ah te hian a hman theih em tih ka'n zawt a ni e.

**SPEAKER** : A dang a awm em? A awm tawh loh chuan kan Minister zahawm takin chhang sela, a tawpna a ni ang.

**Pu R. LALZIRLIANA, MINISTER** : Pu Speaker, tuna NLUP-a a interest, pawisa bank-a daha interest hi an zawh hun a zirin a dang a dang thei a ni. Thlalehah pawh zawt sela, a dang leh maithei. Kan lo hmang ve tawh anga a hmanna turah khan. Chuvangin, a pung zela a thla a reiin a pung zel bawk a. (Pu LALRUATKIMA : Pu Speaker, a hniam zawnga pung kha a awm thei dawn em ni?) Kan lo hman tawh avangin a hniam lo thei lova (Pu LALRUATKIMA : A pung hrim hrim kha kan zawt a ni.) Kan chhanna chu a pung tuna awm hi kan chhanna a ni.



Nichina motor lei a tih pawh kha chawp leh chilhin House-ah thudik lo a rawn sawi zawk a, 67 kha a ni, kha kha belh leh sela a dik ang a, a hriatsual a nih kha. Chuvangin Pu Speaker, .....(PU LALRUATKIMA :68 a tih zawk avang khan 67 a an rawn report avang khan clarify turin ka'n ngen a ni.) 67 a ni tunah chuan.

Tin, Planning Commission atanga pawisa lo kal zawng zawng hi Plan Fund a ni chuang lo tih hi he House hian lo hria sela a lawmawm khawp ang. Tin, matching share-ah hian a tih theih dan a awm chuang lova. Kha kha tunah hian Chief Minister Special Scheme kan ti a, miharsa zual, NLUP-a han peka hman hleitheih tur chuang lo, serthlum phun theih chuang si lo, leilet siam theih chuang si lo, khatiang tan khanin cheng singhnih te a tul zualte kan pe thin a ni.

**Pu K. SANGTHUAMA** : Pu Speaker, nichin khan enge ni, puk theih lohna dan a awm chuang lo an tih ang bawh khan tunah pawh khan matching share-a tih nan khan a tih ve theih mai lo em ni?

**Pu R. LALZIRLIANA, MINISTER** : Pu Speaker, a tul chuan a tih theih a. Puk tir dan pawh a awm chuang lova, puk tir dan lo pawh a awm chuang lova. Amaherawhchu, State Level Committee-in lungrual taka an pass chuan engkim kha a tih theih mai a ni.

**Pu LALRUATKIMA** : Pu Speaker, khalaiah khan a sum pung zawng zawng kha kan zawt a, Assembly Question hmasa nen khanin a pung zawng zawng an zawh nen khanin tuna zawhna chhanna hi a hniam ta zawk tlat mai laia kha ...(SPEAKER : Office lamah in zawt mai dawn nia kha kha chu maw..) hman tawh kan zawt lova, pawisa pung tawh atangin engzat nge hman tawh kan zawt lo. He House zahawm takah hian a pung awm zat kan zawt mai a ni. General Financial Rules kalh hian....

\* Speech not corrected.

**Pu R. LALZIRLIANA, MINISTER** : Helaiah hian NLUP sum bank-ah engzat nge dah a nih a, engtik atang khan nge dah a nih tih a zawt a, engzat nge a pung a ti mai a ni. A pung zawng zawng kha a zawt lo reng reng.

**Pu LALRUATKIMA** : Interest kha a ni a, churang chuan a pung zawng zawng kha a ni mai, a chiang vek a ni. Khalai kha chu chhan pial ngawt chiah ka ngai lo..

\* Speech not corrected.

**Pu R. LALZIRLIANA, MINISTER** : A pung zawng zawng hi a thla a zirin a danglam a danglam dawn a ni.

**Pu LALRUATKIMA** : A thla a zirin a pung tam zawk dawn a ni. A tam tulh tulh ang.

\* Speech not corrected.

**Pu R. LALZIRLIANA, MINISTER** : Thlalehah pawh min zawt sela, tun thlaah hian a pun belh dawn a. Tin, kan lo hman tawh chuan a tlem leh thei a ni.

**Pu LALRUATKIMA** : July ni 8-a 6.74 crore a pun tawh chuan tuna 6.29 crore chauh kha a dik thei lo reng reng, a pung a hniam zawk a ni. 6.29 chauh pung kha a intam hleih lutuk. A pung zawng zawng kha calculation fuh lo lai kha a ni ka sawi.

\* Speech not corrected.

**Pu R. LALRINAWMA, DEPUTY SPEAKER** : July-a a rawn zawh laia sum awm zat atangin a pung an chhang a, tuna an zawh laia sum awm zat atangin a pung an chhang a. Chuvangin, a capital awm zat atanga interest kha chu danglam tur a ni.

**Er.LALRINAWMA** : Pu Speaker, thil pakhat, NLUP guideline a ni a, heti zata sum tam dah a nih laia sum control-na mumal lo lutuk awm hi a dik lo a ni. Chuvangin he lehkhabuah hian sum enkawlna tur dan ziah mumal a awm lova, NLUP implementing board hian a duh duh danin sum a khawhral mai dawn em ni? Chuvangin hei hi siamthat ni rawh se ka rawn ti a ni.

**SPEAKER** : Khatiang kha an chhang vek theilo. Nakinah discussion-ah i duh leh i la sawi teuh dawn nia.

**Pu LAL THANHAWLA, CHIEF MINISTER** : Pu Speaker NLUP lamah hian Apex Board a lal ber, hei hi member zawng zawngten an hriat a tha. Apex Board a lal ber, Chief Minister-in Cabinet Minister te leh mi pawimawh te, kohhran hruaitute leh mithiam bik te a dahna a ni a, chumi chuan a remtih chuan a ni thei a. Tin, society-ah sorkar sum hi a kal tawhin General Financial Rules-in a va control vek tawh lo. Chuvangin society kha a duh angin a hmang thei tawh a ni. An duh leh Bank-ah an dah ang a, an duh leh an dah lo ang a.

Bank a NLUP sum kan dah te hi a that zia chu, Kelkang harhna ropui tak thlenna hmuna harsatna thleng zawng zawng khi a pumin kan tuam hlawm vek a ni. Chuvangin a tha lam zawnga hman a ni tih hi hriat a tha a, thlarau thianghlim a zalen nan pawh NLUP sum hi hman zel a ni.

**Pu LALRUATKIMA** : Pu Speaker, kan House Leader zahawm tak kha a ding tawh nain General Financial Rules leh Central Government Accounts Receipt and Payment Rules kan nei a, chumi violation a kal kha a thiang dawn em maw ni le? tih kha ka sawi duh a ni.

\* Speech not corrected.

**SPEAKER** : Zawhna dangah kan kal tawh ang. Khati chuan inhnialna a chawktho mai mai. Zawhna 37-na Dr K. Beichhua'n han zawt se.

**Dr. K. BEICHHUA :** Pu Speaker, ka lawm e. School Education Department changtu Minister zahawm tak hnena ka zawhna chu-

- a) Saiha DEO tun hnaiah transfer a ni em?
- b) Transfer ni ta se a aiah tunge Saiha DEO tura dah an awm tawh em? tih kha ka zawhna a ni a. Pu Speaker, hei hi nimin lam khan Saiha lam ka va phone a, zawhna siam lai hi chuan DEO thar kan la nei lova , tunah chuan DEO thar kan nei tawh a. Chuvang chuan a changtu Minister hnenah lawmthu ka sawi a ni. Chuan ka zawhna hi chu paw i tih loh chuan chhan loh ni mai rawh se.

**SPEAKER :** Aw le, a lawmawm e, a lawmthu sawinaah ngai mai i la. Zawhna 37-naah kan kal ang a, Pu Pianmawia zawhna a ni a mahse Pu Zoram Sangliana a authorize a, a nin rawn zawt se.

**Pu P.CZORAM SANGLIANA :** Pu Speaker, Pu R.L Pianmawia zawhna a aiawha ka zawh tur Minister zahawm tak, Printing & Stationery Department changtuin a chhan tura a zawhna chu – Sorkar Department hrang hrangten an mamawh Printing & Stationery Department atangin an la vek tawh em? tih ka zawt e.

**SPEAKER :** Aw le, Minister zahawm tak chhang turin i sawm ang.

**Pu C.NGUNLIANCHUNGA, MINISTER :** Pu Speaker, Pu R.L.Pianmawia zawhna, starred question 37-na zawhna chhanna chu- La vek lo tih a ni e

**SPEAKER :** Zawhbelhna a awm em? Aw, Pu Zoram Sangliana leh Pu Ngurdingliana. ( Pu Lalrinliana Sailo : Zawhna a zawh belh theih loh). A chhang tawh a lawm. A chhan tawh hnuah zawhna a awm thei tawh lo a? Ngatinge zawhna chu a zawh belh theih loh ang le?

**Pu P.C. ZORAM SANGLIANA :** Pu Speaker, kan Rules and Procedure kha chuan min phal a nia. A chhangtu awm loha Minister ai a awh khan zawh belhna a awm thei lo a ni a. Rules and Procedure hi i zir ngun leh deuh ang u.

Chuvang chuan Pu Speaker, zawhbelhna chu la la lo Department te chu tute nge? tih leh session hmasa lamah te, hun hmasa lamah te pawh he House kaltlang ngei hian kan House Leader pawhin thupek House-ah a sawi chhuak thin a. Tin, Office Memorandum vawi engemaw zat zawmlo tun thlenga la awmte hi, House-ah hian an chungah action lak a ni ang, tiin min assure thei em?

**SPEAKER :** Chu chu duhtawk ang aw, a neitu a awmlo bawk a. Tuna a zawhna chiah chu chhang se.

**Pu C. NGUNLIANCHUNGA, MINISTER** : Pu Speaker, a zawhnaah khan, eng department te nge la lo, tih kha a ni a. A piah lamah, a late pawh hi chhan a tha lawm ni aw, ka ti a.

Kum kal ta 2014-2015 chhung khan department 38 in min dawr a. Chumi atang chuan ₹ 63,90,361 (Rupees sixty three lakh, ninety thousand, three hundred and sixty one) a ni. Min dawrtute hi department 38 an ni a. 2014 a min dawr lotu department te chu: -

1. Art & Culture Department
2. Sinlung Hills Development Council
3. Local Administration Department
4. Deputy Commissioner, Aizawl
5. Governor
6. Motor Accident Claim Tribunal
7. Legislative Assembly
8. Excise & Narcotics
9. Taxation Department
10. Mizoram State Information Commission
11. AH & Vety Department
12. Sericulture Department
13. Tourism Department
14. L & E Department
15. Agriculture Department
16. Planning Department te an ni.

Tichuan, 2015-2016 ah hian Department 29 in Printing & Stationery Department hi min dawr leh a, chuta tang chuan ₹ 26,54,977/- kan hmu a ni. Tichuan, 2015-2016 a min la dawrlote chu:-

1. Legislative Assembly
2. Excise & Narcotics Department
3. Taxation Department
4. MPSC
5. Mizoram State Information Commission
6. AH & Vety Department
7. Fisheries Department
8. Power & Electricity Department
9. Sericulture Department
10. Tourism Department
11. UD&PA
12. Minor Irrigation Department
13. I&PR
14. Labour & Employment Department
15. Agriculture Department
16. Horticulture Department
17. Planning Department te an ni.

Pu Speaker, nichina zawttuin a sawi ang khan, Sorkar Office Memorandum , 16.9.2014 bawhzuiin Luangmual Stationery Depot a stationery item tam lutuk chhiat hlauhawmte chu Department 15 min dawr tha lo bikte hnenah an item lak tur te, an lak zat tur te bituk a ni a. Heng Department 15 te hnen atangin item an lak zat tur bituk hi vawiin thlengin la lak zawh loh a la awm nual a. Department thenkhatin an tihthat viau laiin engmah la la lo Department te pawh an awm nghe nghe a ni. Heng Department 15 te hnenah hian stationery item an lak tur leh an lak zat tur bituk te pawh siamsak an ni a. Department 15 te item an lak tur bithliah sakte hnenah stationery depot atangin item lak tur leh an lak zat tur hriattirna lehkha wawi tamtak chhuah a ni tawh a. Ni 19. 9. 2014 ah khan hriattir an ni a. Tichuan, an lak that loh avangin ni 30.1.2015 ah khan reminder pek leh an ni a. Chuti pawh chuan an la bawhzui tha chuang lova. Ni 12.5.2015 ah khan reminder pek leh a ni a. Chu pawh chu a la hlawhtling chuang lo a ni. Ni 21.7.2015 ah reminder pek leh an ni a. Chuti pawh chuan a la ngai reng a. A hnuhnung berah hian ni 10.9.2015 ah khang ang item an lak turte kha hriat nawn tir an ni. Nikum October thla atang khan kan hnen atanga stationery item latute hi an office-ah theuh kan pe thei a ni. Door delivery a ni tawh a. Hei hi Department hrang hrangah hriattir an ni a. Tuna door delivery hi, item tlem lutuk a nih loh chuan, tam thamah chuan kalpui a ni. Chumi atan chuan motor pawh lei a ni a. Amaherawhchu, a hlawhtlinna kan hmu tam lutuk lo.

Vawiinah hian, Pu Speaker, a remchang a, hei Department Head-te pawh an tam a. He pawisa hi mimala lut a ni lova, sawrkar pawisa a ni a. Vawiina he kan question lo chhuah rual rual hian, hemi hnuah chuan Department tin ten ngaipawimawh ila. Chuti a nih loh chuan khu laia kan depot-ah khuan kan dah chhe mai mai dawn a. Chu chu sawrkar pawisa hekna a ni. Sum kan indaih loh viau laiin kan neih ang angte min chan sak a, hma min lakpui tur pawhin Pu Speaker, vawiina Department hrang hrang hotute ka sawm bawk a ni e. Ka lawm e.

**Pu T. SANGKUNGA** : Kan procedure-ah khan Minister concerned a awm chuan zawh belh i phal tho a ni a, zawhbelhna ka nei duh a. Reilote thla 4 emaw Printing & Stationery-ah hian, tlinglo takin, Secretary-ah khan ka awm a. Chutih chhung chuan Council of Minister remtihain Chief Secretary O.M Sign- ah meuh khan Printing & Stationery-ah vek sawrkar Department ten indent la tur tih a ni a. Tin, Treasury Officer pawhin hemi ti lo chu Bill Pass loh tur tih a ni a. A zawmlo chungah action lak tur a ni a, zawm lo chungah Disciplinary Action an la ta em le ? tih kha ka'n zawt duh a ni.

**SPEAKER** : Minister-in chhan chi a a ngaih chuan chhang sela, zawhna hun kha a tawp tawh a ni.

**Pu C. NGUNLIANCHUNGA, MINISTER** : Pu Speaker, Disciplinary Action la theitu kan nih loh avangin keini chuan kan la lo a ni.

**SPEAKER** : Starred question 38-naah i kal tawh mai ang u aw. Pu Lalrinawma, MLA zahawmtakin zawt se.

**Er. LALRINAWMA :** Pu Speaker, ka lawm e. Law & Judicial Department changtu Minister zahawmtak hnena ka starred question number 38-na chu – The Public Premises (Eviction of Unauthorised Occupants) Acts, 1971 hi Mizoramah hian adopt a ni tawh em? tih ka zawt e.

**SPEAKER :** Minister zahawmtak chhang turin i sawm ang.

**Pu LALSAWTA, MINISTER :** Pu Speaker, member zahawmtak Er. Lalrinawma zawhna chhanna chu — Adopt a ni lo, tih a ni e.

**SPEAKER :** Zawhbelhna, Er. Lalrinawma.

**Er. LALRINAWMA :** Pu Speaker, helai hi tlemte han sawi tel lawk ka duh a. Hei sawrkarin building-te, ramte leh hetiang angte kan han nei chho neuh neuh a. Tin, sawrkar hnathawkte leh MLA thlengte pawhin leh Minister thlengte pawh a ni ang chu, hetah quarter-te leh engemaw pekte kan lo ni a. Amaherawhchu, heng quarter-te leh thildang tamtakte pawh a ni ang, sawrkar hmunhma han luah talh te pawh hi thil awmthei zel a ni a. Khatiang khan, he dan hmanga, va tihfelna tur ni awm tak a ni a. Amaherawhchu, waviin thlenga hetiang anga la tih a ni lo hi a ngaih pawimawhawmin ka hria a. Han inhnawtchhuah dawn chuan Civil Suit emaw a lo ngai a, a rei ropui bawk si a. Tunah hian Estate Officer-te hi kan han nei ve a, hengte hi he dan tlawh chhan hna thawk tur hi an ni si a, he dan hmang hian. Chuvangchuan, Pu Speaker, Estate Officer-te hian tun dinhmunah eng hna nge an thawh thin tih leh eng tlawhchhanin nge an thawh dawn tih kha ka zawhbelhna a ni e.

**SPEAKER :** Minister zahawmtakin chhang se, a tawpna ni mai rawh se.

**Pu LALSAWTA, MINISTER :** Pu Speaker, zawhbelhna kha ‘The Public Premises (Eviction of Unauthorised Occupants) Acts, 1971 hi kan adopt lohna chhan chu adopt a ngai lo. India rama state pakhat kan ni a, a danah hian chiang takin ‘It extends to the whole of India’ a ti a, adopt a ngai lova.

He House remchang lain, District Council ‘hangover’ hi a rei khawp mai a. District Council kan nih lai khan Central Act-te hi District Council-ah kan hman ve duh chuan ‘adopt’ a ngai thin a, UT-ah te pawh khan a ngaih chang a awm a. Adopt hi a ngai lo a ni. ‘It extends to the whole of India’ tih a ni a. Amaherawhchu, he dan bik hi a central khawp mai a, MP-te central Officers-te an quarters atanga chhuak duh lo han inhnawhchhuah nan an hmang tlangpui a, 1971-ah. 1958 daiha dan siam a ni chungin, 1971-ah hian siamthar leh a ni a. A hma hian an challenge an challenge a, Court-ah te thu a kal a kal thin a. Ka chhanna chu, hengah hian, he dan leh dan tam tak , ‘It extends to the whole of India’ tih a nih hian chuan, state kan nih hian, min huam nghal vek a. Entirman, ‘The Right of Children to Free and Compulsory Education Act’ te hi keinin kan adopt a ngai lo, hman mai tur a ni. Tin, ‘The Motor Vehicles Act, 1988’ tihte, hengte pawh adopt a ngai lo,

kan hmang zel mai a ni. Chutiang chuanin kan hmang zel a. Hei hi kan adopt a ngai lo a, a hman a tul chuan hmang mai thei kan ni.

Tin, ‘Power to make rules’ ah hian state-te tihpual tur engmah a awm ve lova, central vek a nih avangin. Kan han examine thin a, “Hei chu keini tan chuanin tangkaina a nei lo a nih hi” kan ti a. Department chumi hmang pawimawhtuten min la rawn ‘approach’ lem lo bawk a, a tul chuan Law & Judicial Department kan awm reng bawk a, a tul ang ang a, kan thiam ang tawka thurawn leh hmalakpui turin kan inralring reng a, chutiang atan chuan an lo kal lem lo bawk a ni. Mahse, member zahawmtakin an han sawi takah khan khatiang thil harsatna nei kha Department an awm chuan Law & Judicial Department hian a tul ang anga lo pui turin, a tul pheii chuan dante pawh siamthar a ngaih chuan emaw, ‘amendment’-te emaw a tul chuan kan pui thei reng a ni tih kha, Pu Speaker, ka chhanna a ni e.

**Er. LALRINAWMA :** Ka zawhna kha, Estate Officer hote hi engtinge tuna an hnathawh dan hi tih kha ka zawt a ni e.

**SPEAKER :** Midang an awm lo bawk a, chhan sak mai rawh.

**Pu LALSAWTA, MINISTER :** He danah hian Pu Speaker, Estate Officer-te hi authorized an ni a. Mizoramah hian Estate Officer kan nei lova. Tin, a rules siamah hian Central rules vek a ni a, keini lampang hi min khawih lem loh avangin a tulna neitu Department-in hma an rawn lak chuan a tul angin kan ti thei anga, an rawn lak lem loh chuan Law Department lo bengvar vak kha kan tih tur ni berin kan hre lo a ni.

**Er. LALRINAWMA :** Pu Speaker, thil pakhat chauh khawngaihin PWD hian Estate Officer a nei ve a, hemi chungchangah hian an dinhmun hi a khirh khawpin ka hria. Chulai chu ka’n sawi chhuah chhan a ni e.

**SPEAKER :** Zawt leh tur hi Er. Lalrinawma tho a ni a. No.39-na zawt turin a ngai bawk kha din leh a ngai a ni. In vannei ngawt alawm.

**Er. LALRINAWMA :** Pu Speaker, ka lawm e. Information & Public Relation changtu kan House Leader zahawmtak hnena ka zawhna chu – Starred Question No.39-na :-

- (a) Kum 2013-2015 chhungin I&PR Department hnuaiah Lirthei engzatnge condemn a nih ?
- (b) Heng Condemned Vehicle-te hi Auction an ni em ?
- (c) Heng atang hian Department-in cheng engzatnge a hmuh ?

**SPEAKER :** A changtu, Chief Minister zahawmtak chhang turin i lo sawm ang.

**Pu LAL THANHAWLA, CHIEF MINISTER** : Pu Speaker, member zahawmtak Er. Lalrinawma zawhna 39-na chhanna chu –

- (a) Kum 2013-2015 chhungin Lirthei 4 (pali) Mizoram State Vehicle Condemnation Board Meeting dt.16.9.2013-in a condemn.
- (b) Ni e.
- (c) ₹ 2,32,700/- (Cheng nuai hnih singthum sanghnih za sarih) hmuh a ni. Treasury Challan No.23037 dt. 17.12.2013-in Treasury-ah Deposit a ni.
- (d)

**SPEAKER** : A neituin zawhbelhna siamin a bak pahnih in siam belh thei ang.

**Er. LALRINAWMA** : Pu Speaker, ka zawhbelhna chu heng condemned vehicle-te kum engzatnge kawl an nih, an minimum life time vehicle te kha ? pakhatnaah ka zawt a. Pahnihnaah Km. engzatnge an tlan? ka zawt bawk a ni e.

**SPEAKER** : Midang kan awm loh chuan a changtu Minister-in chhang sela, a tawpna a ni ang.

**Pu LAL THANHAWLA, CHIEF MINISTER** : Pu Speaker, ka peihsam loh avangin ka ennawn hman lova, hetiang hi ka ko thin a, fimkhur a ngaih avangin, mahse tun tumah hian ka ti lova. Hemi chhanna min rawn petute hi an efficient vak lo a niang a, khalam pang kan pek ngei ngei tur ang chi kha an rawn telh lova. Mahse ka chhan theih chin chu: -

Vehicle MZ-01-D2830 Gypsy - Market value	₹69,000/-
MZ-01-C1463 - Market value	₹50,600/-
MZ-01-C1464 - Market value	₹59,000/-
MZ-01-D2829 - Market value	₹62,200/-
Total -	₹2,32,700/- a ni.

Heng hi Mizoram Gazette 22.8.2001, Notified in Government of Mizoram Privatization of Vehicle Scheme, 2001 hnuai tih a ni a. Tin, Special Probation for effected Officers an tih a kha, Officer hengina a huamte hi a thlakna tur ang chiah hian duhsak an ni. Kha kha ka chhan theih tawk a ni mai.

**SPEAKER** : I duh tawk ang aw. A dawt leh hi Pu Rinawma bawk a ni a, nangma ta bawk a ni a, 40-na zawt turin i sawm leh ang.

**Er. LALRINAWMA** : Pu Speaker, ka lawm e. Agriculture Department changtu Minister zahawmtak hnena ka Starred Question No.40-na chu –

- (a) Tun dinhmunah Mizoramah Oil Palm Factory hmuh engzatah nge din a nih tawh ?
- (b) Heng Oil Palm Factory dintu Company-te hnenah hian subsidy cheng engzatnge pek an nih tawh ? A company hming leh an subsidy dawn zat nen ?
- (c) Tun dinhmunah Kolasib District leh Mamit District-ah hian Oil Palm chingtu mi engzatnge awm ?



- (d) Kolasib District leh Mamit District-a Oil Palm chinna hmun hi engtia zau nge a ni ?
- (e) Heng District pahniha Oil Palm te hi a thar vanglaiin ni khatah FFB's engzatnge beisei a nih ? tih ka zawt e.

**Pu R.LALZIRLIANA, MINISTER** : Pu Speaker, MLA zahawmtak, Er.Lalrinawma zawhna chhanna –

- (a) Tun dinhmunah Oil Palm Factory hi pakhat (1) Bukvannei, Kolasib District-ah din a ni tawh.
- (b) Oil Palm Factory dintu Company, Godrej Agrovat Ltd. Hnenah hian subsidy ₹ 250/- lakh pek a ni tawh.
- (c) Tun dinhmunah Kolasib District leh Mamit District-ah hian Oil Palm chingtu chhungkua 5197 an awm mek.
- (d) Nikum 2014 thlenga Kolasib District leh Mamit District-a Oil Palm chinna hmun zau zawng chu ram hectare 10,751 a ni a, kumin 2015 hian engemaw zat chin belh leh a ni.
- (e) Kolasib leh Mamit District-a Oil Palm te hi a thar vanglaiin ni khatah Oil Palm rah (FFBs) 187 qtls. vel an thar thei.

**SPEAKER** : Zawhbelhna.

**Er. LALRINAWMA** : Pu Speaker, ka zawhbelhna chu, tuna kan Oil Palm khawl bun, capacity chu, 5 metric ton per hour a ni a, nikhatah metric ton 120 vel bawr her thei tur a ni a. Chu chu engatinge Department lam hemi titute hian an bun theihna guideline-a a landan hian a bun theih hniam ber capacity five metric ton per hour” tih a nih a, a hniam thei ang ber hi bun niin a lang ta a. Hei hi engatinge a sang zawk bun a nih loh? Hengtiang harsatna ang chi Chhingchhipah Lakhuih chungchangah kan tawh tawh a. Tun dinhmunah pawh nikhatah metric ton 180 thar thei tura beisei a nih laiin, kan khawl hian nikhatah metric ton 120 a her dawn tihna a lo ni a; Darkar khatah metric ton 5 a her chuan chhangchhepa kan lo tawn tawh harsatna kha kan problem leh tho tur a nih avangin, metric ton 5 chauh lo deuh hi a tih theih lawm ni ? tih kha ka zawhbelhna a ni e.

**SPEAKER** : A changtu Minister zahawmtak chhang turin i lo sawm ang.

**Pu R.LALZIRLIANA, MINISTER** : Pu Speaker, tunah khuan kar khat her pawh hi a neih hleih theih rih lova, chuangin kumtluana her tur chuan kuthnathawktute kan tan a ngai viau a ni. Chuangin tun atan chuan a tawh rih a, khu chauh khu bun tur a ni lova, hmun dangah company pahnihin an la bun leh dawn a. Chung chu tunah hian hmalak mek a ni.

**SPEAKER** : Zawhna No.41-naah kan kal thei e. A neitu a awm loh avangin Pu Zoram Sangliana sawm ila, hetah chuan zawhbelhna a awm thei lovang tih kha kan hmanh ang chu.

**Pu P.C. ZORAM SANGLIANA** : Pu Speaker, zawhbelhna chu awm thei e, Minister-in a awm loh in Minister-ina aiawha chhang tur a dahah hian zawhbelhna a awm lo zawk niin ka hria, kan Danah khan.

Pu Speaker, Pu R.L.Pianmawia zawhna Starred Question No.41-na - Minister zahawmtak, Soil & Water Conservation Department chhangtu chhan tura zawhna chu – Soil & Water Conservation Department hian 7<sup>th</sup> Tuivawl A/C chhungah hmathar lakna tur ruahmanna a nei em ? tih a ni e.

**SPEAKER** : Minister zahawmtak, Pu Lalrinmawia Ralte i lo sawm ang.

**Pu LALRINMAWIA RALTE, MINISTER** : Pu Speaker, ka lawm e. Tuivawl bialtu zahawmtak Pu R.L.Pianmawia zawhna, MLA zahawmtak Kolasib bialtuin a rawn zawh sak Starred Question No.41-na chhanna chu :-

7<sup>th</sup> Tuivawl A/C chhungah hian kum 2015-16 atan RKVY Project “Ruangva Micro-Watershed Project Darlawn” hi proposed a ni a. State RKVY Nodal Department atangin Sectoral Allocation nghah mek a ni, tih a ni. Ka lawm e.

**SPEAKER** : Zawhbelhna, Pu Robiaka sawm ang.

**S P E A K E R** : A neituin han zawt ve sela chutah chuan i chhang dawn nia.

**Pu P.C. ZORAM SANGLIANA** : Pu Speaker, Minister zahawm tak rawn chhanah khan a zawh chin chiah a rawn chhan rual khan, a inbuatsaih tho ang tih ka ring a. Kolasib bial chauh ka sawi lovang a, District-ah te leh Mizoram hmun hrang hrangah tuna tana Soil & Water Conservation Department-in a hmalakna hi House min hrilh sela, chu chu a inbuatsaih tho ka ring a, a pawimawh zual ang chi hi. Hemi hi tun hunah hian a lo inbuatsaihah a tel lo a nih pawhin Pu Speaker, ziakin tun Session chhunga min pek theih chuan chu pawh chu lawmawm ka ti tho, chu chu ka'n zawh belh a ka ngen duh a ni.

**SPEAKER** : A ngen a ni maw ? A ngen a nih chu. Chhan tur i hria em ?

**Pu LALRINMAWIA RALTE, MINISTER** : Pu Speaker, ka lawm e. Dampa bialtu MLA- zahawm tak Pu Lalrobiaka zawhna kha - Nikuma kan Project-ah khan Chalkhan Project tih hi ka hmu lo tlat mai a, ka hriat ve chinah chuan. Tin, lehkha kha kan lo inrin lawk loh avangin ka'n chhang thei mai lova, a ang teuh deuh ber Changte tih hi chu ka hmu a, Chalkhan Project kha ka hmu mai lova, Pu Speaker, MLA zahawm tak khan min lo hrethiam sela. Chhanna Session chhung hian pek ka lo tum anga, a hnenah.

Tin, Kolasib bialtu MLA zahawm tak zawhna kha tunah hian kan RKVY Project 2015-16 atan hian Project 22 thehluh a ni a, mahse, a luh dan hi tlemin a chianguang lutuk lova, kan umzui kan umzui a. Engpawhnise, NODAL Department atangin thuchiang te han hria ila. Kum tharah hian kha Tuivawl bial te pawh kha tikhan kan han chhang a, a funding pattern a hi a danglam hlen dawn a nih hi chuan kan rawt ang ang leh kan siam ang hian kan kalpui thei angem tih pawh kan chiang chiah lo a ni. (SPEAKER : A tawp a, chhan zawh tir law law ang aw.) Pu Speaker, ka lawm e. Ruangva Micro Watershed Project Darlawnah khan cheng nuai 32,78,200 a ni a. Mahse, funding pattern kha 50:50 anih dawn chuan heng hi sectoral allocation chiang tak Nodal Department, Agriculture Department atanga kan hmuh hma chuan a chiang lo a ni.

Member zahawm tak Pu P.C. Zoram Sangliana zawhna kha tuna a lut chinah hi chuan kan ti ang e. Tuna kan han luh tir chhinah hi chuan, Aizawl District-ah 5, Serchhip District-ah 6, Champhai District-ah 2, Mamit District ah 4, Lunglei District-ah 3, Kolasib District-ah 1, Lawngtlai District-ah 1, a vaiin 22 hi a lut a. Amaherawhchu, hemi a luh dawn hian chiang deuhva he House zahawm taka ka sawi nghal duh a chu Administrative approval lak a ni lo a, chuvang chuan bih nawn leh ngaiin kan hria a. A tul angin kha kha chu kan hotute nen kan enzui ang, ka lawm e.

**SPEAKER** : Question hour a zova,

**Pu LALRUATKIMA** : Pu Speaker, khawngaihin helai business danga kan kal leh hmian Starred Question No. 33-na chungchangah khan kan Agriculture Minister zahawm tak khanin Motor lei zat, hman zat, pekchhuah zat chungchangah khan dawt sawiah min puh a, ka la na khawp mai a, ka privilege a khawih a. Chuvang chuan Translation Section-ah ka tlan chho va, record zawng zawng kan en vek a, chutah chuan Motor 65 pek chhuah a ni. 67 anin a rawn ti a, dawt sawiah min puh a, na ka ti khawp mai. Kan House, he House zahawm tak atang hian kha record kha dawtsawia min puhna kha paih sela. Kan Agriculture Minister zahawm tak khan 65 a ni, a sawi kha a ni, kan Minister zahawm tak hnena ka tih hi record ah kan han calculate leh thlap a, 65 chiah, ka sawi dik a ni. Chuvang chuan amah zawk khan thupha a chawi ngei hi ka phut tlat a ni, he House zahawm takah hian.

\* Speech not corrected.

**Pu R. LALZIRLIANA, MINISTER** : Pu Speaker, thupha ka chawi dawn lo. Helaia ka neihah hian a dik chiah a chuvangin thupha chawi a ngai lova, tin, 'dawt i sawi' ka ti lova, 'thudiklo i sawi a ni' ka ti. Chuvangin thudik lo a sawi avangin hei hi a dik lo a ni. Chuvangin ngaihdam dil a ngai miah lo.

**Pu LALRUATKIMA** : Pu Speaker, 65 chiah kha Department hrang hrangah sem darh a nih thu a sawi, a sawi lai ngei record kan han ngaihthla vek a, chutah chuan 65 pek

chhuah a ni, Department-ah, Chuvang chuan dawta min puhna kha na ka ti tlat a ni. Chuvangin Pu Speaker, kha kha chu dawt sawia min puhna kha, thudiklo sawia min puhna kha nawt reh leh rawh se. He House zahawm takah hianin. 65 a ti a, a dik zawk a kha he House zahawm tak hian thudik hre thei lo turin kan dawihzep dawn ami, Pu Speaker? Thudik chu thudik ni mai rawh se. 67 a ni lo, 65 a ni.

\* Speech not corrected.

**SPEAKER** : Thudik in tih a in ang lova.

**Pu LALRUATKIMA** : Pu Speaker, a sawi kha Computer-ah kan han ngaithla leh a, a eng ber hi nge thudik ni?

\* Speech not corrected.

**SPEAKER** : Thu tawh rawh le.

**Pu LALRUATKIMA** : Pu Speaker, a enge thudik ni ta ang le? He House zahawm tak hian kum khuain thudik a hre dawn lo em ni?

\* Speech not corrected.

**SPEAKER** : In thudik a inang lova, nakinah in fiah dawn nia.

**Pu LALRUATKIMA** : Pu Speaker, 65 chu thudik a ni. Hetah hian hei ama sawi ngei voice record-ah kan han ngaithla a,

\*Speech not corrected.

**SPEAKER** : Aw, Computer nen a inang lo alawm, engatinge chuti em em a i lak nat a?

**Pu LALRUATKIMA** : Pu Speaker, dawt sawiah min puh a, ka privilege a khawih a, a na alawm, ka privilege a khawih a ni. Chuvang chuanin 65 hi thudik a ni a, ama sawi ngei record ah kan han en, kan han ngaihthla thlap a ni.

\* Speech not corrected.

**SPEAKER** : Privilege a khawih lo, kha khan maw, in figure neih a inang lova, kha chu la na lutuk suh.

**Pu LALRUATKIMA** : Ama sawi ngei calculate ka ni. Khalaiah khan eng Department Motor ber nge a sawi sual kha sawi ve mai sela.

**SPEAKER** : Privilege a khawih chuan Privilege Committee-ah sawi ve mai sela.

**Pu LALRUATKIMA** : Thudik kha he House hian kan hre tur a ni.

\* Speech not corrected.

**SPEAKER** : Thu rawh le.

Vawiin hi Pu H. Zothangliana leh Pu R.L.Pianmawia ten tiktur dang an neih avangin House phalna an rawn dil a, kan phalsak a, Pu Hmingdailova kha nimirah kan sawi tawh a. Kha kha House-in min hriatpui ula a tha ang e.

Tin, kan hriat angin vawiin hi nidanga tihdan pangngai chuan Sorkar business ni a ni a, naktuk hi Private members' day a kan hman thin kha a ni a, amaherawhchu, sorkar lam pawimawhna tak kan neih avangin BAC hian thuneihna an nei bawk a, a ni thlak hi. Chuan BAC thukhawm khanin vawiin hi Private Members niah thlak zawk ila tih an rawt a. Chutiang chuan Bulletin pawh kha kan siam a, in lo hmuh vek ka ring a.

Vawiin hi Private members' day a kan lak dawn tak avangin Private member Resolution 5 lai kan nei a, chumi Resolution te chu tum inang a ni a, ballot a thum vawr a ni a, tahchuan Pu Vanlalzawma'n vanneihna a chang ta a, chu chu amah hi move turin kan sawm ang a. Midang Resolution nen a inang vek avangin midang zawng zawng aiah Pu Vanlalzawma move turin ilo sawm ang.

**Pu VANLALZAWMA** : Pu Speaker, ka lawm e. Vawiinah Private Resolution hun a ni a, tiang khan thu pawimawh deuh mai pakhat ngaihtuah ho atana han thehluk kan nei a. Kan ngaih pawimawh em avangin kan theh lut den den a. Pu Speaker, i dinglama mite hian min hlahthlem ni deuhin ka ngai a, engmah an theh lut lova, churang chuan helaiah thu pakhat a inang theuh kan thehluk kha a lo lang ta hlawm a. Chutih lai chuan ka vanneih nge ka vanduai pawh ka hre lova, a move turah khan ka lo lang a. Ka thiantie hian sawi sela, kei ai chuan an sawi thiam zawk awm mange aw ka ti a. Engpawhnisela, vanneihnaah kan ngai a nih chuan ka vannei a ni mai a, amaherawhchu, ka sawi thiam tawh dawn lo niin ka hria a, min lo hriatthiam deuh pawh ka'n duh a.

Tichuan kan Resolution atana kan han tih chu "UNO in tualto hnamte dikna chanvo a puanchhuahna 'UN Declaration on the Rights of Indigenous Peoples' a hlawhtlin thuai theihna turin theihtawp chhuaha hmalak ni rawh se." tih kha ka Resolution chu a ni a, he House zahawm tak hian min pawm pui ngei pawh ka'n beisei a, a chhut sual chu kan correct mai ang a. Engpawhnisela, he thil hi a wording han en pawh khan vague deuhva kan dahna chhan a awm a, sorkarin hma la rawh se ti ang u tih pawh hi kan ngaihtuahnaah a awm ngam chiah lova. A chhan chu Mizo zawng zawngte tana ngaihtuahna hman tur leh kan hmalakna tur thil a nih avangin tiang khan vague deuhvin kan han dah a ni tih ka han sawi duh a ni.

March thlaa he House-a Private Member Resolution, Pu T. Sangkunga Resolution kan passed tak te nen pawh khan ala inhnai tho mai a, 'Zofate inpumkhatna daltu chu engmah tih ni lo rawh se' tih te leh Pu R.L.Pianmawia, Member zahawm tak thu thehluh "Zohnathlakte kan inpumkhat leh zual nan sorkarin hma la rawh se" tih te nen pawh khan thu in zul tak ala nih dan a awm a. Chuvang chuan he Resolution hi a pawimawh khawp mai a, tuna han tih theih tam tak a awm lain kan hmuh ang leh kan beisei ang vut vutin a kal thei dawn lo tih kha a hriat a ni. Tin, helam buaipuitu em em mai Zoro lam ten theihtawp an chhuah a hma an la a, chutih lai chuan an hotupa ber mai leh helama min kai hruaitu ber Pu R.Thangmawia chatuan ram min lo pan san takah phei hi chuan helam thu hi a mipui zawng zawngin kan ngaihven zual emaw aw tih tur a ni a, tin, a pawimawhna a lo lang chho zela.

He 'UN Declaration on the Rights of Indigenous Peoples' tih lai tak hi kan hria ang a Member tam tak te chuan, 2007 September ah UN General Assembly in a pawm a ni a. Kha Indegenous Peoples a tih a kha ngaihtuah ngai deuh hlek pakhat chu, a duh duhina indegenous people kan ni alawm ti a an rights ang kha claim theih chiah lova, khami a zu lut tur khan beih fe hi a ngai a, Zoro lam unaute kha an kal thin a. 1999 ah khan darkar hnih uluk deuhva interview a neih hnuah keini Zohnathlak ho kha indigenous people-ah min admit ve thei ta chauh a ni.

He movement hrim hrim hi chu a intanna kha a rei tawh a, kum 1982 ah khan "Working Group on Indigenous Peoples' tih hi UN in alo siam tawh a, chutiang chuan hma la chho zelin 1993 kha 'Indigenous year' ah a lo puanga. Chumai chu duh tawk lovin 1994 atanga 2004 kum sawm chung kha 'Indigenous Decade' tiin UN khan alo puang chho va Chumi hmalakna kal zelah chuan kum 2007 September ni 13 ah khan he 'Rights of Indigenous Peoples' tih kha UN declaration-ah a lo lut chho ta a, General Assembly-in a lo pawm chho ta a ni.

Chutih lai chuan khata lut tur khan tih fe a ngai a tih kha kan sawi nawn leh duh a chu, hei tunah hian Nagaland pawh hian an beisei a, an la lut thei lo a ni. Tin, Burma ram Cochin ho pawh hian an kherh ngar ngar a, an la tel thei lo a ni indigenous group-ah khan. Vanneithlak deuh maiin keini kha kan lo tel thei hlauh a ni a. Khami tuma an passed tum khan UN Member 193 awm zingah 158 an kal a, chumi zingah chuan 144 in tha tiin an phar a, paliin an duh lova, tin, sawm an tualdawih a, a tha ti a phar zingah khan kan ram thenawm Myanmar leh China te pawh an tel a, Russia leh Bangladesh an tualdawih a. Chutih mek lai chuan a tha ti lo zinga a phar te pawh kha a hnu lawkah chuan a tha ti lamah khan an rawn inlet leh thuai a, chutiang anga resolution pawimawh tak a nih dan kha a awm a. Article 46 a awm a tah khan, waviinah kan chhiar vek a tul lo ang a, pawimawh deuh deuh a awm a, chu chu Mizote tan pawh hman ve theih tur a ni.

Kan hriat angin khawvel a inher a inher a, British ho leh French ho history kan en chuan khawvel ram hrang hrang awpin an vak darh a. Tichuan an ram awpte awmdan tur pawh ngaihtuah lutuk lovin keini Mizoram pawh Administrative Convenient an tih angah khan rin phel kan lo ni ta a, a then Burma ramah an awm a, India ram chhunga awm rau rau pawh a then Manipur-ah te Tripura-ah te, Mizoram te, tin, a then chu Bangladesh lamah te pawh kan lo awm a, khang zawng zawng kan lo awmna chhan pawh kha 'British Imperialism' an tihina rawn awp chhoh zel, khatia min kalsan leh hnu a tih khawm leh tak tak awm tawh lova darh deuh nuai hi kan ni a. Khami indigenous people-in a pawm, UN –in a pawm theih ang hi chuan hnam an nei tur a ni tih kha an condition pakhat a ni a.

Tin, tender an chhuah a crore tam tak man Zoram pawh hmu hlei lo ten an chhang a, an rawn thawk leh hlei thei si lova tih te pawh kha, kan dikna, kan chanvo hi India Sorkar hian a tak takah hian min hriatpui tawk lo a ni. Chutiang zel chuan Delhi tlang atangin ro an rel a, Mizote tana rem vak lo, tul lem lo te pawh hi a awm a. Chung zawng zawngah chuan he U.N Resolution tlawhchhan hian Delhi tlangah khuan na zawka kan zu sawi ve te pawh hi a ngaiin ka hria.

Kan ram kawng siam tha tur hian Mizoram Sorkar leh kan P.W.D te pawh an rintlak a, tender te pawh chhuah ve sela, engati nge khutlailah min tihsak daih, inrahbehna chikhat a ni lawm ni tih kha ka sawi duh a.

Chutiang zelin thil dang dangah te pawh, heng kan sum chang thlai thing Teak te pawh kan ching vak a, a hralh lamah kan buai leh em em a. Supreme Court ruling a awm an ti a, keini tan chuan kha kha a relevant vak loh dan te pawh a awm tho chung khan, kha khan min dal tlat a. Tin hmasawna lam hna kan han thawk ve dawn a, kawngpui kan lai dawn a, environmental clearance in nei em te min ti kawi a, chu chu Central atang khan min nawr beh dan hi a ni tlat a ni. Keini chuan a environment leh forest lam aiin kawngpui kan mamawh zawk a, forest chu kan ngah tawk a, a hring nuam tawk a, khatiang chite kha a la awm reng mai a ni.

Tin, tunhnaiah pawh kan hriat, ho te anga lang, mahse helaiah pawh min rawn zar pharhpui vak chu Motor-a sun control bel tih kha. An tih chhan han enin Delhi tlanga an mamawh a ni, Aizawlah hetiang thawm hi vawikhat mah kan la hre lo. Darthlang an bel dum a, a chhungah pawngsual leh sualna chi hrang hrang an ti thin tih avanga rel a ni a. Khatiang kha kan hre miah lo, mahse, helai thlengin an rawn pawt parh a, min tibuai em em a ni.

Pollution control-ah te pawh a ni zel. Industry-in a hual khup a an khawpuite, Motor a tam baw si a, an boruak a bawlhhlawh a, Motor zawng zawng check tur te min tihsak leh ringawt a. Heng zawng zawng pawh hi kan right, Mizote indigenous people kan nihna helaia kan mamawh nilo min rawn enforce-na a nih dan a awm a ni. Heng zawng zawngte pawh hi he U.N

Declaration hmang hian zu sawi ta ila, India pawh a pawmtu a ni bawh si a tih kha vawinah ngaihtuahna kan hman a thain ka hria a.

Tin, khami phenah khan thil dangte pawh han sawi zel ila. Nichina kan sawi zawk Zo hnahtlak inzawmkhawm zelna turte pawh kha ngaihtuahnaah a awm a. Kan House Leader, kan chief Minister zahawmtak hi Manipur-a a kala a thusawite, Zampui tlangdunga a thusawite pawh kan lo hre ve a, a thlamuan thlakin a lawmawm em em a ni.

Tunah hian thui zawk han ngaihtuah ta ila. India ram hi tun ang hian kan awm reng dawn em tih pawh ngaihtuah a ngai a ni. Kan inpumkhat reng dawn em tih pawh ngaihtuah a ngai. USSR kan tih pawh 1991-ah khan a phel tak tak mai a, a hma 1988/1989 ah te khan USSR hi a keh ang tih tuman an sawi thei lo. Mahse a keh takah chuan Independent Countries-ah an chhuak teuh mai a ni. Chutih mek laiin khatih laia lo inlakhran vena chang hrelo Czechnya chu kan hria, a hnuah a buaipui veleh, a theih tawh loh reng reng, Czechnya-ah chuan thisen a luan hnem zia te kha kan hria. Chung zawng zawngte pawh chu vawiinah hian kan ngaihtuah thlen a tulin ka hria a. He rights U.N in min han puansak tak tlawhchhan hian politically emaw Culturely a ni emaw hengte hi kan ngaihtuah a ngai a.

Tunlai hian thil vanneihthlak deuh mai awm chu, T.V-ah te kan en thin a, Korean film te leh film dang dang Mizo tawngin mawi deuhin an let a. Hmaniah pawh a titute ka zawt a, an hralh tamna ber chu Burma lam leh Manipur leh Tripura a Mizo unaute zingah a lut hnem em em a ni. Hengte hian tawngin min lo inzawmkhawm tir a lo ni a. Tharum thawh lam a ni lo, Tawng khatah khan min lo hruailut nasa em em mai a lo ni a.

**Pu VANLALZAWMA** : Tunhma deuha, kan nu leh pate hunlaia Chanchin Tha Dak an tih ai mah khan he thil hian a thawh hlawk a ni an ti a, khing kan chhehvel Zohnahthlakte zingah. Tin, Zo tawng thiam tha tawh lote zingah hengte pawh mi a suiikhawm tha em em mai a. Chutiang zel chuan he UN Declaration pawh hi ti ta ila, khati zawng khan hma te la ta ila Zoram inpumkhat nan.

Sawi ang khan India ram hi tun ang hian a kal reng lo mai thei. Nimpiniah lawka kan thu hriatte chu engnge ni? Bihar inthlanna a kan chak chuan bawng talh khap dan te kan siam ang tih a ni a. Hengte hi India ram inpumkhatna lam hawi a ni mang reng reng lo a ni. Chuvang chuan India ram hi engtiangin nge a kal zel dawn? Kum 10-ah nge, kum 50 kan la daih dawn em? Kum 100 dang kan la daih angem tih te pawh hi ngaihtuah a ngai a ni. Chung avang chuan heng resolution an lo tih te denchhen hian inpumkhatna lam hawi zawng hian, right kan neih ang hian, UN in min phal ang hian hma la ang u tih kha kan hotute ka ngen duhna pawh a ni a.

Tichuan hetianza kan tih chhoh hian, tuna tharum thawh a tih rum rum lam a ni lo. Amaherawhchu Cultural Unity kan tih ang te pawh ngaihtuah a ngai. Khati zawnga kan tikhawm



chhoh zel khan he ram hmalam penna tur hian a pawimawh dawn tih kha a hriat reng mai a. Tiang hian ram tam takah a lo awm tawh thin a.

International Boundary kan tih te pawh hi han sawikual ta hlek ila, Europe te kan en pheih chuan International Boundary an tih te pawh khu a dal tawh em em mai a ni, tunhma ang a ni tawh lo. Khawi ram Passport emaw, Visa emaw neih chuan a fankual vak theih a, common currency te an ti a. Khawvel inher zel han en hian tuna kan ramri ang chet chet hian kan kal reng lo thei a. Chumi hunah chuan Zohnahtlak ho mumal taka, khai aw ti a kan intihkhawm theihna tur hian hmalak a ngai a, kan la mek bawk a. Chumitihchak a nih theihna tur chuan he resolution hi kan han pulut a ni a.

Engpawhnisela, chi hrang hrangin a sawi theih ang a, sawi vek sen a ni lovang a tunah chuan. Kan hotuten in sawi thiam zawkin ka ring a. Chumi tur chuan waviinah ka resolution kha kan chhiar nawn leh ang a –

“UNO in tualto hnamte dikna chanvo a puanchhuahna ‘UN Declaration on the Rights of Indigenous Peoples’ a hlawhtlin thuai theihna turin theihtawp chhuaha hmalak ni rawh se” tih kha he House zahawm tak hian min pawmpui turin ka sawm a ni, ka lawm e.

**SPEAKER** : Awle, a neitu khan a move tawh a. Hei, khawvel pumpui khawih thil a ni a. Kan sawi duh theuh a rinawm a, minute 5 hunin pe ang aw mi pakhat tan? Minute 5 chhunga sawithiam kha thusawi thiam nihna a ni ve a ni.

**Dr.K.BEICHHUA** : Pu Speaker, minute 5 ringawt kha chu hetiang resolution pawimawhah chuan engmah kan sawi hman lovang a. Kan vaiin kan sawi kher nang, Pu Speaker, minute 10 khawngaihin.

**SPEAKER** : Minute 5 hi rei ve deuh a sin. A sawidan kha in thiam tho dawn alawm. Kan sawiduh vek dawn a, hei hi a pawimawh lutuk a. Chuvang chuan minute 5-ah khan inkhung ila a tha ang. Minute 10 chu a rei ang.

**Pu P.C.ZORAM SANGLIANA** : Pu Speaker, resolution pawimawh tak sawiho tur kan ni dawn a. Kan vaiin i sawi ang khan kan sawi duh ang tih a rinawm a. A hma pawha kan lo tih thin dan tlangpuiah kha chuan, sawilo te pawh an awm rualin, Minute 10 te chu heng ang resolution-ah te chuan member- te inpek hi kei chu awm ka ti khawp mai, kan rawt ve a ni e.

**SPEAKER** : Ding leh veia sawm in tih tlat chuan kan ti mai ang chu. A nih leh minute 10 ti ang aw? Mi pakhat tan minute 10. Tunge sawi hmasa ang le? Mover-in a rawn move tawh a, Pu R.Romawia.

**Pu R.ROMAWIA, MINISTER** : Pu Speaker, kan sawi hmasa ang a, amaherawh chu minute 10 aia tam pawh hun ka la mai thei a, min ngaihthiam ka duh a. Hemi Mizoram rorel khawl, hetilai hi India Constitution chhunga rinawmna thutiam veka India Constitution baka pen lo tura chhechham awm khawmte kan ni tih hi kan hriat fo hi a tulin ka hria a. Tin, chu mai piah lamah Zoram hi India ram bungkhat ala ni rih a. Kan ei kan in zawng zawng pawh hi kan puala Central lam atangte a minrawn pek a ni tih thleng pawh hian kan hriatte pawh hi a tulin ka hria a. Chutihlai erawh chuan siamtuin hnam anga min siamna kan theihngihl chuang tur ni lovin ka ngai a.

Tun tuma kan thu hi UNO lam deng deuh daih mai te a nih avang hian eng vak kan sukaw awm lo mange, tilaiah hian lo phar tlu vek pawh ni ila tih ka ngaihtuahnaah a awm deuh hlek a. Chuvangin kan dan 129-nain min phalsak ang hian resolution kha member-in a rawn move zawh tak hnuah hian hetilaiah hian amendment han siam ka duh a. India ramchhunga mite kan ni tih in hai lo chungin leh chutiang ngaihtuahna atangin. “ India sorkar ropui takin UNO in tualto hnamte chanvo a puanchhuahna “UN Declaration on the Rights of indigenous Peoples’ ti-hlawhtling zawnga hma alo lak thin tawhna hi lawmawm kan ti a, hmalak chhunzawm zel se kan ti”, ti te hian amendment siam mai ilangin. UNO lampang em em pawh zuk thlen a ngai lo va. Keinin thlen pawh tum ila kan thleng pha lo reng reng a. Government of India phalna a thleng tur kan ni tho tho a. Chuti laiah pawh chuan kum 2007 a hetilaia an sawiho lai te pawhin India chuan ngai a tih lohna chhan ni a lang a chu Article 46 lai awm pawh kha. India ram hi Pu Nehru a te, Pu Gandhi-a tena min lo enkawl chhoh lai daih atang tawh khan hnam tenau, sakhaw tenau humhalhna hi min lo pe tha em em mai a. Chuvangin tualto hnamte hi min lo theihngihl reng reng lo va. Mizo kan ni emaw, Khasi kan ni emaw, Garo kan ni emaw, India hmarchhak hote kha, Sixth Schedule kha min pe a, thuneihna tha tak kha.

Tin, chumai piah lamah India zau zawkah chuan Schedule Caste a ti a. Schedule Tribe te, Schedule Caste te khan keimahni hnam dan dah lal ve thei a, kan phak tawh anga rorelna khawl min siamsak a. Chungah te chuan Mizo fate ngat phei chu kan vannei em em mai a. District Council Assam-ah kan han awm a, Assam atangin UT-ah kan han chho a. Tin, tunah State puitlingah, thuneihna sang tak 371G-ah a bika inenkawlna han neite pawhin kan awm a. Tin, sumpaiah special category state angte pawhin siamin kan han awm a. Chuvang chuan vawiina kan dinhmun hi India ram hmun tam tak te tan pawh thik tham a ni a. Hmanniah khan Visakhapatnam-ah Pu Piana nen kan zuk kal ve a. Chutah pawh Visakhapatnam khawpui ringawt pawh kha mihring nuai 15 an ni a. Keini chu mihring nuai 11 ni manglo te kha dinhmun sang takah hian kan lo awm a. Heti khawp hian India sorkar hian indigenous mite hi, a tualto mite, ram leilung fate, hnam tenau zawk, chenbeh zawk te min lo enkawlnaah hian thahnem hi an lo ngai em em thin a. Chuvangin UN-ah pawh khan a hrang a hraia tih tur kha nei khan an inhre lem lo niin a lang a. India-ah chuan hemi indigenous people tih leh keini ho schedule caste, schedule tribe tih hi inangkhat vela an ngaih a ni hrim hrim a ni a. Chutianga kan hamthatna min petu a ni a.

Pu Speaker, tlemin han sawizau deuh ka duh a. Politic-ah hian full-stop a awm lo tih chu politic mi chuan kan hre vek tur a ni. Sawi zau lo ila, full-stop a awm lo. Inawp lohna atangin inawpnaah, Lal lal lai atangin District Council-ah, District Council atangin UT-ah, UT atangin State-ah. State atangin engnge kan hre lo, politic-ah full-stop a awmlo tih hi politician chuan hre vek ila. Tin, hnam tenau ten kawngzawh tur pahnih an nei. Lungawi taka an duhthu ngeia hnam lian zawka inchhunluh, hnam lian zinga lo tel ve tak mai, hnam lian lo nih ve tak mai. Mizo ni si a Israel nih chak tlat ang, Mizo nih a American nih chak tlat ang, hnama bona, saphunna, proselytism khatiang ang kha a awm a, hnam inlehna. Tin, hnambil anga hahthlak taka an nun khawchhuah nana bei fat fat, a tawpa hlawhtlin emaw ral der emaw. Chu chu hnam tenau te tawpna a ni ve vein ka hria a.

Tin, Mizo fate hi kan identity-ah kan chiang chiah em? India khua leh tui niin kan inngai em? Burma khua leh tui niin kan inngai em? Bangladesh khua leh tui niin kan inngai em? Kan identity-ah hian kan chiang em? Mahse, chutia kan chian loh lai chuan, kan interest-ah te hian kan chiang em? Thliarkar rilru kan put mek laiin Globalization uar takin kan sawi si em? Tribal benefit zawng zawng duh vek a, minority enkawlna zawng zawng duh vek a, chutih lai si a thuneihna lianpui, very special state nih tum tlatna te, kan interest te a inkalh em? A pechhuak tur thinlung pu tur awm taka kan lan laia diltu thinlung la put luh tlat tumna te. Hengah pawh hian kan inenchian ngei a tulin ka hria a. Tribal benefit zawng zawng kan duh laia Mizo Nation kan ni, Mizo Nationalist kan ni, hnam kan ni tihte hi. Tribal ni mek a, tribal benefit zawng zawng duh si a, Indai Sorkarin Mizo nationalist benefit min siamsak lo. Mizo tribal te schedule tribe benefit min siamsak a ni. Chutihlaia Mizo nation, Mizo nation tih tih kha. Mizo nation benefit tih hi India sorkarah khuan zuk dil chhin teh ang u, engnge kan an? Chutiang ang thleng pawh chuan ka ngaihtuahna a awm a. Tribal treatment kan beisei laiin thuneihna lianpui kan duh a. Chutihlaiah chuan a lehlamah heng globalization, hnamdangte nena tourism engkim engkim tihfin kan tih lai a, Inner line a bo ang, chutiang khatiang, inhumhalhna a bo ang, kan hnamzia a chhia ang tih leh tlat te. Kan interest te pawh hi a inkalh rem rum em tih hi wawiina heta rorel khawl amite ngei pawh hian kan inchhutna fo tur niin ka hria a.

Tin, kan ram roreltu hmasate khan thil an lo tvisual reng em, an miss step em? British Parliament-ina India independence Act a siam a puannaah khan a bung leh chang zawng zawngah khan Lushai Hills kha duhthlan theihna min pe reng em, Independent theihna min pe em? Crown Colony theihna min pe em? Kei chuan ka hmu miah lo. Amaherawhchu, chutih lai chuan wawiinah Mizo fatena khatih laia kan lungawilohna leh wawiin thleng pawha kan sawi fo, India independent lai khanin Maharaja te, Raja te ram awpho kha chu India a an tel vena tur khanin Instrument of Accession (inremna thuthlung) an ziah tir a. Chutianga Instrument of Accession kal tlang chuan India Union an lo tel a ni. Keini Excluded Area a 1935 dana excluded area kha, impartially excluded, totally Excluded Area-a dah theih keini te, Naga te kha, khati laiah khan kan duh thu sawina Zoram mipuite chance min pe em? Kan hotu accredited leader 50 tena kum sawm chhung atan

kan ennawn leh thei ang, chutiang chuan India chhungah kan lo lut ang, an tih kha min pawm sak ta mai em ni tih erawh chu questionable a ni. Chuvangin, Pu Laldenga chuan” in Constitution hman mekah hian kan duh dan pakhatmah kan sawi ve lova, chuvangin imposed Constitution a ni a, kan duh zawng kan sawi ve theihna min ziah luh sak ve a ngai ang a ti a, 370(G) hi min pe ta reng a ni. Chutiangin kan duh zawng kan sawi tawh a, kan awm a ni.

Tichuan, kan hotute khanin duhthlanna Sap ram Parliament-in min pe lo chiang tih an hria a. Tin, Pu Nehru-a pawn nasa tak khan min claim lo na a, khatianga British Parliament min awptu berina min handover nghal tak bawk si avang khan i he lovin min nei ta mai a. A then kan hnam pui chu Burmaah an handover leh mai a, chutiang chuan Pu Speaker, khawngaih takin min ngaidam rawh hun ka hman tam deuh pawhin. Chutiang ang chuan kan hnam kha kan kal a. Mahse, khatih laia kan hotute kha an step sual em? India ram an zawm hi, India ram bung khata an lo tel hi vawiinah kan faten tisial kan ti em? Kan ram hnuai lai, East Pakistan a la nih lai, khutih laia East Pakistan Rifles ho khan hnam tenau an tihduhdah zia kan zuk hmu a, chutiang ang chuan khawvel hmun hrang hrangah hian India ram tluka hman tenau leh sakhaw tenau te duat leh enkawl tha hi an awmlo a ni. America pawh an ni pha lovang, Australia phei chu an ni lo hle. Chutiang ang chuan hnam chaklo, hnam tenau heng ang hote enkawl naah hian India hi a lo tha em em mai a. Chuvangin, vawiinah hian Zo hnahtlakte zingah hian fa u ber chan kan chan theihna khawpa India sorkar thatna avanga Mizoram hi state puitlingte lo ni a, kan unaute zawng zawng, fa u ber chan changa koh khawm a tul ni pawha koh khawm theihna tur khawpa vawiina kan dinhmun min siamtu pawh hi a dik tak chuan India Sorkar a ni. Kan hotute khan India-a kan tih mai kha a tha a ni an lo tih kha an tisial lovin ka hria.

Chuvangin, Assam-ah Autonomous District Council atangin inrelbawl na kan nei chho va, chutah U.T. ah kan han chho a, state puitlingah kan han chho leh zel a, vawiinah te phei chuan kan thangtharte chuan india tawng pui hrang hrangte zingah hian Mizotawng hi tel ve rawh se te pawh an rawn ti tawh a ni. Chutiang chuan India neitu tak tak hi ni ve tawh ang u. Tunah India- in dotu a ban State 29 zinga 29-a pakhat kan lo ni tawh a, hei mai hi a tawh lo ve, India hnam dang pawhin Mizotawng hi zir ve sela, chutiang chuanin India tawng pui zingah Mizotawng pawh hi telh ve tawh ang u, an ti tawh mek zawk a ni a.

Chuvangin, kan chhohna zawng zawngte han ngaihtuah hian kan hotuten duhthlanna a tak, independent lo sual ngian ngiana hlawhchham tho si emaw, Burma zawm lo tih a Burmaa sipai sorkarna awp beh hrep kha, lo theih pawh ni tehreng se, Bangladesh emaw, East Pakistan emaw lo zawm ta zawk se, dinhmun chhe deuh a awm mai theite ngaihtuah lova Pathian hruaia an awm te kha a lawmawm a. Pastor Chhuahkhama'n, “Kan

duhthusam India rama min hruai lut hi kan lawm e” a ti e an ti a ( Pu Thangridema Ex-Speaker sawi ka hriat). Khatiang pawh kha a dik viau em tih te pawh kha ngaihtuah a ngai a. Kan hotute kha an lo la pen sual lo zel niin a lang a. Tin, an thlang dik thawkhat ve tho niin a lang a. India tluka minority te enkawl tha hi an awm loh avang hian heng indegeneous people te rights pawh hi India chuan a taka hmang reng an niin an inhria a. Kan House Leader-in a sawi fo thin angin India ramah kan awm a, kan nihna kan chian a tul a. Chuvangin, chanchintha hril tur pawhin India khua leh tui nihna nena kan beih pawh a tul thei.

Tin, chulovah Pu Speaker, tlemte ka’n sawi duham leh deuh ang a. Hei hi ka sawi khat khawp mai a, ka sawi hi a fuh ber ang nge fuh ber lovang tih pawh hi ka ngaihtuah khawp mai a. Mahse vawiinah hian ka sawi a tul deuh tlatin ka hria a. Ngaihdam ka tul chuan min ngaidam theitu zawng zawngin min ngaidam sela. MNF-in sorkar kan siam a, kan MLA thenkhat kha an lungawi ta lova. Pu Awia inah an inkulh a, keini kha Chief Minister Bungalow-ah Pu Denga hovin kan tikhawm a, khatah khan kan buai hle mai a. Independent atchilh ve tlat, rilrua nei ve reng thin ka nih avangin kan independent sual a tawp lo ti reng ka ni a. Mahse, khami zan khan chiang em em mai hianin ka rilrua thurawn sawitu awm ta tlat maiin ka hria a. Independent tlak kan lo la ni lo, independent tlak ni ila kan leader kha president ni sela. Kan leader beitu kha traitor-ah puh an ni ang a an thi vek ang, independent tlak kan lo la nih loh avangin. Pathianin Mizo fate min hmangaih loh vang pawh ni lovin kan thinlung lam leh kan ram a lo la inpeih loh em avangin India-a kan lo la awm rih hi a tul a nih hi tih ka rilruah arawn lang chiang em em mai a ni.

Chuvangin, independent kan sawi fo te pawh hi dik tak chuan hnam hi a puitlin a ngai hle a. India Parliament-ah vote khat leka Pu Vajpayee a tlin loh khan Pu Speaker, ‘vote tha leh ang’ a ti miah lo. Keini erawh chu inthlannaah kan han tling lo va, EVM vang a ni, chumi vang a ni, chumi vang a ni kan la ti tlat zel mai hi chuan independent chu kan la phalo a ni, tih hi ka rilruah a chiang em em a. Mipui sorkar kan la zo lo, President ni ila, army zawng zawng kan kut ni sela, opposition chu kan tirem duh vek hial ang kan hnam pui ngeite pawh. Chuvang chuan, kan hnam hian kawng zawh tur thui tak a la neiin ka hria a. Chu chu ka han sawi ta rawt rawt a, tu paw mah ka sawi loh ka beisei a, sawi pawh a hrehawm khawp mai. Democracy-ah kan la chiang lo, kan hnam rilruah kan la puitling lo, ei leh barah kan la intodelh lo, hnam tenau independent-a an chhuak ve ringawt hi chu foreign-in khelmualah an hmang a ni. Chuvangin, cold war khelmualah an hmang a, khawchhak lam, khawthlangin khelmualah an hmang a, uite insualtir ang maiin an tawk tarh an tawk tarh a, lehlamin lehlam an tan a, sorkarna ngelnghet an nei theilo reng reng. Hnam tenau, hnam intodelhlo lutuk independent nei ve te hi. Chung ang thleng te pawh chuan kan ngaihtuahna te pawh hi kan hman a tul hlein ka hria a. A hun takah chuan eng emaw hi chu a la awm mai thei e.

Engpawhnise, tunah hian India sorkar tha takin min la enkawl lai hian, India sawrkar ropui takin UNO -in tualto hnam te chanvo a puanchhuahna, UN Declaration on the Rights of Indigenous Peoples tihlawhtling zawnga hma a lak thin tawhna hi lawmawm kan ti a. UNO in a tih hma daihin Pu Nehru-a te, Pu Gandhi-a ten hma an lo la zel tawh a, wawiin thleng pawhin. A bik takin Pu Speaker, kan INC hotu ngat te chuan hetilaia ram lak, land acquisition chungchangah pawh mi harsa te te, thingtlanga lo nei mite an eizawna nuaibo hrehin chuvangin tunah Parliament -ah pawh member tlem tein tha an thawh tang tang a. Mi hausa ramah khang an eizawna ram te a tlukluh loh nan, khatiang ang khawp khan tan an la la zel a ni a. Tihlawhtling zawnga hmalak thin tawhna hi lawmawm kan ti a, hma lak chhuzawm zel se kan ti, ti ang hianin kan Resolution neitu hianin min pawm sak thei se. (**SPEAKER** : I sawi zo em?) Ka sawi zo tep a, chu chu ka pu, hetilaia kan Dan ang in ka rawn dil a nih chu, Dan 129 tlawhchhan hian. Ka lawm e.

**SPEAKER** : Mahse , Resolution kha Secretary hnenah a copy kha pek hmasak tur a nia.

**Pu R. ROMAWIA, MINISTER** : Mahse englo zawk a nia, hemi 129-na zawk hi ka rawn tanchhan a. “After a resolution has been moved any member may, subject to all the rules relating to resolutions, move an amendment to such resolution, a copy of which shall be given to the member moving the resolution” tih 129-na zawk hi, 130-na lo zawk hi ka han tanchhan deuh mawle, ka lawm e.

**SPEAKER** : Engpawhnise, a resolution hi Chair atang pawhin siamthat chu a ngai awm mange ka ti ve tho a. Chuvangin, tuna amendment an rawn rawt kha kan Dan 129-na emaw, 130-na emawah pawh khan Speaker thuneihna a awm a, khatiang ang khan kan pawm mai ang a, amendment form kha. A chhan chu UNO in tualto hnam te dikna chanvo a puanchhuahna hi Declaration on the Rights of Indigeneous Peoples, kan hriat angin people hi ‘s’ a inbelh tawh chuan nations tihna a ni daih tawh. Chuvangin, nations ho kha a ni dawn a, kha kha tualto hnamte dikna chanvo a puanchhuahna, tualto hnam te ti zawngin kan let a, lo dik ta pawh ni sela hnam tin a ni tawh a peoples te chu. Khami an declare a kha khawvel pumpui indigeneous mite tan a ni a.

Keinin va nawr dawn ta ila, hmalak ni sela tih pawh kha, hma kan lakna tur pawh kha UNO ah lo chuan hmalak ngaihna a awm lova. UNO chu keinin India Dan bawhchhe lova rorel tura chhechham tawh te hian kan ti pha bawk si lo. Chuvangin, kan tih theih tawk a chu, a tum hi a tha si, a pawimawh si hnam tan. Chuvang chuan nakin zela kan kal chhohna tur ngaihtuahin a pawimawh tlat si a, mahse a nihna ang hi chuan han ti dawn ila hmalak ngaihna a awm awm lo mange tih theih a ni a. Chuvangin, resolution neitu khan amended form hi a pawm thei mai lawm ni khawngaihin.

**Pu VANLALZAWMA** : Pu Speaker, kan han sawi khawm ang a, a boruak azirin kha tak kha chu a tawp a kan ngaihtuah tur a ni dawn lawm ni ? Pakhatin rawtna a rawn siam nghal a, midang sawi dan tur hi kan la hre bawk silova, hei chu a tawp lama sawi tur chi a ni lo maw Pu Speaker.

**S P E A K E R** : Anih leh kan Minister zahawm tak Pu Romawia khanin minutes 15 minute 5 in a pel a. Khai le sawiho i tan tawh ang, minute 10 ah khan in restrict tum ila a tha ange.

A eng ber hi nge kan sawiho dawn tih laia kha, kha kha in rilruah hre ran ula maw.

**Pu K. SANGTHUAMA** : Pu Speaker, ka lawm e. Kan sawi tur bera kha chu heta a resolution hi kan hriat dan zawng zawng leh kan duh dan zawnga sawi mai turah ka lo inngai a. Engpawhnise, a tha lo kan tih a, a tha zawk a awm a nih chuan rawtna chu a kal thei thova. Kha kha kan rual tlang a nih chuan a siam danglam theih thova. Chuvangin, khami zulzui khan Pu Speaker, kan han sawi phawt dawn a ni a.

Ka hma ami, kan Minister zahawm tak khan, thil thui tak a sawi a, vawiinah hian helaia kan thil sawi khawm tura hi independent emaw, Mizote hi independent ang u tihna lam a kawka a ni chuang lova. Heta tualto hnamte awmdan tur chungchanga UNO declaration-in a rawn tih hi bawhzui zel ila a tha lawm ni tihna kawng a ni a. Independent chu rei tak Mizoram in a sual tawh a, kum 20 lai, thi leh thau pawlhin silai nen. Chu chu tunah chuan independent kha thisen chhuah emaw, India sawrkar do zawng emawa kal leh kha Mizoram pawh hian a tum chiah a rinawm tawh lova. Amaherawhchu, chumi chhungah chuan India hnam zinga awm kan ni a, chuti laiah chuan UNO Declaration 46 chang a rawn siamah hian, hetilaiah hian chanvo nasa tak keini Mizote pawhin kan nei niin a lang a.

Tin, Mizo bakah hetiang ang people a tih indigeneous people ina an right a rawn sawiah hian chanvo tam tak keini Mizoram kan ni emaw India ram chauh pawh nilo, khawvel pumpui hian an nei niin a lang a. Chuvang chuan, keini pawhin tuna kan awmdan mai nilo deuh a, emaw India sawrkarte pawh hianin khatiang zawnga vawiin aia chak zawka hma la tur hian a pawimawh niin kan hria a. Chu chu vawiina an sawi khawm tur a ni a.

Kan Minister zahawm tak, ka hmaa rawn sawitu khan thil thui tak a sawi a, a dik khawp mai. Hnam hi a tet lutuk emaw, a retheih lutuk emaw chuan thil hrim hrim hi duh te pawh a te a, ngaihtuahna te pawh a te a, ropui te pawh a har a.

Tin, Mizo hi hnam upa lutuk kan la nilo hrim hrim a, kum za tam pawh kan la nih loh avang hian kan rilru te pawh hi engemaw chenah thui tak ngaihtuah theihna pawh hi kan la nei thei lo te pawh a ni maithei. Amaherawhchu, chutihlai karah erawh chuan Mizo hi hnam thanguang ve tak kan ni a. Tin, ngaihtuahna thui tak nei kan niin ka hria a, a chhan chu India pawh hi a independent-na kum 70 pawh ala ni lo a. India independent 1947 atanga kum 19-na chauhah Mizoram khan a hrangin awm ve mai ila tih ngaihtuahna kha a lo nei daih tawh a ni a. Chu chu nakum hian a kum 50-na March thla hian a lo ni leh der tawh mai a. Chutiang khawpa rilru advance Mizote hi kan lo ni daih mai a. Chuvangin vawiina kan awmdan hi a dik chiah chuan India hian min hmangaih khawp, hmangaih chu. Engkimah India sawrkar hi belh pawh a belhfakawm a. Khawvel democracy-ah hian India democracy hi a belhfakawm ber mai awm mange aw chu ka ti a ni.

Chuvangin, engkim erawh chu India sawrkar hian a ti thei bik lova, a tih theih tawkah chuan Mizote tan pawh a tha khawpin ka hria. Amaherawhchu, chutihlai karah chuan khawvel inher chho zelah hian ngaihtuah lawkna, rilrua lo inbuatsaih lawkna te kan neih hi a ngai fova, chuvangin, Mizote pawh hian vawin ang mai lo hian, hetiang anga hun a kal zel chuan kan mover-in a rawn sawi tawh ang deuh khan, khawvel hi a ngaiin a kal ngawr ngawr lova, India pawh hian ngaihdan hrang te, duhdan hrang te, tum hrang te, rorel dan kalphung hrang te pawh ala nei ve maithei a. Chuvang chuan chung hun atan pawh a tha taka engkim keini Mizote pawh hian kan lo inbuatsaih venaah hian rilru kan lo neih lawk pawh a ngai ve hrim hrim a.

Chuvangin, vawiina helaia kan sawiho hi India sawrkar huat zawng emaw, India duh loh zawng emaw sawi khawm tur emaw lam hawi a he resolution hi rawn putluh a ni hran chuang lova. Chuvang chuan Central sawrkar pawhin hei hi a huatthu leh a duh loh zawng va sawi tumna lam thil kha a nilo a ni tih kha kan hriat pawh a thain kan ring a.

Niminah kan House Leader zahawm takin thil thui tak te pawh a sawi tawh a kan hriat angin. Hei, Central sawrkar atanga direct a han inawp hrim hrim hi a ram State a chengte an duhdan te, an kalphung te, an awmdan te leh an ram leilung engkim hriatchian loh avanga harsatna tam tak kan tawh te pawh kan House Leader zahawm takin a sawi a. Kha pawh niminah a dikzia keipawhin ka rawn tawmpui a, a ngaihdan kha a dik chiahin ka hria, ka rawn ti nghe nghe a. Chuvangin, Central sawrkarte pawh hian tunah hian Mizoram thatna ber tura an ngaihtuahna hi thui tak an hman te pawh hi a ngai thei thui hlein ka hria a.

Niminah kawng chungchang, tender chungchang te kan House Leader zahawm takin a sawi a, a dik chiah a ni khang te kha. Chuvangin hetiang kawngah te pawh hian keimahnin kan



ram awmdan te, kan ram kalphungte kan hriat ang bawh hian Central sawrkar pawh hian a inrawlhna kawngah pawh hian zirchiang zawkin State sawrkar pawh hi rawnin, ti ti pui tamin, ngaihtuahna tam zawk te pawh hmang se. Heti laia tualto hnam ti mai ila, hnam changkang lo kan nihna ziaah chutiang te pawh chu a pawimawh em em a. Chuvangin, vawiina kan thil sawi khawm hi India sawrkar pawhin nguntaka a lo ngaihtuah theihna atana vawiinah hetiang House-a kan sawi khawm te pawh hi a pawimawh hlein ka hria a.

Chuvangin, UNO declaration a nihna anga India sawrkarin a theih tawp min chhuahpui chu a dik chiah mai a. Keimahni chuan, kan Speaker zahawm takin a rawn sawi ang deuha a pawng a taka zu nawr su su theih pawh a ni lo mai thei a. Nimahsela, chutih lai lai in kan ZORO te pawhin thui tak UNO hi an lo thleng thei a, keini ang rualin kan hriat phak loh leh kan ngaihtuah phak loh in ZORO te pawh hian a dik chiah chuan UNO kal khawmnaah tel ve an dil a, tichuan UNO ah an zu inziak lut a, an Session apiangin ZORO President Pu R.Thangmawia pawh kha a boral hma khan a zuk kal thin a. Thil thui tak an sawi thei a ni tih chu hetu laiah hian chiantak in an declaration atang leh 2007 a an inziah luh atang khan chiantak in kan hre thei ang a.

Chuvangin, keini helaia Assembly leh Mizo mipuite pawh hian ngaihdan thui tak helai atang hian min pe theiin kei pawhin ka hria a. Tunhmaa UNO kan ngaihdan te, UNO a hrang hlak a kan ngaihdan te emaw, UNO thil tih chungchang kan lo hriat loh tam tak kha tunah hian kan hre thar thei ta niin a lang a. Chuvangin, a pawng a tak a UNO a awm ze nei mang lo a tel tur ang a kan inngaih kha a lo ni lem lo a ni tih chu tunah hian chiang takin a hriat theih.

Kan Minister zahawm takin a sawi, independent chungchang ang chi kha chu vawiina he lai hian a tum ber hranpa a ni lem lo a. Vawiinah hian “Independent i sual leh ang u, independent lam i move leh ang u” tih lampang kha hei hian a kawh a ni hran chuang lo a. Pu Speaker, ZORO in an zu sawi ber pawh hi vawiinah hian independent hi min pe mai ula tih emaw Independent hian Mizoram kan la ( Speaker : I hun i hmang zo ) Pu Speaker, minute hnih khat lek kan sawi ve leh ang a mi lo ngaidam la, awm ang tihna ki niin a lang lo. Chuvang chuan, hetu lai ah hian ka zavaia kan tan rual hi a pawimawh em em a. Mizoramah hian hnam chi hrang hrang Mizo kan tihah hian tam tak kan awm a. Tichuan, India Independent khan Burma-ah a then, a then Tripura-ah, a then Assam ah, a then India ram khaw dang dangah min then darh vek a.

Chuvangin, hetiang keini Mizo inti ho zawng zawng kan fuankhawm leh theihna, hmun khata kan luan khawm leh theihna, hmun khata kan awm khawm leh theihna ki hi hetu lai hian a rawn tum ber a ni a. Chuvang chuan, kan House hian thahnemngai taka Mizote inpumkhat lehna, darh taka India kan independent –a kan inthendarh hi kan za vaia kan awm khawm leh theihna tura hma chak taka la thei tur hian keini he lai Assembly House a thu khawm hian kan pass mai hi a tha lawm ni. Hei hi tu tan mah a han huat chi emaw, India sawrkar laipui pawhin ngaihloh lam a han ngaih chi pawh niin a lang lo va. Chuvangin, kan Resolution hi kan la sawi khawm kan la

sawi khawm ang a, a tha zawk chu House in a hria a nih chuan, engpawhnise chuti laiah chuan, a thu ang ngau ngau hian kan ti dawn nge? kan ti dawn lo tih erawh chu House thu chu a la ni lo thei lo a. Chuvangin, hei hi pass ngei turin ka support ve a ni e. Ka lawm e.

**SPEAKER** : Aw le, midang tu nge sawi leh ang ? Sawi duh kan awm tawh lo em ni? Kan awm loh chuan kan buk tawh mai dawn a sin

A nih, a neitu Pu Vanlalzawma kha a ngaiah i la ding em? Vote kan la mai dawn a. Pu P.C. Zoram Sangliana.

**Pu P.C. ZORAM SANGLIANA** : Pu Speaker, vawiina member zahawm tak Aizawl West – III bialtu MLA, Pu Vanlalzawma resolution rawn putluh “ UNO-in tualto hnamte dikna chanvo a puanchhuahna ‘ UN Declaration on the Rights of Indigenous Peoples a hlawhtlin thuai theihna turin theihtawp chhuaha hmalak ni rawh se” tih a rawn pulut sawi ve theihna hun tha deuh mai ka nei hi ka lawm a. Kan hun kal tawh te leh record hrang hrangte kan en thin a, kan thutna a zir te leh kan thusawi theihna platform leh dawhkan a zira he hnam i ti mai ang ( hei hian Mizote min huap tel miau avangin ) kan sawi dan ki hi a dang zel mai dawn a niang aw tih te Resolution Bulettin House atanga min rawn pek khan ka rilruah a lo lang hmasa ber a.

Ka ngaihtuahna pakhat lehah chuan, nichina Parliamentary Affairs Minister zahawm takin a sawi ang khan, politics a full stop awm loh zia hi a rawn tilang riauin ka hria a, chungte kan chhut leh record hlui leh hemi kan Assembly Proceeding lo kal tawh te kan chhut kan chhut hian, House- a resolution kei tehluin ka sawi phak chu a ni lo mai thei na a, Resolution kan han putluh dawn hian, eng chin nge a nghawng dan tur tih laiah hian kan ngaihtuahna kan sen fo hi a van tul e aw, kan thutna i dinglamah emaw, i vei lamah emaw kan thu a nih pawh in tih te hi min ngaihtuaitir a ni.

House-ah hian Resolution engemawzat a lo lut tawh a, chutah chuan House pawna Zohnahthlakte ti zawng pawn sawi ila, chumi Mizo ti a kan han sawi, he hnahthlak ni a kan sawi zawng zawngte (House) an Jerusalem Mizoram, Aizawl khawpuia kan rorelna sangah hian Zohnahthlak zawng zawngte an himna tur te, Mizo hnam leh ramin mikhual a ngaih tlat te tel zawng ten kan Resolution hi kan pulut em tih te hi kan ngaihtuah a tulin ka hria a. Ka phak ang anga mithiamte leh a thei mite tanpuina zara Google a an han download te, thil hrang hrang atang a paper ka han zir vena atang pawhin Indigenous Tribe chungchanga he House a theihtawp chhuaha hmalak zel ni rawh se kan tih lai hian, tun hnai lawk lawka kan ram khawpui leh kan ram chhunga NGO pawl lian tak tak, Mizo hnamte min huap zo kalkhawmi an thurel te, an resolution te chanchinbu atanga kan lo chhiar thin te hian heng ho hian vawiinah hian Indigenous Tribe te tia UNO-in a ni emaw, India Constitution-in a ni emaw, Indigenous Tribe-a a lo puan zawng zawng huap a thahnemngai tak maia chung hamthatna thu pass a sawi tur hian min beisei ang em? tih te hi mipui aiawh a kan thutna hmunah hian ka ngaihtuah ve a ni.

Chuvang chuan hmuh tur tam tak a awm a record ah khan, tute nge indigenous tribe tiin. Chutah chuan definition kan tana tha tura kan hretthiam leh kan tan a tha a ni mai a. Vawiina mikhual ni a kan ngaih leh khua leh tui ni pawha kan ngaih loh te thleng ang hian ( kan tih chu a diklo mai thei a, thenkhatin an ngaih loh te pawh ti zawk ila. House chhunga tawngkam atan chuan a dik zawk ka ring a, Pu Speaker ) chung angte thleng chuan vawiina kan Resolution chuan hamthatnate hi a thunlut vek mai a ni. Chuta tana a rawn sawiah chuan ‘Schedule Tribe in India’ tih te kha han en ila, India Constitution han thlir leh ta ila, chung zawng zawngah chuan indigenous Tribe-a a pawm kha kan ni vek baw si a.

Chuvang chuan vawiinah hian Parliamentary Affairs Minister zahawm tak khan amended form khan kan dan bung leh chang tlawhchhanin a rawn thelut a. Tin, member zahawm takin a rawn moved tawhin member dang dangte paw in Buletin hi en ila, hei hi pawimawh tiin an rawn ti vek chung hian Pu Speaker, vawiina kei ka rilrua awm dan tak takah chuan a sawiho chinah hian duhtawk ila, a engti zawng pawn kal zel tur pawh khan kan Parliamentary Affairs Minister zahawm takin a rawn putlul ang pawh khan pass dawn ta ila, UNO zu be tur chuan i ho hian kan thleng tawi dawn ropui si a. Chung zawng zawngte ka ngaihtuah a, he kan hnam kan veina em em, Zohnahtlak, Mizo hnahtlak tinreng ten Jerusalem atana an ngaih, an khawpui, an ram, Manipur an intibuai a ni thei, Halflong tlangdung an intibuai a ni thei, khawchhak lamah a ni emaw, khawthlang lamah Zo hnahtlak vek, tute emaw fuihpawrh avanga an intibuai a ni thei a. Chung ho chuan helai hmun hi an rawn tlanchhiat nan ti ila, an himna atana an rawn hman thinah hian, chung mite nena inpumkhatna chu kan vei tak tak a ni kan rilruah hian, hei hi kan duh a ni tih he resolution kaltlang hian sawichhuah nan hmang ta ila.

Chumi kan sawi rual chuan a pass ang zawnga han ti tur chuan India sorkar hnena lawmthu zu sawina a ni tel phawt a, amended form-ah pawh khan a ni tho a. Heng zawng zawngte han ngaihtuah hian a origin-ah phei chuan keimahnin kan nawr tur awm ang hial te khan a lang a. Helai chungchangah hi chuan kan fimkhur a ngai lo maw aw? ka'n ti ve khanglang a nih chu, Pu Speaker. A chhan chu, ka ngaihtuah nasa a nizanah te pawh, central minister lo kal, minister zahawm takin chawhlui kilpui a tumnaah kan han tawiawm ve a. Chuta kan hawn hnuah pawh chuan dar 11 a ri tep tawh a, in kan thleng a. Ka document neih ang ang te kan thlir a, kan bih a, ka bih tui angreng phian mai a. Helai thlen hnuah te thleng pawh ka neih ang ang kan proceeding te pawh han la chhuakin, tunhma lokal tawh te pawh kan ti thin a. Helaiah hian inpui, Mizo hnahtlakte inpui atan chenna tlak, pawm tlakah kan lo din phawt zel hi thil pawimawh niin ka hria a. Chutilolo chuan khawilai kil atangin emaw a he hnam tana rawngbawltu inti ve, politic circle atangin a ni kher lo thei e. Eng eng emaw atanga rawngbawltute rilru te hi kan tina palh ang tih ka hlau a ni.

Tunah hian kan record hi han en ta ila, Pu Speaker, kan record neih hrang hrang hi han thlir ta ila. Mizo hnam kan han tihah hrim hrim pawh hian kan chhiarpui mila kan han intam chhawk hleih zia te hi, 1901 chhiarpui te, 1961 chhiarpui te, 1971, 1981 '81 chhiarpui chi hrang

hrangte han en ila, hnam chi hrang hrang kan han inpun hleih zia 1900, 1921 chhiarpuih te sing tel ni tawh, 1961 ah te a za tela tlathla leh, an boral ta vek em ni? Boral love, mahse engati nge an tlem tak? Chung zawng zawng leh kan chhehvel amite pawh hian he Mizoram, Mizo hnamin a, a hnam hminga ram a neihah hian an tel hian an lungawi tawk a ni tih hi chung chhiarpui a record han en te chuan a tilang hian ka hria a. Chungte a nih avang chuan Pu Speaker, lunglenthlak tak resolution han putluh a, han tih rual hian ka rilrua awm em .....

**SPEAKER** : I hun i hmang zo.

**Pu P.C. ZORAM SANGLIANA** : Minute 1 chauh aw, a conclusion chiahin. Chung ang zawng zawngte, ka ngaihtuah a, ka suangtuahna atang chuan a resolution lo luh dan ang ngawr ngawr hi chuan pass loh tha ka ti lehzual a. Tin, kan amended form a lokal ang kha chu khamiah kha chuan he hnam hian, he hnam aiawh a thute hian kan mi leh sate hmakhua, hamthat na, an himna kan ngaih pawimawh zia tihlanna alo ni lehzual a. Chumi ti thei tu UNO a a puan pawh puangtute, chumite hne ah ngei chuan kan awmna ram India sorkar hian min bawhzuisk rawh se, han tih kha chu ala him lehzual a. Chuvang chuan, Pu Speaker, a resolution neituin a rawn move ang ngawr ngawr ni lovin, kan pass dawn a nih pawhin Parliamentary Affairs minister zahawm tak in a amended form a a rawn tih ang kha kan pass dan tur a ni ang tih ka ring a. Chutiang tur chuan amended form a i dawhkanah pawh a rawn dah tawh ang khan kha kha ka rawn support a ni tih ka'n sawi ve duh a ni e. Ka lawm e.

**SPEAKER** : Khai le, midang tu nge sawi leh ang? Aw, Pu Sangzuala.

**Lt.Col. Z.S. ZUALA** : Pu Speaker, thusawi tur an awm dawn lo a nih ai chuan kan sawi ang e. Ka lawm e.

Hei tuna kan resolution an rawn putluh hi “UNO in tualto hnamte dikna chanvo a puanchhuahna ‘UN declaration on the Rights of Indigenous Peoples’ a tih hi hengte pawh hi keini ang chuan kan lo hre ve mai lova. Eng emaw ti kawng kawnga ka han hmuh ve dan chuan ‘declaration on the rights of indigenous peoples’ tihah hian, ‘group having as such of specific right base on their historical ties to particular territory and their cultural or historical distinctiveness from other population’, hemiin a tumah hian individual emaw, group emaw kha collective right of culture te a ni a. Kan culture hi min protect sak tur a ni a, tin, chutiang bawkin kan identity kha hemi hnuaiyah hian kan vawng thei tur a ni tih te a ni a. Tin, a language, kan language te pawh, tin, employment te pawh kha indigenous people tih lai a UN declaration ang hi chuan kan nei tur a ni. Health te, Education te, tin, keimahni own institution tih te. Heng hi han thlir han thlir hian Mizote hian a bik takin hetiang lampangah hian kan sorkar emaw, kan hotute central a ni emaw ang hian min deprive em? tih hi ngaihtuahna chu alo awm thei ta a. Entirnan, culture ti ta ila, kan culture te hi chu hei cultural minister te pawh kan nei a, central lampang pawh hian min hriatpui tha khawpin ka hria a. Tin, hman deuh lawk pawh khan Cheraw (bamboo dance ) ah te pawh Guinness book of

world kha kan siam kha a ni a, kan minister ho khan, chu kan cultural te hi chu min protect sak hlein a lang a.

Tin, employment hi han ti leh ta ila, India sorkar hian min duhsak khawp mai a. Central service-ah te pawh hian tribal concession te kan han nei a. Chung azarah chuan India rama a sorkar hnathawk, bureaucrat senior ber ber post te Mizo ngei ngei te pawhin kan chang a. Tin, defence lam ni se North-East tribal ten senior officer thleng thleng te an service thei tih te ka hmuh hian hengah hi chuan min deprive sak miah lo te pawh niin a lang a.

Tin, politic han sawi ila, entirnan, nimiran mai khan kan opposition leader khan a sawi a. India presidential foreign tour-ah te pawh an President dinglana thuin a sang ber dawttuah te pawh kan han thu thei a. Khatiang kawng zawnga ngaihtuah chuan UN declaration hi chuan min la huam a ni lawm ni ka ti. Tin, politics ni ta se, politics lamah te pawh hian min duhsak hle a. Minister te leh committee hrang hranga a hotuah te kan zuk hawl kim ve vek a. Tin, thil pakhat erawh chu keimahni vek chhungah hian buinate chu kan nei deuh pawh a ni mai thei a. Han sawi ta lawng lawng ila, North-East bik, entirnan, kan thalaite Delhi tlangah te engemaw tiin khuti laia lo insual buai emaw, intihbuai te a awm a, khangah te kha chuan enge khawtual intihbuaina a ni mai a. Government emaw, sorkar ang te hi chuan India sorkar hi chuan min duhsak a. Tin, a bik takin Nehru family-in thuneihna an chan chhung pheih hi chuan keini North East a tribal te leh a bik takin Mizo te, hei kan House Leader te nen an inhmelhrat thatna zarah pawh duhsakna nasa tak kan nei niin ka hria a, hei hi kan experience te pawh a lo ni a.

Tin, hei India ramah service in hmun hrang hrangah te kan kal a, tin, hnam chi hrang hrangte nen pawh kan lo in contact a, kan awm ho a, chungah te pawh chuan harsatna engmah kan nei lo a, keima personal experience bikah chuan. Hetiangte ka ngaihtuah hi chuan hemi declaration a tih ang zul zui tak hi chuan kan sawrkar pawh hian min enkawl tha hle a ni lawm maw ni chu aw ka ti a. Chuvangin nichina kan minister zahawm tak Pu Romawia'n a rawn suggest a, Resolution hi tihdanglam a rawt kha a pawmawm hlein ka hria. Tin, engemaw thil awm hleka tun hma buai lai atanga UNO tih reng ang chi ho kha chu a ni hleithei tawh bik lo a ni. Thutak hi kan hre ve thei tawh angreng hlawm si a, information te hi a chak si a, UNO thlawhtheihna lo beisei ve leh ringawt te kha, khang hun kha chu a kal tawh. Chuvangin hei kan resolution te pawh hi engemaw kawng zawng hi chuan hemi han tihdanglam te pawh hi accept ve mai se kan thiante hian tih ka han propose a ni e. A suggestion hi tiang hian kalpui ila a tha ang tih kha ka rawn sawi a ni e. Ka lawm e.

**SPEAKER** : Pu T.T. Zothansanga.

**Pu T.T.ZOTHANSANGA** : Pu Speaker, tawi te in rawn sawi ve ka duh a. Hei vawiin kan resolution hi a lawmawm angreng khawp mai a, 'Sanghar a bo a Hleimualrang a lal' tih ang deuhin a fawng chelh tak taktu MNF, 'Pathian leh kan ram tan,' ti tu te hei House-ah hian an awm ta lo a, a

thangthar deuh ho, vangvat la kai ngailo ten hetiang Resolution tha tak mai an rawn ti hi lawmawm ka ti khawp mai a. Kan hun hmasate ang kha chu ni sela a ramriah hian kan la buai mai awm mang e tih te ka ngaihtuah a ni.

Hei UNO tun hma atangin, ka hma amiin a rawn sawi ang khan alo ri tawh thin a, UNO han sawi hi chuan kan rilru hi a nui deuh mai thin a tun hma deuh kha chuan. Darkar 24 flag kan tar hman chuan tih te, UNO buhfai kan han tih te, UNO thlawhna flag var intarna, UNO thu chhuah Serte tlang thlang ram atang thlenga hrethei ang lai te kan ngaihtuah a. Vawiinah hian kan Resolution hi chu a puitling angreng khawpin ka hria. Amaherawhchu, ngun takin kan ngaihtuah kan ngaihtuah a, a thleng thui lo angreng khawp dawn hian ka hre bawk si a, chulai tak chu ka mangan rukna lai tak chu a ni.

Tun sawrkarah hian UNO a ri ta zauh zauh a, hei kan NLUP lam atang ten, ILO kan han tih te, FAO kan han tih ang te, hengte hi chu a changkang angreng khawp mai a, a lawmawm ka ti a. Tuna kan Resolution ang ngau ngau hi chuanin Rulpuihlim Cabinet meeting te, Sialsuk Parliament, Sialsuk Parliament te angah te kha chuan han rel se a tlang zawt mai tur hi a ni a. Amaherawhchu, tun dinhmunah chuan a tunlai tawh lo in ka hria a. 1986 ah India sawrkar nen kan hnam aiawhin inremna mumal tak kan neih tawh hnuah inlak hran duhna rilru ang hawi zawnga House a han sawi hi chu a rem em aw tih hi ka rilruah a rawn awm a ni. Sialsuk Parliament te han sawi takah chuan ka rilruah thil a awm a, Sialsuk Parliament chu ni ilang chuan Speaker pawh hi 'hmuipui' kha i ni dawn a, kan Deputy Speaker pawh hi 'hmuifangpu' kha I ni dawn a, khang te kha ka rilruah a awm mai mai a.

Heng kan Resolution rawn titute Party President ber hian, "Zalenna kan sualna chapter hi kan la close lo" tih te kha a sawi a sawi mai thin si a, 'Final na hi kan la thleng lo a, State-ah kan chawl rih dawn a ni,' tih te kha an tawngkam kha ala ni si a. Khatiang nena han ngaihbel khan vawiina kan thu pawh hi intelligent lam tan chuan rawn ngaihven tham hial a ni em aw tih ka ngaihtuah a. Mahse kan ngaihtuahnaah hi chuan i veilama mite pawh saw an rilru taka thil awmah hi chuan thil tha tak, Mizo hnam zawng zawng kan insuihhawm theihna hun dingdihlip a thlirtute an ni ve ang tih hi ka ring a ni.

Tuna kan boruak hi a tha khawp mai, India ram hnuaiia kan han awm danah hian. A dik tak chuan hemi kan tualto hnamten dikna chanvo kan han tih kan han tihah pawh hian self determination tih loh hi chu kan hmu deuh vek tawh hianin alang tlat a ni. Min lo hrethiam sela a move-tu khan, teak hralh chungchang han tih te, environmental clearance han tih te kha chu a ni em emin ka hre lo. Self determination kan duhna laiaah theihtawpin kan hotuten an lo bei tawh thin a, kan hlawhchham zo tawh a, tihngaihna kan hre tawh lo ti mai ang, tawng mawilo nilo sela. Khatiang kan nih tawh hnu khan khalam hawia agenda han neih leh thin hi a fel em maw ni aw ka ti a, kha kha ka rilruah a awm a.

Tin, independent rilru hi kan la pu tak tak a nih pawhin he House ah hi chuan sawichhuah hi rem lo turah kan ngai a ni tih kha ka'n sawi duh a. 'Insuihkhawm zai i rel ang u' tiin hmun tinah Zo hnam faten nghakhlel takin insuihkhawm rilru kan put suau suau lai a ni a, tuna an thurawn chheh pawh hi a mawi khawp mai a. Hemi indigenous people kan han tih hi khawvelah hian kan en chhin a, maktaduai 370 vel zet mai kan lo awm a. Hei, keini te kan lo awm ve a Mizo hnam te, nichin khan a move-tu khan a hresual em maw ni aw ka ti a, Naga ho pawh kha ka hmu a internet-ah chuan. Engpawhnisela, kaikuang puk chhah ang maiin kan hel kual lutuk mah mah a niang a, an rilru a an tum tak tak hi chu Zohnam insuihkhawm tho tho hi a ni ang tih hi ka rinpui a ni. Lungphur thleng tlang vel ang hianin an rawn hual zau deuh mai mai ni hian ka ngai a ni.

Chuvangchuan, kan tum thuhmun, kan ngaihdan thuhmun, inang mek a nih lai kara kan Parliamentary Affairs Minister zahawm takin a rawn rawtna ang chi kha a himin ka hria a, a rawtna ang kha India sawrkar ropui takin UNO in tualto hnamte a puanchhuahna, 'UN Declaration on Rights of Indigenous People tihlawhtling zawnga hma a lo lak tawh hi lawmawm kan ti a, hmalak chhunzawm zel ni se kan ti,' a rawn tih lai tak hi ka rawn thlawp a ni tih kha kan sawi duh a ni, ka lawm e.

**SPEAKER** : Sawi tur in awm tawh lo em ni? Aw Pu Rinawma.

**Er.LALRINAWMA** : Pu Speaker, hei vawiinah resolution tha tak mai kan sawi ho leh thei dawn a, a lawmawm hlein ka hria a. Chutihruah erawh chuan kha tlema han siam danglam rawt te pawh kan awm a, a lehlam zawnga ngaihtuah chuan thutna inan loh hian mahni irawm chhuak nilo tha han tih viau te pawh hi a har a a niang a. Engpawhnisela, thu tha tak ve ve chu a ni a, kan sawiho tlang zel turah ngai ta ila.

Hei UN declaration hi tiang thu tha tak mai UNO in tualto hnam te tana a lo puang chhuak hi a lawmawm ka ti a, 13<sup>th</sup> Sept 2007 ah puang chhuah alo ni tawh a, vawiinah pawh hei, Mizoram rorelna khawl sang berah te pawh sawihona hun te an awm te hi a lawmawm hlein ka hria a. Tun kan dinhmuna chuan a hma kan member zahawm tak tak ten an sawi ang khan thil tam tak hi chu kan hman mek a nihna lai te pawh a awm a, kan culture-ah te pawh zalenna te pawh kan nei a. Tin, thildang tam takah te pawh keimahni ram thilah te pawh thuneihna, rorelna khawl hran te pawh kan nei ve a, State ang chuan tiang chuanin thil hi a kal a. Amaherawhchu, hei article hrang hrangte ka han thlir hian kan ram dinhmun, tuna kan nih mek lai leh India sawrkar pawhin thil tam tak ka hma a member zahawm tak ten an lo sawi ang deuhin alo tih tawhna laiah chak leh zual zawka sawrkar laipui pawn ngaihtuahna tithar a hmalakna siam thar a, 'E, an House-ah meuh pawh an lo sawi a nih hi a,' tih tur khawpa vawiin kan harsatna tam tak te, sutkian alo nih theihna tur atan chuan vawiin a kan sawiho hrim hrim hi a thain ka hre hle mai a. Tin kawng hrang hranga han chhiar te pawhin sawrkar laipui pawhin kan ramah hna tam tak a rawn thawk a, state sawrkar rawn lemlo a han tih tlang ang chi te pawh a awm a. Tin article thenkhatah indona hmunah a hmang tur a ni lo tih te pawh a awm a; khangah te pawh kan ramah tunah hian khatiang buatsaihna deuh te

pawh kha a awm niin kan hria a, indona field ah te pawh thawh thutah chang ve mai thei te pawh kan ni a. Khatiang zawng zawng ngaihtuahna te han neih chuan, heng resolution a article an pek hrang hrangte hi vawiina kan nun khawchhuah zelna atan te, Indigenous people te hnena right alo pek te, kan neih mek te leh kan neih lehzel turah pawh hian a tihchak lehzuahna atana he resolution anrawn siam hi a pawimawh takmeuh meuhin ka hria a ni tih kha ka sawi duh a.

Tin kan ram sum leh paiah a harsa a; a lehlamah chuan 'self-determination' chungchangah khan kan hma member zahawm takte khan tikhan anrawn sawi a. Engpawh ni sela, kan pi leh pu kal ta te ti mai ila, kan hotu kal ta ten khati khan thu tlukna te lo siamin vawiinah kan hnam sipaite pawhin zalenna an lo sual nasa tawh a. Engpawh ni sela, thil pakhat langchiang ta em em awm erawh chu; thil zawng zawnga hlu ber kan ro bawm awmna, kan thil zawng zawng awmkhawmna, khawvel pawhin a siambelh theih tawh loh, kan ram ber mai hi India ramah a beh tawh tak si avangin thildang a aia hlu a awm tawh chuang lova. Vawiina thusawitu tam tak pawhin chutiang khatiangin central-in min chawmhlawm an ti a, inthlahrung lek lek aw te leh engemaw laiah kan han sawi thin lai te pawh hi; kan pek leh min pek te han khaikhin dawn chuan kan pek hi an duh fe zawk ang tih hi ka ring tlat a ni. Chuvang chuan kan pi leh pute atanga kan ram hi anmahni rambungah alo awm tawh si avangin UNO ina Indigenous People Right arawn tih a thil tam tak a ziah lai pawh hi a tihhlawhtlin lehzuahlah pawh khan a inthlahrunawm dawn em ni? Kan lo sawiho te pawh hi a tha viau lawm ni tih kha ka rilruah a awm a.

Hmanni lawk khan tun kan session a sawi tur resolution pakhatah khan Special Category chungchang te pawh kha thehluh a awm a; amaherawhchu a tlang ta lova, khang thleng te pawh khan a nghawng a ni. Ei leh bar zawna kawngah dikna chanvo kan nei kan ti a, amaherawhchu, kan ram ber mai, vawiinah hian central a kan hotute hnenah engtin nge kan zuk sawi ang, kan ram hetia India rambungah lut ta hi min thehchhuah leh ta ula, a dang min pe tawh suh u ti ila an duh miahin ka ring lo a ni. Chuvang chuan heng special category kan tih a resolution siam te kan putluh ang te pawh kha, he special category kan nihna anga thil kan zu demand te pawh hi inthlahrun lutuk turah ka ngai lova. Chutih rual erawh chuan kan ram hi tuman min siamsak dawn lova, keimahni ngei kan pen chhuah loh chuan tuman minrawn khawih sak dawn lova, kan inzirtir a ngai takmeuh meuhin ka hria a he ram hmangaih tur hian.

Tin, han sawi zau deuh ta ila a pehhel deuh em chu ka hre lova, school-ah te pawh hian naupangte hnenah sawrkar tana rinawm turin, he ram tana rinawm turin tih hi text book-ah te hian dah hial tlak a ni te hian ka hria a. Vawiina kan ram leh hnam a damlohna, kan project tam tak a hlawhtlin lohna bul pawh hi mipui leh sawrkar inkar fel loh vang; an inkar hi kan la dawhrem fel lovah kan ngai deuh a, chutiang te pawh chuan thil hi a kal deuhin ka hria a ni tih kha ka sawi duh a. Tin, hun lokal zel turah te pawh hian eng angin nge ka hmaa member-te sawi ang deuh hlek khan, kan awmdan tur hi kan hrelo a ni. Hun alo kal a, thil a inthlak a, politics-ah full-stop a awm lo ve an tih ang deuh khan thil hi a inthlak thut thut zel mai a.



Ram alo piang a, tunah hian keini, Mizo fate chu hmun hrang hrangah awp hranin kan awm a. Kan lo awm tawh a, Bangladesh-ah te, Burma-ah te, India ramah te min han thenhrang a, sapho in min kalsan laiin; chinfel leh awm si lovin tihian kan kal a. Keini India rama awm te chu a vannei ber kan ni awm mange tih turin ramdanga awm ai chuan kan dinhmun pawh a zia niin a lang a. Chutih rual chuan hun lokal turah hian he hnam hian a inbuatsaih ve hrim hrim chu a ngai a, thawh thut a thil thleng hi thil hi a buaithlak em em a ni. Chuvang chuan heng UNO-in a Indigenous People Rights a ti a, kan han sawiho a, India sawrkar pawhin a theih ang ang hma alo lak tawh te pawh a ni bawh ang a, lak loh te pawh ala awm ang a. Khatiang zawng zawng vawiina he ram rorelna khawl sang a sawichhuah a awm hi India sawrkar ngei pawhin he declaration hi alo bih ngun phah a, 'Mizoram ho, khilai indigenous people, UNO pawhin alo pawm tawh te khian hei an lo sawi bawh si a; engemaw inziak tehreng le tah hian le, in bihchiang teh ang u. He inziakah hian keini UNO member-te kan nihnaah pawh tihloh tur te pawh kan lo nei mai thei bawh a, i ennawn chiang leh teh ang u' tiin hma te pawh kha a la thar sawt maithei ang tih te pawh kha ka ring deuh a. Tawng pawng hlauh tur kha a ni lova.

Tin, a nihna takah chuan kan hnam sipaite khan hnam zalenna kha lo soal lo ta se chuan vawiina Mizo thalai tam tak sipaia lut te pawh hi an luh ka ring lo a ni. India sawrkarah khuan Prime Minister-ah thu ta ila, ka hna ve tura ka ngaih ve chu Mizofate hi sipaia tam deuh thun luh hi ka hna turah ka ngai a, inpumkhatna atan. Heta independence lo soal tawh hnamte kan nih avangin sipai a lak pawh kha thil tihnahawm tak a ni. Chuvangin vawin kan thalaite tam tak sipaia an lo luh theihna te pawh hi kan hnam sipaiten nunna chan huam a he ram atanga tal chhuah tuma an lo beih tawhna rah a ni kei chuan ka tilo theilo a ni tih kha ka'n sawi a. Chuvangin kan hnam sipaite hnathawhna te kha a ropui ka ti a, chutiang chuan vawinah thang leh tharte pawh hian an thisen zar, an nunna an lo hlan tawhna te kha a thlawn lovin kan lo tel zel dawn a ni tihte pawh kha kan rilruah awm se ka duh a. Chuvang chuan vawiina kan dinhmun indigenous people te right, vawiina ram rorelna khawl sang berin a sawi hian India sawrkar chu a tha zawngin a beng harh ang a. Nang leh kei vawiina sum leh paia kan harsatna zawng zawngte pawh hi hemi thuthlung kan lo sawi avang hian chinfelin vawiina 50/50 pattern tura kan kal kan buaipui em em te pawh hi a su danglam lovang tih hi tunge sawi thei tih hi vawinah hian ka sawi duh a ni. Chu chu Pu Speaker, ka sawi theih tawh ni teh se, ka lawm e.

**SPEAKER** : Awle, minute tlem te kan nei a a dang sawi leh nan. Sawi duh kan la awm em? Aw Pu Vena.

**Pu R. VANLALVENA** : Pu Speaker, ka lawm e. Ka duh tawh lek ang minute tlemte kha. Resolution tha tak a tak chang har tak a rawn lut a, amaherawhchu min deng khawp a. A kalphung hi chu tha viau mah se he House a lut atan chuan a fuh chiah em tih kha ka ngaihtuah a, kan Minister zahawm tak khan a siamrem dan tur a rawn siam hlauh kha a lawmawm ka ti a, tawi te tein a point lek lekin hun a tlem bawh a sawi ka tum ang.

Kan resolution move-tu zahawm tak khan Naga-ho kha UNO Indigenous Forum a lut lo ni khan a rawn sawi a, tun April thla pawh khan pali lai an la kalin ka hria a. Anni hi keini aiin an kal taima a, an kal zing a, kal pawh hi an tam thin a. Tin, Indigenous a zuk luh, UNO-a permanent member a awm hi thil har tak niin a lang lova, anni khuan pawm loh an nei lova. Indigenous te hi an lo thliar hrang lova, tumah hi indigenous in ni e tiin a puang lova. Miin indigenous ti a an insawi chuan forum an lo pe mai thin a, chu chu ka hriatdan zawk a ni a. Tunah hian keini Mizo ho hi chu kan vannei a, tihian zalen takin sawrkar tha tak hnuaiyah kan awm a. kan thlamuang lutuka kan harhvanglo te pawh ti ila a dikin ka ring a. UNO hianin khawvel ram hi block pasarih ah a then a, keini hi Asia Block kan ni a, Asia Block atangin aiawh mi tlem te an neih bakah mi pahnih an thlang thin a, chuta an thlan pakhat chu Philippines mi a ni a, pakhat zawk chu chakma, (Bangladesh atanga kal) a ni. A ngai ang anga pass chuan keini aiin Chakma-in an hlawkpui zawk ang tih ka hlau.

**SPEAKER** : La ding tho la, dar 1:00 a ri a, i sawi zawhtir law law ang u aw.

**Pu R. VANLALVENA** : Pu Speaker, ka lawm e. Tawng mawilo ni lo sela kan Chakma unaute a bik takin Bangladesh ram amite hi an dinhmun khu a hrehawm a, an hrehawm vang khuan an tuar a chhel in an hmalakna pawh hi a chak niin ka hria a, chu chu tuna an dinhmun a ni a. Tin, UN permanent Secretariat-a an Chief khu Chakma bawka ni, Chandra Roy Hendrickson a ni. Chuvang chuan helai kan resolution hi a ngai ang ang hian lo pass ta ila kan dinhmun hi a tihniai zawk mai awm mange, kan tan hian a tha lo zawk mai awm mange tih ka ngaihda a ni deuh a.

Tin, he resolution hi 2007-a UNO in a pawm daih tawh kha a ni a, a pawmtu ram hi ram 149 vel tunah phei chuan an ni tawh a, nichina kan move-tu in a rawn sawi ang khan, i veilam amite hi 2007-a an lo pawm daih tawh si hetiang resolution tha an tih em em hi engatinge an sorkar chung khan an lo putluh daih loh aw tih kha ka ngaihtuahnaah a awm deuh a ni. Chuvangin, Pu Speaker, kan hotuten hetiang hian i siamrem zawk ang ti a rawtna an rawn siam hi tha ka ti a, heti hi chuan a him a, a pawm nahawm zawkin ka hria, ka lawm e.

**SPEAKER** : Kan chawl rih dawn nge, enge House ngaihda ? Chawl rih ila dar 2:00 ah kan lut leh dawn nia.

### **2:00 P.M**

**DEPUTY SPEAKER** : Sawihona kan tan leh hmain thu lawmawm lo lam han puan lawk a ngai a, Pu L.C. Thanga zing dar 4:45 khan helai Assembly Secretary rei tak lo ni tawh zunthlum natnain a boral a. Helai Assembly Secretariat lo enkawl tawhtu anih avangin member-te hriatah a uiawm em a kan han hriattir a ni.

Sawihona kan chhonzawm ang a, chawhma lam khan member 7 in an sawi hman a, tunah sawihona kan chhonzawm leh ang a. Tunge han sawi leh ang le ?. Pu Lalthanliana.

**Pu LALTHANLIANA** : Pu Deputy Speaker, ka lawm e. Tawite han sawi ve ka duh deuh a, kha kan resolution chu chhiarchhuah ngai tawh lovin kan hriat tawh sa a ni a. Hemi chungchangah hian kan ngaihlath tam tawh viau na in thu bulbal leh hmanlai thil i ti mai ang tangkai tawh lo han ti mai ila, a ni chuang lo mai thei a, thawnthu ngaihnaawm tak tak te kan han ngaihlath a, kan tan chuan a bengvar thlak khawp mai a.

Ka rilru a thil lo awmdan te kan sawi ve duh chu, vawiina kan resolution puluttuin a rawn putlul chhan te ka ngaihtuahin kan phawk chhah mah mah em aw tih te ka ngaihtuah deuh hlek a. A nihna tak ah chuanin India ram sorkar hnuaiyah kan awm a, India ram sorkarin a min chawm te, ei leh bar turte min pe a, sum leh pai min pe te hi chu a tih ve tur rengah kei chuan ka ngai mai a. Helai ziaka lawmthu han sawite hi a tul pawh ka lo ti em em lova. Kan tih tur kan tih hian emaw midangin kan chungah an tih tur an tiha lawmthu sawi tehchiam pawh kha kan ba lutuk em ni aw tih te ka ngaihtuah a, chuangin tul ka ti lem lova. Amaherawhchu, helaia amended ang hian emaw nakinah kan pawm tlang a nih chuan, ka pawm thei lo chu a ni chuang lo a ni tih erawhchu ka'n sawi duh a. Kan fak khawp mai a, India ram hi minority-te ngaihsaktu ram , a ber kai a nih zia te pawh kan sawi a, a lawmawm ka ti a, kan vannei a ni mai a.

Ka rilru a awmdanah chuan India ram sorkarin hma la rawh se chak takin han tih hian keimahni Mizote UNO in dikna chanvo min pek te kan hriat hi a pawimawh a, engpawh la tawng thei kan ni a, nichina kan ngaihlathlak tak ang khan Independent em em a nih loh pawhin Berlin Wall te pawh a chim rup mai a, a chim dawn tih kha an hre lawk lo va, inralinna kha kan nei lova, ram te pawh a buai thut a, a buai dawn tih te pawh kan hre lawk chuang lova. Mahse chutiang lo thlang mai thei atan chuan keini hi kan lo inhlawmkhawm a, kan lo in unite tlat kha a tha lawm ni. Heng kan dikna te pawh hi kan inhriat thar leh hi a tha ang a. Chutiang atan chuan tan la thar ila, hma i la leh teh ang u, inhrilh hre deuh teh ang u. “Theihtawp chhuaha hmalak ni rawh se” tih kha a pawimawh chu a ni.

Hei Articles 26 (1)(2)(3) ah phei hi chuan kan ram luah lai leh a leilung hausakna an luahlum sa leh an ta sa te chungah chuan neitu nihna a nei a ni tih te a inziak a, tunah hian ONGC ten Oil te pawh an explore a, an ti nasa khawp mai a. Tuikhuahte pawh kan han ti ang a, thil chi hrang hrang kan ram leilung hausaknate hi kan la haichhuak zel dawn niin a lang a, Gas te pawh haichhuak turin hma kan la a, thil tam tak sawitur a awm a. Hetiangah te pawh hian neitu kan ni tih hi nimin lampanga , kan House Leader zahawmtakin a sawi tak te pawh tichaktu tur te pawhin keimahni hian

kan inhrilh hriat hrim hrim hi a tulin ka hria a. Hnam anga nghet taka kan lo din a, kan lo tan tlat theihna tur leh tihchhiat mai mai theih lova kan lo awmna tur te, tin, kan chanvo diktak huai taka kan claim theihna tur atan khan hengte hi kan tan chhan atan khan a va tha dawn em tih kha ka ngaihtuahnaah a awm a.

Kan ram leilung hausaknate pawh hi kan tan a nih theihna tur atana hmalakna kha hemiah hian a keng tel a. Kan chanvo diktak pek kan nih tawh sa kha a nihna anga neitu kan nihna anga humhalh a, a zar kan zo theihna tura hmalak kha a tulin ka hria a. Kan ta ni miah lo, Bawi chhuah hunlai pawh khan an ti thin a, Bawi chhuak ni tawh si, chhuah nih la inhre silo te kha an la awm thei a. Khatiang deuhhlekkhan Bawi chhuah ni reng si kha, chhandam ni reng si kha chhandam lohin ka la awm reng ang tih kha a hlauhawm a. Chutiang deuhhlekkhan kan ta ni reng si kha neitunilo anga kan lo awm si chuan kan rethei mai dawn a ni.

Chutiang ang chungchanga tan kan laka kan inhrilh hriat a, chak zawka kan ta tur te kan humhalh theihna tur atan te, chanvo tha zawk kan chan theihna tur atana hma kan lak zel theihna tur atan he resolution pawh hi a wording ngai ang hian a tawk mai lo em ni aw tih kha ka ngaihtuahnaah chuan a awm a. India ram han tih deuh kher kher te pawh kha a tul emawni le, kan nu leh kan pa te an ni tho a, hei hi chu thil awm tawh sa a ni a, lawmthu va sawi pawh kha a tul tehchiam em ni tih kha kei chu ka ngaihtuah a. Tin, hmalak ni rawh se han tih hian keimahni Mizo zawk hi ka ngaihtuahnaah chuan a lian a ni. Chungte chu kan sawi duh a. Thil tam tak sawi tur chu a awm nain khalai kha ka rilruah a lian deuh a, ka'n sawi ve a ni e, ka lawm e.

**DEPUTY SPEAKER** : Hun i hmang thiam hle mai. Tunge sawi leh ang le? Pu John Siamkunga.

**Pu JOHN SIAMKUNGA** : Pu Deputy Speaker, hei vawiina kan Resolution sawi khawm hi a forum a ni em aw tih te ka ngaihtuah a. UN Resolution thil helaia lo sawi tak vak mai hi a dangdai ve a. Hei kan hriat atana pawimawh em em chu kan Right, heng Indigenous people te hian right kan nei e, kan awmna kan lo pianchhuahna ram, kan tobul te awmna ramah hian Right kan nei, i chu kan right chu kan han claimed hlawm a ni a.

Hei hian Independent thil emaw, mahnia rorel lampang emaw UN Resolution-ah hi chuan a lang tlat lo a ni. UN Resolution-in a tihdanah chuan heng ram ten emaw an lo lak, an lo hnehchhuh, an lo awpbeh zui khami hnuaia hrehawm taka awmzui, nasa taka tuar te, Education lamah a ni emaw, Economics thilah emaw an zalenna hupbeh tlata awm te kha hruaichhuah duhna a ni a. Chumi a nih avang chuan Indigenous people ti a zuk claimed te hian hrehawm tuar reng reng awm nia hriat an nih chuan UN-ah hian

recognized thin an ni. Chumi a nih avang chuan Spanish hovin an run te, an awpbbeh tlat thin te, British hovin an run, an duh vang reng ni lova an awpbbeh tlat thin te, Portuguese ho in an run an duh vang reng ni lova an awpbbeh tlat, sal ang tluka an lo sawp thin hote khan Right an nei a ni tih kha UNO hian hrilh a duh thin a.

Chutiang deuh chuan, mi an dikna chanvo enjoy thei reng reng lova awmte kha UN hian a ngaihsak a ni tih kha a hriat a. Chuvangin, United Nations Declaration on Rights of Indigenous People, 13 September, 2007 ah hian, UN Headquarters New York-a an pass tum pawh khan UN chuan heti hian a hrilhfiah nghe nghe a ni, “An important standard for the treatment of indigenous people that will undoubtedly be significant tool towards eliminating human rights violations against the planet’s 370 million indigenous people and assisting them in combating discrimination and marginalisation” tiin chiang deuhin a lo hrilhfiah a ni. Khami a nih avang khan thil hi a ni lo zawnga kan lak hian thil a pawi thei a. Thuk zawka kan zira thuk zawka kan chian hi a pawimawh a ni. UNO-in chutiang khatieng chuan a ti a, chumi a nih avang chuan independent hi kan thei a ni tih zawnga inzirtirte hi hei hian a kawkw reng reng lo tih kha kan hriat a tha a.

Chuvangin, India ramah pawh hian indigenous people kan tih hi an tam em em mai a, a vai hian ka’n chhiar a 29 lai kan ni. Chung mite chuan UN-ah hian an rights chu an claim ve char char reng tho a ni. Amaherawhchu, heng kan rights kan claim kan tih hian awpbbeh, oppressed kan nih leh nih loh te hi ngaihtuah tel a ngai thin a. Keini India Union hnuaiyah chuan chutieng anga na taka awpbbeh emaw kan rights enjoy thei reng reng lova hual tlat hi kan awmin a lang lova. Tunah pawh hian Pu Deputy Speaker, i phalnain heng Adivasi te, Munda hnam Chhota Nagpur a mi te, Kharia te, Korku te, Juang people te, Santal kan tih te, Sora people te, Badaga Tamil Nadu ami te, an tam khawp mai, an vai hian 29 an ni a.

Hetilaiah hian keini Mizo pawh kan chuang a, Mizo people, Mizoram tiin kan chuang a, Naga ho hi Nagaland tiin. Khatieng khan state hran hrana mite hian keimahni chhungah, keini hi ethnic identity hran nei kan ni ti hian kan lo claim ve vek a ni. Chumi a nih avang chuan heng a dang dang hote nen hian danglamna kan awm chuang reng reng lo, UNO hnuaiyah hian. State hran hrana heng hnam hrang hrang indigenous people kan tihte ho nen hian, heng Khasi and Jaintia pawh Meghalaya a awm an ni a, Karbi hnam pawh Karbi Anglong a awm an lo ni a, Irula hnam te Tamil Nadu-ah, khatieng zel khan hnam hrang hrangho hian anmahni chanvo hi an lo bei ve thin a, chung zinga pakhat chu kan ni ve a ni.

Mizote hi tunhmaa Chhinlung chhuak, chumi atanga khawthlanga lo tla thla, lungleng taka u leh naute lo inthendarh ta kan nih avang hian hetiang thil a lo thlen takah hian lak vung pawh hi a awm ve reng a. Amaherawhchu, kan lak vung dan erawh chu kan thiam a pawimawh takzet a ni. Chumi a nih loh chuan a ni lo zawnga kal hi thil hlauhawm tak a ni tih kha kan hriat a pawimawh a. Tin, hemi United Nations Declaration on Rights of Indigenous People vek hian hetiang hian a han sawifiah leh a, “It is not a legally binding instrument under international

law” a ti nghe nghe a ni. Khami a nih avang khan a beih chu kan beih a ngai hle tih erawh chu a hriat a ni. Hetilaiah hian heti hian a rawn sawi chho leh a, Pu Deputy Speaker, i phalnain, “Indigenous historical grievances, temporary challenges, socio-economic, political and cultural aspirations is a culmination of generation’s long efforts by indigenous organisations to get international attention.” tiin. Chuvangin, khawilai ramah awp beh emaw hrehawm taka hrual an awm a nih erawh kha chuan UNO hian kha kha a ti thei lo a ni tih kha kan hriat a pawimawh takzet a ni tih kha ka’n sawi duh a.

Tin, nichinah i veilama miten rambuai kan ni hi sipaiah te pawh min lak tam phah a tih kha, khatiang anga thalaiten an lo ngai dawn a nih chuan a pawiin ka hria a. Helai rorelna sang berah hian thu kan sawi dawn hian zir hmasa deuh hlek ila thain ka hria a. A chhan chu kan thalai rualte vawiina lo ngaitlalten thudik an hriat loh chuan ni lo zawnga chak taka kal theih thin a ni. Rambuai avang khan sipaiah hian kan chanvo kan chang lo zawk a ni. Army-a kan luh theihna tur chance te kha keimahni vekin kan dang bet a, za zela 20 kan chan ve tur te kha kan chang thei lo zawk a ni. Rambuai kha lo ni lo ila chuan, sipaiah hian kan inhnim lut tam ve khawp ang. Chu chu kan dinhmun zawk a ni a, rambuai kan han nih tak avang khan sipaiah min la tha duh lova, enthlatuah te kan awm ang tih an hlauh zawk avang khan kan chanvo kha kan chang thei lo zawk a ni tih kha kan hriat a thain ka hria. Tin, kan ram kha lo buai lo ta se ti zawng hian kan ngaihtuah ve fo pawh hi a ngai.

Kan ram buai avangin sap missionary-ten min chhuahsan vek a, sap missionary-ten rinawmna te, dikna te min zirtir te kha vawiin thleng hian la vul chho ni se Zonun hi a mawi ngawt ang. Dikna leh hun vawn dik te thleng khan entawntlak an ni sap missionary-ten an hrualte zawng zawng kha.

Mizote hi mahni intodelh tum rana khawsa vek, chhungtin kha kan ni a, ei leh barah intodelh kan duh vek a ni, mi ban kan hreh. Chumi a nih avang chuan thlam bulah mai pawh ni lovin kan lovah thlai chi hrang hrang kan ching vek a ni, variety takin kan kalpui vek, midang pawt lo, midang ban lova awm kan tum vek. Mahni intodelh tura chhungtin kha kal ngar ngar kan ni a. Chutiang chuan vawiin thleng hian la kal se NLUP te hi a hlawhtling tha ngawt ang. Intodelh tum, nun khawchhuah tum, mahni kut leh ke ngeia thawh chhuah rah ei duh kha kan ni thin a ni. Mahse, ram a lo buai a 1967-ah khaw khawm a lo ni a, inhmelhriat lo tak tak, background hran tak tak kan han awmkhawm ta nulh a, tumah hnathawk thei kan awm lova, min khung khawm a, rambuai vangin. Khaw khatah khaw tam tak an han khung khawm a, khaw nga khaw ruk, khaw sarieh te an khung khawm a. Chu chuan sualna a rawn tipunlun ta a, rukruk te, dik lohna tam tak kha a rawn lut ta a ni. Kan nun chu suar angin a lo chim ta a, Pu Rokunga hlain a ti mathlawn lovin. Nun suar ang a chim ta. Chumi a nih avang chuan Zoram mipuite nun leh zia, kan moral zawng zawng kha a lo chhe ta vek a nih kha. Vawiinah pawh hian kan nun hi hetiang hian a lo khawlo zo ta, a pawt takzet a ni tih kha ka’n sawi tel ve leh duh a.

Pu Deputy Speaker, a tawp bera ka sawi duh chu thenkhatin kan sawi fo thin heng East Timor chungchang te kan sawi thin a. Thawk hah lovin independent hi kan ni thei a ni tih kan sawi thin a, a pawl khawpin ka hria a. Khingte khi Portuguese ina kum zabi 16-naa an lo lak, an colony thin kha a ni a. Rei tak an awp a ni. Khilai ramah khian Australoids leh Melanesians ho an awm thin a ni. Khatiang khan Portugal-in rei tak a awp tawh hnuah kum 1975 khan nasa takin an bei ta a. Chutah chuan independent an la hmu mai lo, 1999 ah khan an han kalsan ve deuh ta a. Tah chuan, Indonesia-in reiloteah a la leh nghal mai. Ram tereuh te a nih avang khan an han kalsan chiah khan Indonesia khan power vacuum awmin a hria a, a va run a, a awp ve leh nghal mai a ni. Khatia a awp beh takah chuan na takin a awp a, infrastructure pawh a din nasa em em mahse an nawm phah lo, an zalenna kha a awm reng reng lo. Chumi a nih avang chuan UN Peacekeeping Force kan tih ang khan an han thut chilh ta a nih kha. Chumi hnuah chuan UN Peacekeeping Force enkawlna hnuah kum 2002, May ni 20 khan international, ram hrang hrangte khan an rawn recognise ta a, ti khan independent ram ang khan a lo chhuak ve ta chauh a ni.

**Pu JOHN SIAMKUNGA** : A chhan chu, anmahniah pawh thi an tam, mi nuai 1 chuang lai kha an thi a, tihduhdahna tuarin a sing tel an thi a, mi nuai 3 lai kha West Timore lamah an nawr thla a nih kha, anmahni ram hel ho khan. Anmahni ram leh ram, hnam leh hnam an indo phah ta zawk a. Chuvangin, an harsatna tawh te kha holam taka sawiin, ‘chungte pawh an independent a chuti khati’ tih mai tur a ni lo. Chu ai chuan, keimahni indigenous people te hian kan right kan claim na hi chu a tha khawp mai, kan claim zel ang, kan neihsa pawh a awm, kan la claim zel baw ang, tiin zohnahtlak zawng zawngte in unauzaa, tualkhat chaia kan len hun hi chu tute pawhin kan nghakhlel vek.

Kan luah chin rama mi zawng zawngte hi awmkhawm ila, hnam lian tak angin awm khawm i la, u leh nau, chhinlung chhuakte hi leng tlang ila tih kha kan duh dan vek a ni. Amaherawhchu, zirtirna dik hmangin kalpui thung ila, zirtirna dik loin thil tha lo a thlen theih avangin tih kha ka'n sawi duh a ni, ka lawm e.

**DEPUTY SPEAKER** : Tunge han sawi ve leh ang? Dr. K.Beichhua

**Dr.K.BEICHHUA** : Pu Deputy Speaker, ka lawm e. Vawiina resolution hi ka chhiar chhuak lo mai ang a. He resolution rawn pulut tu kan member zahawm tak Pu Vanlalzawma chungah lawmthu ka sawi a. Resolution tha tak a niin ka hria a. Vawiinah hian he resolution kan sawiho tur hi Mizoram Assembly House a record, a ni chhinchhiah tlak tak, nakin thang leh thar la awm zel tur te, kan tu leh fate pawhin record a an lo hmuh tur thil a nih avangin a pawimawh hlein ka hria a ni.

Chutihruah chuan, thusawitu hmasa lam tawngkamte ka hriat sual deuh nge maw ni dawn ni UNO han tih chuan hmanlai thil, lung tileng deuh, engemaw taka ngaihna te, chuti teh vaka tunlai hun angah chuan sawi sawi loh tur chi ang te pawhin kan sawi deuh hlekin ka hria a,

Hei hi a ni lo in ka hria a. Tunlai, a bik takin kan Mizoram ngeiah pawh NLUP kan sawi chuan UNO a ri deuh zel tawh mai a churang chuan, UNO kan sawi hian tunlai thil kan sawi a ni tih hi ka rilruah a awm a ni.

Vawiinah he thu kan sawi hian rilru tak tak nen kan sawi a, a pawimawhna lai hi kan ngaihtuah uluk a tul hlein ka hria a. Khawvelah mimalin emaw a huho in emaw, a hnam ang pawhin duhthlanna kawnga zalenna kan neihna hmaning ram inrelbawlnaah leh ei leh bar, khawtlang leh hnam nunzia chawikanna kawngah an duh dan anga hma la a kan chanvo tur dik tak kan chan ve theihna tur hian 13<sup>th</sup> Sept, 2007 ah khan kum 25 an ngaihtuah hnuin he declaration hi indigeneous ho tan hian min siamsak a ni. Churang chuan, vawiinah hian he House a he resolution kan sawi hian India danpui kalhin kan sawi dawn tihna a ni lova, independent kan puang dawn tihna a ni lova, independent sual leh ang u ti a rawtna pawh a ni lo. India ngei a va telna UN declaration 2007 chak zawkin, tun aia chak zawk pawhin a theih chuan hmalak ni se, kan chanvo tur dik takte hi Zofate hian chang ve i la tih kha kan resolution rawn puluttu rilru ni in ka hria a. Chu chanvo kan neih te a taka kan chantir theihna tur chuan United Nation-in keini tualto hnam te tan a declaration 13<sup>th</sup> Sept, 2007 a mi lo siamsak (Article 1-46) na thleng hi kan dikna chanvo a siamte chu zah taka zawm leh pawm hi kan tih makmawh niin ka hria a, ropui ka ti hle a ni.

Kan hre theuh a khawvel hi tunhma han ngaihtuah chuan kawng hnihin a kal ti te pawhin a ngaihtuah theih a ni. Khawtlang lam Europe -ah te chuan awpkhawm luih ten awm darh an duh a khawchhak lamah erawh chuan awp darh luih ten awmkhawm an duh a ni. Chung mite chu tam tak chuan hlawhtlinna, mahni a ro inrelna an chang tawh a. Tunah hian UN hian chutiang chuan a la bei zui zel a, hnam tam tak, kan thusawitute pawhin an lo sawi tawh te pawh kha chhanchhuahin an awm mek a ni tih kan hre theuh ang a. Churang chuan, kan hriat angin vawiina kan Zoram zo hnahtlak hrang hrang, hmun hrang hranga awm darh ta te, kan history han chhut hi chuan a lungchhiatthlak angreng ka ti thin a ni. Khawvel indopui-II na vung lai tak mai khan tangrual pawl Allied Force leh Axis te an innawr na hle tawh mai a, chutah chuan Japan lam chuan Axis lam an zawm ta a. Mahse Asia kha Asia ram mite ta a ni tih rilru an tuh ta a, 'Asia for Asiad' te pawh an tih hial kha. Chutiang chuan an kal chho a, khating a nih takah khan British leh France khan an hlauthawng ta a, Russia leh USA kha tanrualpuiah sawmin nasa takin hma an la chho a. Khatiang a nih takah chuan India ngei pawh kha Axis lamah telin Subhash Chandrabose, (India National Army) pawh kha Tokyo ah va thlawkin Axis ah an lo tel ve reng tawh mai a ni. Hemi avang hian British leh France kan sawi tawh ang khan Atlantic Charter chu 1941 August thla khan New Found Land-ah siam a lo ni ta a. He Atlantic Charter-in a tum chu thil dang ni lovin he Allied Force a tel zawng zawng, ram an lak belh te hi anmahni ram chutianga lak belh a neih zel tur ang ni lovin he Atlantic Charter ah chuan ram an lak te kha hnehna an chan hunah he tualto hnamte leh heta indonaa remna siampuitu zawng zawngte hi anmahni chanvo dik tak, an ram tur ang chi kha anmahni in an chang zel ang tiin Atlantic Charter kha sign a ni a. Hnehna an chan tak hnuah chuan India, Burma, Pakistan te kha independent angin kan lo awm ta a. Chunglaiah chuan keini kha excluded area a awm kan ni a. Excluded area a awm kan nih avang khan British India thuhnuaiyah



kan lo awm ta a, chuvang chuan kan nu leh pa kal hmasate khan kha Allied Force ah khan remna siam vein, mahse hlawhtlinna an han neih takah kha chuan kha Allied Force a an chan tur ang chi kha tha an ti zan lo nge ni a an ngaihtuahnain a phak lo, tunlai ang a legal expert te leh lehkhathiamte kha an la awm lova, chuvanga tunah hian hetiang dinhmun a awm ta hi kan ni.

Khanglai khan ngaihtuahna fim tak leh thui tak, nakin hnu thleng lo chhutin kan nu leh pa te khan ro lo rel ta se chuan vawiina Burma lama kan zohnahtlak te, Tripura kan tih Bangladesh te, India ram hmun dang dang amite pawh hi rorelna hmun khatah kan awm ngei ka ring a ni. Mahse kan hotuten vawiinah chuan India hnuaiah awmin, India pawn tha thei ang bera min enkawl chu a tum a, vawiin hi kan thleng ta a ni. Vawiinah erawh chuanin independent kan duh e tih leh independent vawiinah House-ah hian i puang ang u tihna resolution ni lovin, kan chanvo tamtak kan chan turte hi vawiin aia chak zawk hian hma la ila, tih kha kan resolution puluttuina (DEPUTY SPEAKER : I rei lutuk dawn ania aw, conclude tum la.) a ngaihdan a ni a. Chuvang chuan, vawiina kan rilrua awm tura tha ka tih chu, nakin zela kan thlah zel turten he ram mipuite Zo hnahtlakte, international boundary-ina a daidan hrang hrang a, hmun dang danga awmte kan inpumkhat chhoh zelna tur leh kan hmalam hun turah hianin, he Session-ah ngei hianin kan nu leh pate chuanin resolution an lo pass ve tawh alawm le tih a, an hmuh theih tura resolution chu kan pass a tulin ka hria a ni.

Chuvang chuan, Pu Deputy Speaker, vawiina khami declaration-a tam tak kan chanvo tur kan chan lohte hi chhut ta ila. India awpna hnuaia kan awm, (India sawrkar tha tak han ti ta ila), mek lai hian kan chan tur kan chan lohte chu practical-in tunah hian hmuh theihin a la awmin ka hria a ni. Kan House Leader ngeiin kan kalkawng chungchang a sawi a. Central atanga control anih avangin state-in engmah tih hleihtheih kan nei lo tih a sawi. Tui khuah tur pawn, Chhimituipui tui khuap tur pawh sawn 2008 atang tawhin vawiin kum 7 ah pawh clearance 2 te chauh kan la clear thei a ni. Chu chu kan nihphung tur angin kan ni em tihte kan ngaihtuah a. Tin, vawiina kan leilung hausaknate hi vawiinah a ram neitute eng percent-te nge, 12% te lek a ni lawm ni, kan hauh theih tak? Hengte pawh hi heng declaration hian a huam a ni lawm ni? Chuvang chuan, vawiinah hianin independent leh dan kalh zawnga sawi ni lova kan hamthat zawkna tur, he declaration a kan hamthatna min pek tamtak hi, hawh u, i nawr chak deuh hlek ang u.

UNO atanga direct-a minrawn pek kher tur thil pawh a ni lova, tam tak hi chu. India chu UNO member pakhat a ni a, chuta declaration-a hming sign-tu pakhat a ni a. A rama cheng keini tualto hnamte tan hianin tun aia chak zawkte pawh hian hma min laksak rawh se tih zawng khan ngaihtuah ila, he resolution hi resolution tha tak a ni a, pawmsak ila tih kha, Pu Deputy Speaker, a tawp berah chuan ka sawi duh e. Ka lawm e.

**DEPUTY SPEAKER** : Tunge han sawi ve leh ang. Kan sawi zawhah hian Minister concern sawm a ngai ang a, chutah House Leader-in sawi duh a neih chuan a sawi ang a,

move-tu kha kan sawm bawk ang. Chu chu hun la awm tur a ni a. Pu Lalrinliana Sailo ilo sawm ang.

**Pu LALRINLIANA SAILO** : Pu Deputy Speaker, tlem han sawi ve ka duh a. Vawiin a kan Private Member Resolution hi Resolution tha tak pawh a ni in ka hria a. Amaherawhchu, thil hlui hi kan ngaihtuah lo thei lova, i veilama mite hi an ngaihdan an thlak ta emaw ni chu aw tihna kan nei a.

Term hmasa lamah khanin border fencing hi, khatih laia ruling kha an ni a, an rawn pulut tawh a pass kha kan duh lova, kan hnial kha a ni a. Tuna resolution mi ina a rawn tinzawn tur deuh a ni a, kan ngaithla a, kan sawitlang duh lem loh, kan rilru a awm tlang si, Zo hnahtlak inpumkhatna tur ang hawi zawng te leh kan chanvo chungchanga kan nih tur ang nih tak lohah hianin a rawn inletling deuh hlekin ka hria a. I dinglama mite hianin pulut zawk ta ila chuanin a inhmeh awm mange aw kan ti a.

Engpawhnise, ni e, anmahni rau rauvah chuan, a puluttu hi Central YMA President hlui a lo ni a, awm pawh a awm khawpin ka hria a. Hei hi kan han sawikhawmna eng leh tuna kan rilru putphung tlangpuiah hianin tuman i hnawl ang u tiin an sawiin ka hre lova. Amaherawhchu, a tawngkamte uluk deuh hlekin, thangtharte hianin kan hruaitu ril takte lo hmahruai tawhna te leh waviina ram hruaitute tawngkam atanga duhthusam loh deuh hleka boruak duhawm lo thei invawrh kang a, flare up hluai te pawh a hlauhawm e, ti a han thlep kualah te pawh ka'n ngai deuh a.

Pu Deputy Speaker, he Indigenous Right hi UN-in, kan hriat angin 13<sup>th</sup> Sept.2007 ah khan a rawn pass a ni a. 2006-ah Human Right a Council-in an pass a, chutiang chuanin, kan hriattlan vek a ni a. Thil dang tamtak han sawitur pawh awmin ka hre lova. India hian a support a, a hai a, Vote laknaah a banphar sang tak pawh kha niin ka hria a. Bangladesh erawh hi chu, thui tak sawitur pawh awmin ka ring a, amaherawhchu, sawi thui ta lo ila. 1890-a British-ten min rawn awp vel atang khanin, Bangladesh mifing chu Bengali kan tih ram an ni a, an hre khawp mai a. Chuvang chuan, an area a awmte khu indigenous pawh an ti phal lo a, an ti ngam lo a ni. Hei kan pu, kan House Leader zahawm tak, hmalaknain nikum kum lehlam khanin Bangladesh kan zu thleng a. Chungah pawh chuanin kan Zo hnahtlak unaute, Bawm leh Pang ten, min lo hmu a. Tichuan, indigenous pawh kha min ti phal lo e an ti a, chutiang chu a ni a. India a phar sang pawl tak a ni a, tunah hian. Chu chu India-in adopt a, tunah pawh hianin adopt ve mai kha sualah ka ngai lova.

Tin, Pu Deputy Speaker, heta awm zawng zawng hian Zo hnahtlakte rorelna hmunkhata awm a, engtikniah emaw a hruaikhawm a kan awm hi kan nghakhlel vekin ka ring a, kan duh vek ang. Chumi duh lo zawng chuan tuman sawi awmin ka hre lova, chuvang chuan, heihhi han hnawl mai chi pawh a ni lo. Amaherawhchu, uluk takin in rawn ngaihtuah a tih ang deuh khanin, an uluk lutuknaah hianin a hawl zau lutuk deuh em aw tihna kan nei a. UN Declaration on the Rights of Indigenous People a hlawhtlin thuai theihna turin tih a ni a, UN-in tualto hnamte

dikna chanvo a puanchhuahna tihah khan. Zo hnahtlakte inpumkhatna ang zawng hawi zawk a, hmanhmawh deuh zawk a han rin luh kha a tha zawkin ka ring a, Chulam chu a kaw si lova.

Vawiina hemi kan pass tur ang hi chuan khawvel hmun hrang hrang a awmte a va kep deuh reuh a, a zau lutuk lo maw kan ti deuh a ni. Chuvang chuanin, modify zawk ta ila, keimahni Zo hnahtlakte inpumkhatna ang tur leh rorelna hmunkhat a kan awm theihna tur zawnga rin luh thiam dan zawk hi awm se a that zawk kan ring a. Tin, Pu Deputy Speaker, hemiah hianin Mizo hnahtlak leh Zo zawng zawng hi kan lungual ka ring a.

Record-te han enin, 1947 khan, Mizo Union khan ‘Mizo Integration and Solidarity’ tih thupui hmangin, khatih laia Constitution siamtute hnenah khan, Advisory Committee hnenah, nasa takin hma an lo zu la tawh a. Tin, 1950 khan UMFO kan tih khan Chin leh keimahni, Zoram amite, inpumkhatna tur khan hma an lo la tawh baw a. Tin, 1965 khan MNF-in chumi thu tho chu an lo buaipui tawh a. Tin, keini Congress party pawh hian 1972-ah hemi tho hi ‘Mizo Integration and Solidarity’ tih hmang hian nasa takin, khatih laia kan hotunu ber Pi Indira Gandhi remtihna thlap khan, kan manifesto-ah kan lo dah tawh baw a. Tin, 1988-ah PC party-in chutiang chuan an lo ti tawh baw a. Chumi kawh ber chu, tuna kan topic lai tak, Indigenous Rights te chak taka a kal theihna tur en hian a inkungkaih vek a ni. Tichuan, tunah hian Zo hnahtlak leh keimahni tante pawha kawng awm tha tur, tuna thangthar leh thalaite an tuihalna em em, vawiina kan Zoram hi rawn kang deuh hluai a, thaw deuh huaia kan awmtheihna tura kawng rawn inhawng tan, meichher rawn inchhi set set te hi tunah hian he House hian han pass pui ta ila, tih thinlung kha a ni berin ka hria a, thu har leh engemaw han sawikual vak tur pawh niin ka hre lova. Chuvang chuan Resolution chhia a ni lova, tin, tu party mah hian an kalh pawh ka ring lo.

Tin, Pu Dy.Speaker, kan House Leader zahawm tak hi hetiang kawngah hian ka fak lo thei lova. Statement hrang hrangte leh ama quotation leh ama thusawite kan han hriat hian. Hetiang kawngah hian Zo hnahtlak Mizoram chung leh pawna awmte tana inlungualna tha zawk leh inunauna tha zawk leh inpawkhawmna tura ngaihtuahna seng leh a tawng huai leh tawng na ber pawh niin ka hria.

Kan hnung lawka Halflong -ah pawh khan keini thangthar tam takte leh miin min nuihzat lo se, a hminga Zirlai hruaitute lo ni tawhte tan pawha hlimawm tak khan Zo hnahtlakte insuihkhawm lehna hun a nghahhlelh thu leh Pathianin chutiang angah chuan min hruai lut ang tih a rawn sawi nghe nghe a ni. Chuvang chuan ka rindan nghet tak mai a awm ve a, ka duh dan pawh a ni a. Engtik niah emaw chuan he ram, Pathian zawn chhuah kan inti ta mek mek baw a, Lalpan min la hruaikhawm leh ngei ang tih hi ka ring a ni.

Mak deuh mai chu kan hriat tlan vek he House-a record-a awm theia ka sawi hi ka lawm khawp mai. Kan thlir a, Manipur lam ramlai dep lam chu ringtu vek an lo ni mai a. Bangladesh ram kan zuk thlir a, chutiang tho chuan Zo hnahtlakte chu ringtu vek an lo ni a.

Myanmar ram kan han en a, keimahni dep chu ringtu vek an lo ni leh bawk si a. Chu chu chunglam hian a lo kal leh hma ngei hian engtik niah emaw Zo hnahtakte hi rorelna hmunkhatah min huikhawm hi ka ring takmeuh meuh a ni.

A move-tuin a rawn sawi ang khan tunah hian hriamhrei lampang lek emaw kha a ni lova, khawvel hmun hrang hrang atanga kalkhawmin chak taka an lo pass tawh, anmahni ram theuhin an adopt, kan India sorkar laipui ngei pawhin a adopt hi resolution hi a tha ka ti a, ka support a. Amaherawhchu, hemi ang ngau ngau lo deuh hian hei aia kan Zoram thalaite leh tuna hemia tuihal leh ngaihtuahna sengte tana lawmawm zawk mah tur hian, hetia va dawid deuh hlek lo zawk hian Zo hnathlakte insuihkhawm leh thei tura tih a rinluh zawk leh her danglam zawk pawh hi a la tha awm mang e. Hemi thu hrim hrim hi a tha ka tiin ka'n support a nih chu. Ka lawm e.

**DEPUTY SPEAKER** : Sawi duh kan la awm em? Pu Lalruatkima sawm ang.

**Pu LALRUATKIMA** : Pu Dy.Speaker, ka lawm e. Vawiinah Private Member's Resolution 'UNO-in tualto hnamte dikna leh chanvo a puanchhuahna UN declaration on the rights of indigenous people' a hlawhtlin thuai theihna turin theihtawp chhuaha hma lak ni rawh se', tih kan han sawiho a ni a. Resolution neitu Pu Vanlalzawma, MLA zahawm tak leh Opposition Group Leader chungah lawmthu ka sawi duh a. Sawitu member zahawm tak takte atangin thu bengvarthlak tak takte kan ngaithla tawh a. Chutah chuan kan hnam inpumkhatna turte kan ramin kal a siam mek kawngah he hnam hi a damkhawchhuah theihna tura ngaihtuahna ropui tak leh thu leh hla ngaihnam tak mai kan han ngaithla kha a ropuiin ka hria a.

Pu Dy.Speaker, i veilam leh i dinglama mite pawh ngaihtuahna hmunkhat angin kan kal za ni te pawh hian ka hria a. Kan tum, kan goal pawh thil hrang chuang hauh lovin, wording hrang hlek hlekte chu han nei mah ila thukhat kan vaw tlang nite pawhin a hriat theih a. Chuvang chuan vawiina kan Resolution sawiho thei tura Pathianin hun tha tak mai mimal taka min pe te pawh hi vannei ka inti a. He thil hi Mizoram Political History-a chuang reng tawh tur niah ka ngai bawk a.

Chutiang chuan Zofate zin kawng a bumbuh hle mai a, Political zawnga kan thlir chuan, kan hriat theuh angin 1871 atanga 1872-ah Vailian vawikhatna a lo thleng a. 1873-ah Bengal Eastern Frontier Regulation kha min rawn pe a. Chutah chuan British-ten Mizoram min awpna, Mizo fate min awpna, mi dangte min rawn kalpawh theih lohna turin Dan a siam emaw kan tih kha; Mizote hi Sairamchhuah emaw, ramvak emaw, British Lal ram thut chin ti mai teh ang, zuk kal lo tura min hungna/min daidanna zawk nite pawh khan Bengal Eastern Frontier Regulation kha a ngaih theih a.

Kum 1888 -1890-ah Vailian vawihnihna a lo thleng leh ta a. Chumi hnuah phei chuan Chin Hills nen lam khan min awp zui a. Kan House Leader zahawmtakin a sawi thin a, British Divide & Rules Policy tuartu ber chu Zofate kan ni a tih ang khan, Zohnahtlak hmun hrang

hranga awmte chu Chin Hills lamah te, Bengal province lamah te, Assam province lamahte min awp darh a, min then darh zui ta a.

Chutianga Zofate zinkawng bumboh tak mai kan zawh lai chuan kum 1892-ah Fort William Kolkata-ah Chin Lushai Conference neih a ni a. Chutah chuan Zofate province hrang hranga awmte chu rorelna pakhat hnuaia kan awm leh theihna turin hma lak a ni a, amaherawhchu, a hlawhtling zui ta lova.

Kum 1947-ah an mi awp ang ang chuan India ram te, ram thenawm Bengal lam te leh Chin Hills lamten zalenna kan han hmuh chhoh tak takah khan India (Assam) hnuaiah min hnutchhiah zui ta a.

Kum 1966-ah mahnia rorelna kan neih theihna turin zalenna sual a ni a. Kohhran leh tlawmngai pawl hrang hrangte leh political party hrang hrangte ngenna angin 'Inremna' 1986-ah neih a lo ni ta a ni. Chuvang chuan engtik niah emaw chuan zofate hi kan la insuihkhawm ang a, rorelna pakhat hnuaiah kan la ding ngei ang, tih hi kan lungkham leh kan suangtuah ram a ni vek mai a. Vawiinah hian kan unaute zawng zawng Burma lama awm te, Bangladesh lama awmte leh India ram State hrang hranga awm te, pawh hi tawngkain kan sawi kep ni lo mahse, kan thinlung takin kan sawi kep, kan hrereng tlang vek mai a ni. Chutiang zawng zawng chu Zofate political-a an zin kawng a lo ni ta a.

13<sup>th</sup> September, 2007-ah UNO chuan declaration a rawn siam ta a, he declaration siam tur leh tel ve tur pawh hian Zofate aiawh pawl 'ZORO' kan tih khan theih ang angin a'n bei chho ve a. Chutah chuan Indigenous people Organization-ah kan harsatna te, kan mangannate indigenous forum-a kan tel ve theihna turin an bei a. Kan ngaihthlak tawh ang khan Indigenous a han tihte chu hnam an nei tur a ni, ram, territory chenna bial chiang leh fel tak an nei tur a ni tih te. Khawvel map-ah fel taka rin hual theih an ni bawh tur a ni, tih te leh tobul hran an nei tur a ni tih zawng zawng qualification kha paltlangin kum 1999 ah ZORO chu Indigenous People Organization- ah khan ziah luh a lo ni ve ta a.

Vawiinniah hian ka ngaihtuahnaa awm reng thin, kan hriat tawh angin ZORO a kan hotupa, Pu R.Thangmawia, (a thlarau chawl hahdam se) chungte chuan vawiina he kan House zahawm taka kan sawite pawh hi min lo thlir reng ang tih pawh ka ring a. Chutiang chuanin UN pawh chuanin Human Rights Council thurel 1/2 ah 29.6.2006 a Tualto hnamte dikna chanvote UN in a puanchhuah te pawm leh hrereng chungin UN Assembly rorel 61/178 20.12.2005 thua Tualto hnamte dikna leh chanvo ngun taka ngaihtuah a inrawn zauhna neih a nih hnuaah UN General Assembly Session 61-na tawp hma ngeiin thutlukna siam a lo ni ta a. Chutah chuanin 107 na Planetary Meeting ni 13.9.2007 ah chuan keini ang bawka tualto hnam Indigenous Peoples te tan, an dikna leh chanvo hrang hrangte puanchhuahna Article 46 zet mai awmna Resolution chu pawm a lo ni ta a nih kha. Chutah chuan keini Zofate hi kan tel vek

mai a. Chutah chuanin Pu Deputy Speaker, British-in min awpna piah lamah khan keimahniah he kan declaration hian tum hrang hrang a nei a. Pu Speaker, sawi duh an awm tam lo bawk a, min pek belh hlak la. Mimal leh a huho anga dikna leh chanvo tar lanna te a keng tel a. Tin, hnam zia, culture leh identity tawng leh hnathawh lam lanna te, zirna education leh thildang pawimawhte a keng tel bawk a ni.

Tin, ram leilung faten an hnam zia leh tihpuitlin, culture & tradition vawn nun leh humhim sak te, hmasawna hnathawh kawngah te pawh a ni zel a. Chutiang chuanin ram leilung fa an nih avanga thliarhranna khawvelah USA-ah phei chuan native kan ti a, Australia-ah phei chuan Aborigines te kan ti a, chungang te laka an inthiarfihlim a, venhima an chanvo humhalhna tur chu a ni a. Chuvang chuan Article 1 - 40 na inkarah chuan mimal leh a huhova, kan dikna leh chanvo tarlan a ni bawk a ni.

Chutiang zel chuan Article 41 leh 42-naah hian UN mawhpurhna leh chanvo tarlan a ni a. Chuan Article 43-na leh 45-na hian an thupuan chhuah hi tu pawn hmeichhia emaw mipa annih avanga thliar hran a phalloh thu discrimination kha a tarlang bawk a. Chulaiah chuan self determination kan han sawi a kha, helaiah Article 3 leh 4 zawng zawngte kha rawn khai khawm vekin Article 46-na ah chuanin 'UN thuthlung kalh zawnga ram khat mahniah ro inrel then hrang zawng leh inlungualna tichhe zawngin hman phal a ni lo' a rawn ti leh thlap a. Chu pawh chu India sorkarin a pawm theihna chhan ni te pawhin a lang a ni. A eng a pawh chu ni se, Pu Deputy Speaker ni 23.3.2012 ah khan Private Members Resolution te pawh sawiho a ni a. Khatah khanin Mizo lal ten compensation an claim chungchangte sawi a nih nghe nghe kha. Chung ang te pawh chuan ram leilung fatena ram neitu nihna kan neih te, Article 26, 27 leh 28 ah te pawh khan he declaration-ah hian kan hmu bawk a. Chutiang chuan he khawvel kal zel tur hi tuman kan hre lova.

Zawlnei pakhat chuan Chhimlamah hian Saisichhuah Tuipui kamah sawn indona India leh China indona, hmunpuiah a chang dawn a ni a ti a. Tunah chuan Saisichhuah kawng saw helicopter tum theihna khawpin an lai zau duai mai a ni Defence Ministry lamin. Chutiang te chu kan ni a, heng ang zawng zawng te kha sawi telin Article 30, Pu Deputy Speaker, minute khat chia. Chutah chuanin a pawng a takin Article 30 naah chuanin 'Tualto hnamte ram luah leh thuneihna chinah an remtihna tel lo leh ram a mamawh a nih loh chuan sipai chet lak nan hman tur a ni lo' tih kha a ni leh ta zel a. Chutiang ang chu kan ni a, kan ram hi. North East-ah kan awm a, kan ram thenawmte chu kan hre vek mai a, chuvang chuan heng ang zawng zawng te hi Indigeneous People kan nihna angin kan right a hi kan claim hi a thiang dawn a ni.

Chutiang zel chuan Lengpui Airport te pawh kan ti, Air Force lamin Air Force base-ah te pawh min rawn dil a ni. Chutiang thleng chuan he ram hi Indona hmuna a chan mai lohna turin tualto hnam ten kan dikna leh kan zalenna hi kan au chhuahpui tur a ni a. Vawiina kan harsatna, kan sum leh paia kan harsatnate pawh hi heng indigenou declaration hmang te

pawh hianin kan la zualko zel thei dawn niin a lang ta a ni. Chuvang chuanin ‘The Schedule tribe and other Traditional Forest Dwellers Act 2007’ he House zahawm tak pawhin kan lo adopt tawh, Rules fel tak kan neih tawh te pawh kha ngaihtuah thlengin ramleilung fa, tualto hnamte hianin engtik niah emaw hi chuan kan zalenna hi kan nei ang a, chu zalenna zar chu kan thenawm a kan unau te, Burma lam te, Bangladesh a khawsa zawng zawngte pawh hi a la huap ang.

Tun hunah chuan kan sawi thei lo, kan la hmu mai thei, kan hmu lo mai thei. Amaherawhchu, chumi tur chuanin vawiinah hian inlungrealna nen kan hmathlir hi a takin Pathianin min la hruai ngei dawn a. Chumi lo thlen huna atana kan inbuatsaihna atan chuan he UNO ina ‘Declaration on the Rights of Indigenous Peoples’ a hlawhtlin theih thuaina tura hmalak hi keini ram roreltute hian kan mawhphurh leh kan tih turah ngaiin he Resolution hi ka support a ni tih kha ka’n sawi tel duh a ni e. Pu Deputy Speaker, ka lawm e.

\* Speech not corrected.

**DEPUTY SPEAKER** : Minute 5 in i exceed a ni. Pu T.Sangkunga ilo sawm ang. Pu Deputy Speaker, ka lawm e. Vawiinah he Indigenous Peoples Rights chungchanga Private Resolution lo lut hi a hun hlein ka hria a, lawmawm pawh ka ti a. A chhan chu thihna hian khawvelah mite inkarah remna te, hmangaihna te a thlen thin a. Vawiinah hian Pu Thangmawia, Mizote tana kan dikna zu buaipuitu ber, kan hotupa khan a dam lai aiin a awm tawh loh huah hian kan zingah thu a sawi nasa zawk a ni. Khawvel hmun hrang hrang en ila, India Independent hlimah Muslim leh Hindu te an insam buaih buaih lai khan a raphlak a, a boruak a sa lutuk. Mahse, Pu Gandhi-a a thih khan boruak tha tak a rawn awm phah a. Khatiang zel khan thihna hian thil tha a thlen a. Kan Lalpa Isua Krista kha thingah khengbet lo se, chhandamin kan awm hauh lovang. Chuvangin thihna hi vawiinah, he Resolution min tui rual tirtu ropui tak niin ka hria a.

Tin, kan right kan hriat loh chuan thil claim kan thiam lo ang. Kan Right, UNO in a lo pass hi a ropui a. Amaherawhchu, kan Right kan claim-naah hian fimkhur a ngai em em a ni. A claim nasa te leh a bawh na apiangte hi an che fuh kher lo. Chawngbawla pawh a bawl theih loh ni a thleng tlat, khatiang khan kan tih tur, kan right kan claim-naah pawh hian kan fimkhur a ngai.

India Independence dawn a British hovin min chhuahsan dawn lai khan kan Bawrsap hovin min hmangaih si a, an chhuah dawna min hrilh zawng zawng kha ti ila a tha miah lo. Khatihlai khan British kha engmah an ni tawh lo, an sumdawna lawng lian pui pui, Queen Elizabeth an tih Lawnglian thlengin a pil zo tawh. An thlawhtheihna, indo thlawhna zawng zawng deuhthaw an kap thla tawh. Chuvangin engmah an nei tawh lova, thiltihtheihna an nei tawh lova. Chuvangin kan Bawrsapte chhuak turin a min duhsakna avanga tih theih mai tura min hrilhthe kha thil tih theih loh tam tak a awm a ni. Independent neih te, Crown Colony a awmte tih theih emaw tiin mifing, Phizo a, Nagaland atangin Mizo Union general Assemblyah a lo kal a,

‘independence i puang ang u, a theih a ni,’ an ti. Pu Ch. Saprawnga te, Pu Ch. Chhunga te chuan theih an ring tlat lo. Phizo a hlawhchham a, a haw chho a, Naga tan Independent a puang a, Nagaland-ah chuan vawi 4/5an khua te a kang a ni an ti, rapthlak tak a ni. Chuvangin tunhnuah pawh Punjab sipai ngah ber mai leh, Pubjab rural people tihthinur chu thihna an rawn bawh tup tup mai a ni an ti a. An huai em em mai a, an sipai pension rualten General ho in Khalistan Independent an bei a. Mahse an Golden Temple thlengin sipaiten an luh chilh a, a sawp chu nasa tak a ni. Chuvangin thil kan sawi hian uluk taka kan ngaihtuah a ngai a ni.

Pu Speaker, Pu Lalthankima te, Pu Bawichhuaka te, Pu Saprawnga te kha kan lehkha zir laiin an ina len chilhin, thil hlui ka zawt thin a. Pu Lalthankima’n min hrilh chu, Pu Laldenga’n Independent a puang dawn a boruak a sat hle hnu khan zanah Pu Laldenga kha ka inah a lokal a, ‘Muana pa ban minphar sak rawh, ka chalah ngen mu a lut dawn, kan thalaite ka chelh zo ta lo a ti a. Kei lah khan ‘kan hrilh kan hrilh che a i awm lo a lawm i thih ai ka thi ngam hlei nem’, ka lo ti a. Pu Ch.Chhunga inah a han kal leh, Pu Chhunga chuan “Danmawia pa, nang leh kei kan thih avanga kan rama thisen chhuak tur hi a reh dawn a nih chuanin nang leh kei chu kan thi mai tur alawm” alo ti a Pu Ch.Chhunga chu kan tluk lo a ni,” a ti. Chuvangin heng thil pawimawh tak kan ngaihtuah laiin India ram ropuizia hi kan hriat reng a ngai. U.N.O, Assembly-ah vote la sela, India vote lama vote thlak ve mai tur hi khawvel ram zahve lai hi an awm reng ringawt mai a ni. Foreign Direct Investment han ti ila India hi khawvelah Industry din nan ram tha berah an ngai a, kuminah F.D.2 a sem lut sang ber a ni. China an thang chak tan dek dek a, Japan leh Korea te chuan India an rawn bel vat mai a, U.S.A nen an meeting vat mai kha. A chhan chu India hi ram ropui leh chak a nih vang a ni. India independent hlima a pachhiat ber lai pawh khan Raja Independents ram 200 independent sa liau liau te kha Sardarvalabai Patel hovin an la vek. Chuvangin keini Excluded area ami inti a Sap tlawm tur thu a independent dil chawp tur te kha chu ropui lo tak kan ni. Chuvang chu a lawm Parliament-in 1956 a Re-Organisation Act a ram lak thar peon te, teacher te, Civil Service etca sorkar hnathawk service protect nan a siam tak ni. India rama an anpuite nen an hlawh leh seniority turte ngaihtuahna a tan khan re-organisation 1956 Indiaa ram Chief Secretary zawng zawngte ruahman, Parliament a passed vawiin thlenga Supreme Court leh High Court-in an ngaihsan em em te alo chhuah phah a ni.

Independent sa, Raja ho awpte an lak luih lai khan Independent Crown coloney a awm mai thei tura kan han sawite hi chu a boruak lutuk. Heng angah te hian kan right kan sawi pawh hian kan fimkhur a ngaiin ka hria. Amaherawhchu, chutia ka sawi avang chuan kan tlawn lutukin zu bet lutuk tur a inngaih tura nilo. Kan right chu kan su ngam tur a ni. Ka thianten an sawi ang khan UPSC exam a a thenin Hindi, a thenin Bengali te an exam theih laiin keini Mizo tawnga kan exam thei der lo pawh hi kan fight zel tur chu a ni. Hmanah Congress hun loh lai, Pu Desaia hun laiin (Congress hun loh laiin thilsual hi a thleng deuh zel a ) Mizoramah telin, India ram pumah U.P.S.C exam ah Hindi compulsory a



hman tur tih Parliament in a passed khan, chutih laia kan zirlai hruaitu Pu Zawma, kan hotupa pawh hi Zirlai (MZP) hruaitu a ni a. Ka nau T.C Kapmawia pawh MZP President a nih lai a ni a, India ram President, mature deuh mai Sanjiva Reddy kha a lo kal a, MZP huaihawtin Zirlaiten hnung lam chhawnin puan dum an lo zar khum a. Sanjiva Reddy'n Tripura a thlawh thlak hnu lawk khan, Tripura Sorkar hnathawk inzawm khawm Conference 27-na inaugurate tura min sawma, ka zuk kalin an Chief Minister Chakravarty' an a ina lengah min sawm a, chuta a sawi chuan min dek hle a. Zirlaiten hmanna President lo kal puandum an lo sin khum kha a na a ti hle a, 'North East kan enkawl dan hi a dik tawk lo a ni. Chuvangin ka hawng thlak hunah Prime Minister hnenah heng an thu passed te hi ennawn leh turin ka hrilh dawn e' a ti e, a ti a ni.

Chuvangin MZP movement tha tak avang khan kum 10 atan U.P.S.C exam tura Hindi an tih compulsory kha an suspend a, kum 10 dang an extend leh a vawihnih an extend hnuah chuan a reh hlen ta a ni. Khatiang khan, kan right kan fight reng a ngai a ni. Amaherawhchu, kan modified Resolutiona India sorkar han telh kha a tha em em a ni. Kan zinga Minister ngei te pawh hi rambuai avanga an pate sualna nei reng reng lo chan vawiinah sawi sawi ngam loh khawpa lainatawm, rape case te tam tak a awm a ni. Chuvangin kan resolution ropui tak mai a hunlai tak maia tihluh hi a modified form a thiam tak maia pass tura i dinglam leh veilama mite han inlungualna em em mai han rawt chhuah a ni te hi ropui ka ti a.

Zo hnathlakte hi kan inzawm khawm ngei ngei ang Pathianin hun tha min pek ka ring tlat. Zo hnahtlak zawng zawng inzawm khawmna turin Senvawn-ah kan politician hmasate an lo in hmu khawm tawh a. Amaherawhchu, khatih lai khan enge a hnu lawka thil thleng le? Manipura kan unauten a bikin Hmar unauten Zorama rawn beha kan District Council chhunga awm an duh em em a, khatih laia Manipur Raja kha a ropui a nia, Raja te khan India rama luh an duh phawt chuan Pu Nehrua te khan chuan engpawh pek hi an hnial lo ringawt mai a ni. Manipur Raja, Budha Chandra Sigh nau P.B Sigh kha Premier an ti a. Serkawnah a lo kala, Hmar unaute chu Manipura bet turin a sawm a, an beh duh chuan Autonomous District Council pek a tiam a. An duh loh avangin P.B Sigh chu Police rawn hruaiin a lo chhuk a a vuak tir hrep mai a, jail-ah te a dah nual a ni. UNO hi a ropui tak na a, sorkar hrang hrang inzawmkhawm an ni a. Kashmir chungchangah te pawh India leh Pakistan inbia se a, duh a mahse, India hian a duh lova a tilui thei chuang reng reng lo. Chuvangin ram chak tak maiin a duh loh chuan, America-in a duh loh chuan engmah a ti tak tak thei lo UNO hian.

Chuvangin U.N.O pawhin ti se India ram sorkar chak tak mai duh loh zawng ni ta sela, a theih tak tak lo reng reng tih hi kan hriat a ngai a. Kan right su chung zela Zo hnathlakte kan inzawmkhawm lehna tur beih hi a hun tawh tak zet a ni. Tunah hian huntha rawn in her chhuah lehna Burma tui lian hian mi a zawm khawm em em a ni. Chu bakah

Manipur Assembly thu pass thar, Tlang mite rahbehna hian mi a zawm khawn a. Entirna dang, chhim lamah thei ruk ching leh sual deuh deuh mai a awm a, mite chuan hepa hi an va vawhlum har em em ve, YLA te an awm lo em ni an ti ngawt mai a. Nikhat chu khamah a lum hlum ta a, Mipui chuan nunna em em inlaksak chu,' tiin a lamah an tang leh vek e an ti tih Minister pakhatin min hrilh a. Heng boruak avang hian kan inzawmkhawmna tura kan beih hun a ni. Russia ram ropui tak kha tunge a keh chhiat ring ngai. America nen an iner tawk em em emaw kan tih laiin Yeltsin, Russia President thu neih duh avangin, U.S.S.R President Gorbachev a zin bo hlanin Russia ram a han in tihhran khan a duh apiang kha an independent ringawt mai emaw tih turin U.S.S.R chu a lo keh chhe ta. Chechenia erawh an che tlai deuh a, bei hle mahse Russia chuan an awpbet lui tlai a, buaina a reh thei ta lo.

Chuvangin, heng hun tha lo thleng tur atan hian, Zo hnahtlak unau zawng zawngte kan inzawmkhawm a, ground work kan lo thawh hi a ngai. Kan Resolution hian kan zavaia thinslung, he House pumpui thinslung hi a rawn kaithovin ka hria a. Hetiang rawn move nachang hria kan neite hi lawmawm ka ti em em a, kan inlungualin ka hria. Mahse, a pass danah khan kan fimkhur a ngai a, Hnehloh chala chilhnawm hi a hlauhawm em em a. India rinhlelh lak lawh chu thalo tak a ni a. Amaherawhchu kan Right kha humhim tur a beih kan thulh tur a ni lo, kan bei zel tur a ni tih erawh chu chiang ila.

Pu Dy. Speaker, a modified Resolution ang khan lungual takin pass ila, India hi hmachhuan ila, a tawpa Bengali te, Assamese te leh Marathi etc. ten, 'I independent hlawm theuh mai teh ang u' an tih sup sup hun, Kannada tawng hmanng te, Tamil hote pawhin Independent tlan tha an tih hun nite a lo la thleng thei a. East German leh West German an inzawmkhawm khan hmun thenkhat ah chuan hreawmna a awm. East German an rethei si, West lam an hausaw baw si, an inkawm rual lo hle mai. Tunah hian North Korea leh South Korea mite an inngai lutuk; inzawmkhawm chiah se North Korea ho hi South Korea-a rukru mai tur an tam viau ang, han inzawmkhawm chiah se an buai ngawt ang.

Amaherawhchu, chung chu hunin a rawn hril ang a. reiloteah tuna Germany ang khuan an inpumkhat tha leh mai ang a. Keini pawh chutiang economic dinhmun inthlauh lutukna avang hian zo hnahtlakthe hi boruak eng eng emaw a awm phah fo thin. Hengte hi hre lawkin tun atang hian a ground work lo thawk ila. Kan Chief Ministerin Manipur inzawmkhawmna thu a han sawi tum te khan ka tel a. Zo hnahtlak inzawmkhawmna tura khatiang reng renga kan House Leade-r in a sawi huai theite kha mak ka ti a, Tripura a a thu zuk sawi ang khan a hun taka sawi huai ngam te hi tam ila an lawm em em ang a, an thlamuanpui ang. Chuti lova an mangan laia ka fimkhur e ti a kan dawid dei chuan a nilo chin hi a awm ve thei a. Fimkhur hun leh hun lo, Chawngbawla bawl hun leh hunlo a awm ang deuh khan tunah hian zo hnahtlakthe inzawmkhawmna tura kan thawh hi a hun takzet tawh a. A modified Resolution kan Minister zahawm tak Pu R.Romawia rawn move kha lungual takin kan pass thei mai lo em ni tiin tlai khawhnuah ka rawn dinchhuahpui ve a ni. Pu Deputy Speaker, ka lawm e.

**DEPUTY SPEAKER** : Sawiduh kan la awm em? Awm tawh lem lo em ni? A concern Minister kha han sawm turin a chhuak lawk em ni ? Kan sawihona kan tui tlang a, hunte pawh la hawng ila sawiduh tam tak in la awm ang a. Amaherawhchu dar 4 thleng hi kan hun neih a ni a. Tah chuan loh theih loha sawi la ngai chu pathum an la awm ta a. Chuvang chuan kan sawihona kan duhtawk dawn tawh mai ang a. Minister concern Home a ni a, Home Minister-in sawiduh a nei em? ilo sawm ang.

**Pu R.LALZIRLIANA, MINISTER** : Pu Deputy Speaker, ka lawm e. Hei member zahawm tak Pu Vanlalawma resolution “UNO in tualto hnamte dikna chanvo a puanchhuahna ‘UN Declaration on the Rights of indigenous peoples’ a hlawhtlin thuai theihna turin theihtawp chhuaha hmalak ni rawh se” tih hi politic ang tak pawhin a tha a. Tin, he thu hi thu mawi tak a niin ka hria a. Hetiang ang hian khawvel ram hrang hranga tualto hnam ‘indigenous people’ mi maktaduai 370 vel zet tena harsatna leh buaina hrang hrang atanga khaichhuah an nih theihna turin khawvel ram hrang hrang 143 lai chuan he thu tlukna hi an lo siam ta a, vote an lo pe ta a. Hetihlai hian ram 11 in an ngaihdan an sawi ve thei lo a. Tin, Australia te, Canada te, New Zealand leh USA te phei chuan an duh lo a ni, hetih lai hi chuan. Tichuan India ram hi United Nations Declaration on the Rights of Indigenous Peoples duh zing ami a ni ve a, a lawmawm khawp mai a.

Khawvel hi sap kan tihte ho hian kum sang chuang zet chu an thuneihna hmangin rorelna an lo hmang tawh a. Tin, rawng takin, anmahni tana hmasial takin ro an rel chho tawh a. Hnam changkang lo zawk te, tualto hnam te ram leh an hauhsakna te tihluhnain a tul phawt chuan chhuhsak an hreh hauh thin lo a ni. Kum za tam rahbeh a lo awm tawh tualto hnamte, a bik takin Asia a mite, America te, Africa khawmualpuia chengte tan an dikna leh chanvo humhalh sakna neih a tul a ni tih ngaihtuahtu chu United Nations Economic & Social Council hian group ang deuha indigenous people te zirchiang turin an din a. Tichuan United Nations chuan kum 25 lai mai hun chumi ngaihtuah nan chuan hmangin sawisel leh dona nasa tak karah ni 13, September, 2007 khan he dan hi pawm a lo ni ta a ni.

Tichuan he United Nations thupuanna ‘Declaration’ hian Pu Speaker, a pawmtu ramte tih tur anga lang tam tak chhawpchuah hrang hrang an nei a. Bawhzui ngai ngei ngei tur a tihna lam aimahin khawvel ram hrang hrang ten he tualto hnamte dikna leh chanvo pek chungchanga inlungualna an neih hi a tum ber zawk niin a lang a. Tichuan, kan Danpui Constitution Part IV-ah chuan Directive Principles of State Policy kan nei a. He Directive Principles of State Policy hi Court a dan anga kenkawh tir emaw, zawm ngei ngei tura ngaih theih emaw ni lo mah sela, dan siam pawl legislator te tana tha zawk kawng kawhhmuh theitu tur a ngaih a ni a. UN thupuan ‘Declaration’ thiltum bulpui ber chu ram hrang hranga sorkarte finchhuah leh kawngdik kawhhmuh hi a ni.

Kan hriat angin India ram a lo zalen hnua Constitution duan a nih lai khan hnam hnufual leh tribal ten humhalhna tha zawk an neih theih nan tiin Constituent Assembly, January 24,

1947 Khan Advisory Committee on the Rights of citizen, minorities and tribal and excluded areas chu nichina kan ngaihthlak ang Khan Sardhar Vallabhai Patel kaihhruaina a din a lo ni ta nghe nghe a. Heng committee te hian ram Danpui constitution chu tualto hnam kan tih mai te humhalh nan 5<sup>th</sup> leh 6<sup>th</sup> schedule te hi an siam a, chu chu alo piang ta a ni.

Khawvela democracy ram lian ber a nih piah lamah hian hetiang anga hnam hnufual zawk leh tribal te dinhmun hrechiang a, an inhumhimna leh hmasawna tura ruahmanna tha tak kan lo nei ta hi vawiinah hian a chhuanawm em em a ni. Kan ram Danpui constitution leh dan hrang hrang entirnan – ‘The Schedule Tribe and Schedule Caste (Prevention of Atrocities) Act, 1989’ a ‘The Schedule tribe and other traditional forest dweller recognition of forest right Act, 2006’ te chu hnam hnufual leh tribal te hian tualto hnamte tan duhsakna leh hamthatna tam tak a siam a ni tih hi kan hmu thei a.

Tichuan India ramah hian tualto fate leh tribalte humhalhna tha tawka awm sa a. Dan leh hrai awm sa te chu tha taka kenkawh chu (Deputy Speaker: Chair kan inthlak lawk ang e) he UN thupuan ‘Declaration’ hian a thil tumte tihhlawhtlin nana tihmakmawh, hlenchhuah tur chu a ni ta a ni. Tichuan, Pu Speaker, kan sawi ang hi thil awmdan a nih avang leh India a cheng tualto hnamte dinhmun anih avangin MLA zahawm tak Pu Vanlalzawma Resolution in tualto hnamte dikna chanvo a puanchhuahna ‘UN Declaration on the Rights of Indigenous Peoples’ an rawn chhawpchuak hi kan sorkar chuan kawngro su tak a ni ang tih a pawm rualin, a pangngai ang diak diaka pawm hi chu a tul lo in kan hria a.

Chutiang chuan nichina kan Minister zahawm tak Pu Romawian a rawn sawi India sorkar ropui takin UNO in tualto hnamte chanvo a puanchhuahna UN Declaration on the Rights of Indigenous Peoples tihlawhtling zawnga hma alo lak thin tawhna hi lawmawm kan ti a. Hmalak chhunzawm zel se kan ti, tih hi lungual takin pawm ila. Opposition lampang, i vei lama mite resolution a nih vang ngawt ni lovin. Kan hnam tana dam leh tha zawk leh India sorkar ngei pawh hi kan tihphur theihna zawk a ni dah law maw tiin hetiang hian ti thei ila tih chu Home lamin kan ngaihdan chu a ni. Ka lawm e.

**SPEAKER** : Awle, tunah Leader of the House sawiduh a neih chuan i sawm ang.

**Pu LAL THANHAWLA, CHIEF MINISTER** : Pu Speaker, ka lawm khawp mai. Sawi tehchiam ka tum tawh lova, mahse hun min pek takah chuan tawite ka’n sawi ange. He resolution hi a lawmawm takzet a, tin, a nachang an hria pawh hi lawmawm ka ti. Kan mamawh leh kan sawi a ni hlawm a. Sawi tur sei tak ka nei a, mahse ka sawi dawn chuan a rei lutuk dawn a, chuvangin ka sawi sei lovang a. Duh inang reng si sawidan hrang deuh hlek a ni maiin ka hria a, kan ngaihthlak tawh chinah chuan. Tin, tha ti, amaherawhchu tha kan tihna a hmawrbawk dan hi tlemin a inanglo deuh ni maiin ka lo hria a. Kha, kan hotute han sawi tawh zawng zawng kha a ngaihnawm a, a

lawmawm ka ti a. Chuvangin kan hotute rilruah hian a khat hle a ni tih a lang chiang a, a lawmawm ka ti takzet a ni.

Hemi 'UN Declaration on the Rights of Indigenous Peoples' tih chungchangah hian Pu R. Thangmawia hi a bul atanga tui a ni a. Tin, tun hnu zelah phei chuan a champion tu ber a ni chho ta a. Vawiinah hian heng kan sawihote hi ngaithla se a lawm hlein ka ring a, chutiang khawpa lo buaipui tawh tu a ni.

Mizote hi Pathian nung laka kan special zia hi ka ngaihtuah thin a, ropui ka ti a. Keini ang hnam hmun hrang hrangah awm mahse tawng khat Lusei tawng kan tih Duhlian tawng kan tih hre map lo, awm mang miah lova min siam te hi a mak angreng khawp mai a. Burmaah pawh kal ila, khawiah pawh kal ilangin, mahni chi tawng hian inbia ila kan inhre deuh nual vek a ni. Chutiang chu kan thenawm tribal dang hi chu an awm ve mang miah lova.

Tin, keini ho chauh hi ka sawi fo tawh thin a, khawvela sakhaw lian ber bera ngaih pathumina a hual beh tlat tir hi a awm ve miah lo a ni. Kan thlir kan thlir thin a, an awm ve miah lovin ka hria a. Keini chu hei chhak lamah Bhudhist ho, thlang lamah Mosolman ho, hmar lamah Hindu ho an ni a, heng baka sakhaw lian hi an awm tawh lova khawvelah hian. Chuvangin, tih tur neiin min dah a, tih tur neiin min rawn ko a ni tih hi ring nghet vek ila a thain ka ring a.

Chuvangin, vawiinah hian India khua leh tui kan ni rih lo ve, ringlo mite nen ruallo taka nghawngkawl bat thei kan ni lo, tiin zalenna te kan sual a, mahse engkimtitheia hming kan lam a, Pathian leh kan ram tan kan ti a. Kum 20 tal tap tah leh hathialna kan tawrh hnu pawhin min hlawhtlintir lo a ni. A programme nena inmil, a lam tang leh duh zawng ni selang chuan min hlawhtlintir thei a ni tih hi keini ringtu ho hi chuan kan hre vekin ka ring a. Chutiang chu a ni a. Chuvangin, tunah hian tih tur neiin he ramah hian min dah a ni. Chu chu chanchintha hril a ni. Chu hna chu a duh ang tawka kan kalpui hunah chuan kan zavai hian tangkai zawka min hriat hunah phei chuan thisen far khat pawh far lovin min dahkhawm thei ang tih hi kei chu ka ring tlat a, chumi ram chu kan thlir hi a ni. Chutiang chu a ni a, mahse khawvel a la nih avangin kawng hrang hrang leh ngaihtuahna hrang hrang a awm thin a, kan approach te pawh a inang lo thin a, chutiang chu a ni.

Hmanni khan Delhi-ah ka kal a, kan President, kan Pi Sonia Gandhi ka va hmu a. Nidanga a that tehlu thin nen, "Engatinge Lal Thanhawl, state dangah i inrawlh, engatinge Prime Minister hnenah lehkha i ziah, hei an duhlo nasa che a ni, hei an rawn hek che" min ti a. 'E, i duh loh zawng ka tih chuan pawh ka ti a min ngaihdam pawh ka duh a. Amaherawhchu, ka ti zel dawn a ka ti lo theilo bawka a ni', ka ti a ni. 'Blood is

thicker than water,' tui aiin thisen hi a chhah zawk ka ti a, kan hrilhfiah ta a, ngaihthlak nuam a ti khawp mai a. A tawpah pheih chuan darkar khat deuhthaw midangin an nghak tuai chung pawh khan ka hrilhfiah a, min zawh apiang kha ka hrilhfiah zel a.

Nichina kan ngaihthlak tawh ang khan keini ho hi kumpinu sorkarina devide and rule policy, thendarh la awp bet rawh tih kha a tuar berte kan ni a. Burma ramah tam tak kan awm a, India ramah state hrang hrangah, Bangladesh-ah, chutiang chu kan ni a. Hengho hian engtik hunah emaw chuan Pathianin min la dahkhawm ang a, rorelna pakhat hnuaiyah min la dah ang tih hi kan ring tlat. Hei Manipur pawh tunah hian Meitei ho hi hetiang an ti mai hi kan ngaithiamlo hrim hrim. Chuvang chuan, min au emaw aulo emaw kan inrawlh ve dawn hrim hrim a, kan inrawlh a, chutiang zawk chu a ni.

Manipur ram hi phai kuamah hian Meitei ho an awm a, Naga ram depah Naga ho an awm a, Burma ram depah leh Mizoram depah Kuki leh other Mizo ethnic group te kan awm a. Hengho zawng zawng hi rorelna pakhat hnuaiyah awma insuihkhawm hi kan duh a, chu chu kan legend pawhin min hrilh a ni. Tin, chumi hria chuan a tawi zawngin a sei lutuk ang tih ka hlau a, i la hrelo mai thei a, Pi Indira Gandhi pawh khan hei hi a pawm a a duh a ni. ZORO movement Brig. T.Sailo leh mi dang dangina an tan pawh khan Indira Gandhi hnen atangin signal kan hmu an ti a. Chu chu a hnuah amah nena kan inkawmna atang pawhin ka hre thei. Rajiv Gandhi pawhin chu chu a rawn follow zel a ni. Amaherawhchu, hei hi chu publisize tur chi a ni lova, ramdangte nena kan in relation te a khawih theih avangin. Chutiang zawk chu a ni hei hi inhriat ka ring lova, mahse ka hrilh che u a nih hi.

Chutiang avang chuan Bangladesh –ah a ni emaw Burma-ah a ni emaw hetiang kan mizo puite chungah thil tha lo a thlen hi chuan theihpatawp kan chhuah ve thin a ni, ka ti a. Chuvangin, khilaia tui lian an tawrh chungchangah pawh Prime Minister hnenah kawng a chhe bawk si, lui a kal theih bawk si loh, chuvangin thlawhna airdrop dan ngaihthuah sak tur te pawhin ka ziaa a ni ka ti a. Chutiang chuan thil hi a inbah chhoh dan hi a ni a. Chuvangin, helaiah Meitei te nge awm hmasa Mizo ethnic group tih pawh hriat hleih lohah helaiah tlang mite khua leh tui ni hlei thei lo tura bill pathum ngawt an pass ringawt mai hi Prime Minister hnenah pawmpui miah loh tura ziaa hi chu Mizo zawng zawngin kan tih tur niin ka hria a. Chu chu Mizo zawng zawng aiawhin ka ziaa a ni, a tul chuan amah pawh hi ka hmuh dawn a ni ka ti nghe nghe a, chutiang chu a ni a, chu chu ka'n sawichhuahna chhan chu vawiina helaia kan resolution hi a rawn puluttu chungah hian lawmthu ka sawi a.

Tin, hei kan hotute pawh hian an lo hre ru deuh a, a tlanglo palh ang tih an hlau nge resolution dang an lo siam ve lo reng reng te hi a mak ka ti a. Chuvangin, Pathian remruatna ropui tak a ni. Kan hotute opposition lampang hian a hmingthat hi la se

an duh emawni chu aw ka ti a, chu chu a House hmingthatna a ni tho si a. Chutianga hetiang kan hotuten resolution pakhatmah heng han khak buai tura an lo ti ve lo reng reng te pawh hi thil awmze nei tak niin ka hria a, chu laiah chuan a lawmawm ka ti takzet a.

Tin, in hria a kan hotuten, Mizoram pawn a hria a. Resolution reng reng hi khawi House-ah pawh 1984 atangin opposition resolution a nih avang ringawt hian a dang thla ngailo reng reng tih hi min hriatpui ula. Vawiina kan Minister-in amendment a rawn propose pawh khan dik tak chuan ka thu a ni hranpa lo va, mahni thu theuh a nia a rawn ding hma lutuk a, an ngaih dan kha sawi deuh laih laih hnu khan rawn propose chauh se tih kha ka duh zawk a. Hetiang proposal hi amendment hi proposal a siam dawn tih hria ila chuan engemaw zatin ngaihdan an siam hnu khan ka lo ti tur a ni a, mahse ka lo hre chiah lova. Tin, tunah pawh hian Pu Speaker, kan hotute pawh hian kan oppose lo a ni tih kha kan tawngkam atang pawh khan an hriat ka ring a. Amaherawhchu, a wording te hi a khawi hi nge tha zawk ang tih kha a ni a. Hei i phalnain, India sorkar ropui takin UNO in tualto hnamte dikna chanvo a puanchhuahna UN Declaration on the Rights of Indegenous Peoples tihlawhtling zawnga hma a lo lak thin tawhna hi lawmawm kan ti a, hmalak chhunzawm zel se kan ti, tih a ni a.

Tin, kan Minister zahawm takina amendment a rawn proposed kha, UNO in tualto hnamte dikna chanvo a puanchhuahna, UN Declaration on the Rights of the Indegenous Peoples a hlawhtlin thuai theihna turin theihtawp chhuaha hmalak ni rawh se tih a ni a. Hei hi Resolution zawk ani e, ka tih palh.

Tin, kan Minister zahawm takin amendment a rawn proposed a kha tihlawhtling zawnga hma lo lak thin tawhna hi lawmawm kan ti a, hmalak chhunzawm zel ni se tih hi ka hnena thil rawn phut ni ta sela han chhiar ta ilangin, amendment hi ka duh zawk mai awm mange aw ka ti. Tan a lo lak tawhna leh a lo tihlawhtlin tawh zawng zawngah lawmthu sawiin hei bak pawh hi rawn tihlawhtling zel se kan duh mang e kan tihna kha niin ka hria a. Chuvangin, Pu Speaker, hemi hi tuman kan opposed lova, kan han sawi te kha, a resolution neitu an ni ta vek emaw tih mai tur khawp khan an sawi thiam hlawm a, ngaih pawh a ngaihnawm a. Tin, prepare pawh an in prepare tha ka ti a, an sawi tam tak atang khan bengvarna keini ang duang chuan kan lo hmu ve a, a lawmawm takzet zet a ni.

Chuvangin, Pu Speaker, kan Resolution neitu Pu Vanlalzawma hnena lawmthu sawi chungin hetia amendment siam a lo nih tak rau rauah chuan amendment hi kan zuk dawr tura te tan hian a ngaihtlak a nuam zawk anga tih ngaihtuahna ka neih avangin hetiang zawnga amendment hi ka rawn support a ni, ka lawm e.

**SPEAKER** : Awle, a neitu ber Pu Zawma kha i ngaihndan, hei House ngaihndan kan la tawh dawn a nia. A hnuhnung zawk hi i thlawp thei mai em ?

**Pu VANLALZAWMA** : Pu Speaker, wind-up pahin kha kha chu ka rawn sawi mai turah ka ngai deuh a. Khaikhawm kha a tul tho tho a ni lawm ni Resolution ah khan. Ka rawn sawi mai ang khalai kha chu, khaikhawm pahin.

Kan Speaker hi a hmanhmawh angreng a, chuvang chuan a hmasa berah han sawi ta mai ila kha lai te kha. Kan House Leader zahawm tak rawn sawi ang khan he Resolution hi kan support vek niin a lang a. Ngaihndan hrang leh sawi dan hrang reng reng a awm lova, amaherawhchu, a wording ah khan kan han sawi tak amendment, kan Parliamentary Affairs Minister-in a rawn rawt ang kha pawm theih loh thu a awm lova, a tha maiin ka hria a, hun kal zel atan pawh a tha zawk thei e tih kha a hmasa berah ka'n sawi ang a.

Tichuan, wind-up-na ang deuha ka han sawi rik zeuh zeuh leh duh a awm a. Kan House Leader-in a rawn sawi pakhat kha ka sawi chhuah tum tak Manipur chungchanga hmanni a Prime Minister lehkha a thawn chungchang te kha a ropui ka ti a, a ngaihsanawm hlein ka hria a ni tih kha ka sawi leh duh a.

Tin, rilruah thil pahnih a lo lang ta a tikhan, pakhatnaah chuan he UN Resolution hi India sawrkar kar nan hian kan hmang tangkai thei a ni Mizo te hian, he State sawrkar hian, ti ang zawngin a ngaihtuah theih a. A chhan chu khu lam atangin an duh duhin an rawn ti a ti teh ang, kan ram tana relevant mang lo te pawh hi an rawn ti a, chumi mil chuan kan insiam a, budget te pawh kan ti a, tul ber lo te pawh hi kan inkar chhuak vak a, kan mamawh em em pawh nilo. Chutih laiin kan mamawh zawk tam takah kan insawi chhuak leh hleithei si lova.

Ka ti fo thin a, heng Mid-day meal an tih te hi India hian min hrechiang se chuan Mizoram hi min pek ka ring lo ka ti. A chhan chu kan tu leh fate school kal loh hlau vek kan ni, hmeithai pachhe ber pawn a tute fate school kal loh a hlau em em, kal tir hram a tum. Mid-day meal an tihna idea hi chu a chi hniam lutuk leh a berh lutuk hovin a an fate school an kal tir hram hram theihna tura incentive ang deuha a tih hi a ni a. Engpawhnisela, chu chu a tha lo ka tihna lam nilovin, heng zawng zawngah hian min ngaihtuah lem lo hian all India programme leh policy te an zam pup a, kan mamawh ber pawh nilo te hi min pe a, chutihlai chuan kan mamawh em em te hi min hlamchhiah ang lawi baw si a, tih te kha ngaihtuahnaah a awm a. Chuvang chuan he UN Resolution-ah hian chapter hrang hrangah khan khatiang hman tangkai theih tur kha tam tak a awm a. India sawrkar kar nan hian he sawrkar hian kan hmang zui thein ka ring a.



Sawi leh sawi hnu, nimin zing lamah te pawh kan sawi tawh a, kan kawng chhia siam kan duh em em te pawh, khutah tender an chhuah daih a, keini chhan hleihtheih lohin kan Contractor te chhan phak lohin, crore tam tak nei tan chauh a chhan theih ten min siamsak a, kan ram kawng siam tur an ni lawi si a. Hengte pawh hi heng kan Right a ni, India-ina a duh dana a rawn ti vak mai lai hi a hrisel lo a ni. Kan tan a tha lo, kan tuar leh si a tunah pawh tiang hian kan awm chho mek a ni a. Khang zawng zawngah khan India sawrkar kar nan te pawh a la hman tangkai theihin ka ring a. Chutih lai mek chuan heng kan dan ( hei dan hria ka bul ah a thu a ) system te pawh hi han ngaihtuah chian hian a va han tha ber lo em Mizo tan te chuan tih pawh ngaihtuahnaah a awm a ni.

Tunah chuan inawkhlum kan awm pawn kan la thla mai ngam tawh lo reng reng, Police koh phawt te a ngai tawh, Mizo zia hi a ni tawh lo reng reng. Kan kawtkaiyah mi pawh lo tlu hlum sela han tuam hlawm a puan te han khuh a han sawngbawl te pawh hi kan ngam tawh lo a ni. Chu chu Mizo zia a ni ngai lo reng reng. Chung zawng zawng chu India Danpuin min rawn tuam vak vanga tih loh theih loha kan ngaih, kan kalpui tak hi a ni a, Mizo culture nen a inmil lo reng reng.

Hmanni lawkah, 2011 ah Japan ramah lir a nghing a, Tsunami na deuh an tuar a, khata an sawi te kha an ngaihsanawm a sin Japan te kha. Khawlai ah bungrua a darh neih nuaih, tumahin mahni ta lo an la ve lo. Relief Camp ah te pawh an awm ve tho, an phun nuaih nuaih lo. An chaw dawh tur intlar te pawh vawikhatah an chang vek lo, a chang lo kha an au buai ve ngawt lo. Chungte chu Mizoin kan tih thin dan ang tho kha a ni. An sawi pakhatatah phei chuan tleirawl lian zet mai hi chaw dawh turin a lo kal a, a semtu te khan “ Val-a, nang chu i lian si a fun hnih hi i la mai dawn em maw ni le?” an ti a, mahse chu tleirawl lian deuh mai chuan “ Pahnih ka lak te chuan ka hnungah chang lo an awm ang asin “ a ti. Kan ze mawi em em Japan ramah an lo la practice thei a ni.

Ka sawi fo thin a kan hnam sipai ho bulah, “ Ramhnuaiah in chhuak a, chaw chhuan hnih chhuanthum in nghei, chutih lai chuan Theipui rah hmin tha deuh in va hmuh pawn a thleng hmasa sain in ei buan buan ngai em ni? A Commander-in a duh tawh a ei ngawt em ni ? In insem tel tel a ni lawm ni? Khang zia te pawh kha tunah hian a la tul reng a ni”. Tih te ka sawi ve mai mai thin a. Chung zawng zawng a chu kan zia, Mizoin kan neih vek, khing khaw chhak lamah te an lo la practice thei kha kan dan system eng emaw neuh neuh hian min su chhe nasa lutuk Mizote hi tih kha ka ngaihtuahnaah a awm a.

Chutih lai chuan a point hnihnaah chuan, sawitu tam ber pawhin in rawn sawi kha, Zo hnahthlakte inzawm khawm lehna tur atan a hman tangkai theih a ni he resolution hi. Tharum thawhin kan bei ang tihna lam a ni reng reng lo. History kan en chuan German unification te kha han en ila, ram hrang hrang 20 chuang, Independent thiau kha Prussia, Bismark-a te beihna azarah ram khatah an inchhun fin thei a ni. Chungte chu a ni ve thei tho kan ramah pawh hian. Bangladesh

leh Manipur leh Tripura, Burma leh Mizoram a ni mai a, ram dang pawh a ni lo, engvangin nge kan inchhun khawm theih loh ang! Kan dinhmun a hrang si a, Intenational boundary te, State boundary ten min dang a, kan rilru put hmang a ingang lo hret hret bawk a, mahse khang zawng zawng kha a tihdanglam vek theih a ni, chu hnam thinlung kan put chuan. Sawi tawh ang khan, tawngahte kan in unau zel a, kan ti chho zel a.

Tin, thil pakhat ka rilrua lo lang tlema kan ngaihtuah zui ngai erawh chu India in min enkawl tha kan ti a, a lawmawm em em a, Tribal te min duhsak a ni, a lawmawm lutuk. Chutih lai chuan kan India leh lutuk ang a, India hi khawvela ram ropui ber emaw kan ti ang tih a hlauhawmin ka hria .India ram aia ram ropui, chhak lama kan thlahtu leh kan chipui ho khi an tam tih hriat a tha heng kan sawi lai hian. A chhan chu khing Thai te, Malysian te leh Japan, Korean, China te ho khi keimahni ang te te an ni. Pianphungah pawh sang biklo, pa te ve te te an ni. India hi an ropui flat a ni. Khtiang khi kan ni ve thei a ni tihna lam a kan ngaihtuah a tul in ka hria a. India ang deuh a zu awm a, India deuh a awm kha ropuina emaw kan ti ang tih a hlauhawm in ka hria.

An sawi pakhat ka hriat chu Korea chungchangah khian, 1953 ah Korean War a tawp a, khami zawh hlim khan Korea chuan India ram atang hian Rail ( Bogie ) kan tih a body a hi an lei chho a, chumi han dahtu zinga India Engineer pakhat chuan a ram chhia a ti lutuk a, indonain a hrut nasat avang khan ( Communist leh American indonaah khan) “ This Country will not survive “ ( He ram hi a ding chhuak lo ang a ) a ti e an ti a ni. Mahse a letling zawngin thil a kal a, kum 50 a vei meuh chuan ( hu chu 1953 ) a ni a. 2001, 2002 chho va ( kan hotuten in hriat ka ring a ) Delhi a Metro an tih, lei hnuai rail an han tih tak tak chuan a Bogie hi Korean siam kan lei let tawh tlat a ni. Chu chu 1953 a kan body lian pui pui han hralh chhoh kha tunah chuan a tunlai ber Samsung company an tihte hi 1974-ah an din chauh a ni a. Chutih lai chuan India ram a transistor radio kan tih ang chi pawh kha an la siamthiam lo a ni an ti. Mahse, tunah chuan Samsung chu khawvel in kan hre vek, chu chu kan sawikual duhna chhan chu khingte khi kan unaute an ni. Anmahni ang khian kan ni thei a ni, Mizte hi.

Heti zawngin kaithleh ila, India lam ngaihsan ringawt mai leh Delhi tlang leh phailam ngaisang em em ringawt mai turin kan in zirtirna lutuk ang tih ka hlau a. Min enkawl danah vui leh vai natur tam tak awm mahse, tha tak tak a tam lutuk tih chu ka pawm tho. Khati zawng te khan ngaihtuahna hmang ta ila. Kan tih theih ve tho tithei lova kan inngaih palh te a hlauhawm a, India kan ngaihsan viau lai hian. Keimahni chipui ho Japan te, Malaysian te leh khing ho China hote pawh khi ropui takin an dingchhuak thei a ni. Khati zawng khan he resolution pawhin a keng tel a. Kan zia te leh kan tihphung te leh an film te kan enin, kan inang em em a ni. Chuti zawng chuan ngaihtuahna hman kha a tul tel hlein ka hria a. A chhan chu India that zia kan sawi lai khan khulama inchiah hmin lutuk palh kha a hlauhawm a. Anni ai hian kan ropui thei, kan kal dan phung a fuh chuan.

Mizo chungchang kan thian pakhat in a sawi hi ka hrereng thin. Mizote chu kan tha lutuk, amarawhchu, motor timing diklo ang deuh hi kan ni a ti. Motor timing diklo hi a buaithlak khawp mai, han tlan ila a khawilai mai hi a tha ta lo emaw tih tur hi a ni a. A ke te pawh hi a tha ta lo nge ni, khawilai nge hriat hleih theih siloh hian a ti hlei thei reng reng lo mai a, mahse, workshop ah han kal ila a timing an han herh dik zeuh hi chuana tlan leh vat vat mai thin a ti a. Chutiang deuh chu mizote hi kan niin ka hria kei chu. Chuvang chuan, khati zawng khan in zirtirila, India sorkar kan chungah a tha a lawmawm, amaherawhchu, khami ringawt thlir lo khan keimahni hian kan ti thei ang, kan ngaihtuah thiam ang tih zawngin kan inherfuh hun hunah hi chuan ropui takin kan chhuak thei a ni tihte kha vawiinah a pen hleh deuh nachungin India sorkar kan fak mek lai khan khati zawng khan ngaihtuahna Pu Speaker, hman tel tulin ka hria a.

Hetia resolution a tira ka move a, ka phur ai mahin tuna kan han sawiho kan han sawiho hian a phurawm leh zual tain ka hria a. Chutih rual chuan kan Parliamentary Affairs minister-in a sawi ang deuh a amendment in tih pawh kha hnialna ka nei hran love, ka lawm e.

**Pu LAL THANHAWLA, CHIEF MINISTER** : Kam khat chauh, Resolution neitu Pu Zawma, member zahawm tak a thlamuan leh zual nan hei Kaladyne Multi Modal Transit Transport System kan tih, tuna kan beih mek hi South-east Asia rama khimi a kan chipuite tih kha khanghote nena kan insumdawn tawna tur atana tih a ni a. Tunhma kum 20, 25 vela kan lo tan tawh kha a ni a. India sorkar tih a ni miah lo tih hi hria ila. Tunah chuan minrawn pawmpui a, an sum lo chuan kan ti thei lova, km 100 hi kan lai tlang ti tih tawh a. Tin, Burma ram chhungah Akyap saw sea-port ah hmangin, tichuan North-Eastern state zawng zawng hian gate-way of trade & commerce ahrawn hmang turin kan beisei a. Tichuan, trade route alo nih rual khan chanchin tha hril tura koh kan nihna angin chanchin tha hrilhna remchang tak a inhawng leh zual zel dawn a. Chu chu sawlai saw a tira kan hotuten anrawn ngaihtuahna chhan a ni e.

**SPEAKER** : Awle, Private Member Resolution, “UNO in tualto hnamte dikna chanvo a puanchhuahna ‘UN Declaration on the Rights of Indigenous Peoples’ a hlawhtlin thuai theihna turin theihtawp chhuaha hmalak ni rawh se” tih chu tihdanglam amended a ni a. Kan Parliamentary Affairs minister in tiang hian a rawn rawt ta a, India sorkar ropui takin ‘UNO in tualto hnamte chanvo a puanchhuahna ‘UN Declaration on the Rights of Indigenous Peoples’ tihlawhtling zawnga hma a lo lak thin tawhna hi lawmawm kan ti a, hmalak chhonzawm zel se kan ti’, tih chu a resolution neitu pawhin a pawm tak avangin hei hi kan pass tur chu a ni ta a ni. He resolution pass duh zawngin remti ti ru le, remti lo kan awmlo emaw, kan awm lo. Chuan he resolution Pu Vanlalzawma, MLA zahawm takin a putlul, Pu R.Romawia, Parliamentary Affairs minister ina a siamthat chu “India sorkar ropui takin UNO in tualto hnamte chanvo a puanchhuahna ‘UN Declaration on the Rights of Indigenous Peoples’ tihlawhtling zawnga hma alo lak thin tawhna hi lawmawm kan ti a, hmalak chhonzawm zel se kan ti” tih chu he House hian lungrual takin a pass a ni. Awle, vawiin atana kan tih tur kan zo tawh a.

**Pu VANLALZAWMA** : Pu Speaker, ka lawm e.

**Pu R. ROMAWIA, MINISTER** : Lawmna pahnih ka nei a, kan resolution neituin a resolution han chhuih dawrh khawpa amendment kan han tih min pawmpui zia House a a rawn sawi kha a lawmawm a. Tin, khatia kan han siamthatna House-in lungrual taka min pass-pui avangin ka lawm e.

**SPEAKER** : Aw, naktuk zing dar 10:30-a kal khawm leh turin kan hawng rih ang.

Sitting is adjourned.